

虞伯生詩目錄

卷之一

味經堂詩

題宋誠甫侍郎垂綸亭

高彥敬青山白雲圖

趙忠簡公祠堂詩

賦衛節婦王夫人

題學易齋

援草生竹間

國家圖書館 NATIONAL CENTRAL LIBRARY, TAIWAN, R.O.C.

高竹臨水上

月出古城東

書上京國子監壁

至治壬戌八月十五日榆林對月

憶三十年前與元復初參政同賦秋日梨

花元有句云朝食葉底梨莫看枝上花

而忘其後句因續之云

李老谷

泰定甲子上京有感次韻馬伯庸待制

賦水木清華亭

天曆戊辰前續詠貧士 一首

又一首畚舍弟見和

後續詠貧士 四首

觀花有感

赤城館

同閣學士賦金鴨燒香

退直同柯敬仲博士賦

送良上人賦得井上桐

送吳子高

于仲元舍賦紅梅

寄題新冶亭

題儋耳東坡載酒堂 二首

盜發亞父塚

應制題王拙画吳王納涼圖

步虛詞 四首

題商學士畫

贈藝監小吏

記子昂畫

送西臺治書仇公哲

送張道士歸上清

日出行

贈治冠者

贈寫真佟士明

寄陳衆仲助教上都作

贈鐵庵道者 二首

題商德符華山圖

寄幻庵主者

賦茅山道士雲松巢

酬上清道士鈔陰何詩

題李漑之學士白雲半間

題浴日觀

爲范尊師賦雲林清遊

吹笛圖

送甘以禮調官歸鄉

送李彥方闔憲

題鄭秀才隱居

題朱邸竹木

詠史

畫古木

賦蘇伯修滋溪書堂

題薛外史瓊林臺

送張兵部孟功巡河分題得屋上鳥

題彭澤陶氏家譜

卷之二

賦洛川老人九十

張令鹿門圖

子昂畫馬

湛湛行

家兄孟修父輸賦南還

子昂墨竹

商德符畫幽篁古木

吳郡陸友仁得白玉方印其文曰衛青臨

川王順伯定以爲漢物求賦此詩

爲達兼善御史題墨竹

畫鶴

題畫

寫廬山圖上

題旦景初僉司畫

題柯敬仲畫

白翎雀歌

敬仲畫扇

題簡生畫澗松

題李受益承旨作東平章萬戶繼志堂後
題柯博士畫

題高彥敬尚書趙子昂承旨共畫一軸爲
戶部楊侍郎作

題灤陽胡氏雪溪卷

題楊友直檢校所藏李營丘枯木圖

題詹圖老梅圖

酬蕭侯送蒲萄

題袞塵騮圖

林臯亭

題子昂長江疊嶂圖

挽胡伯恭令尹 二首

題雪谷曉行圖

送先隴二鄰僧還吳 二首

節婦王夫人劉氏

次韻阿榮存初參議秋夜見寄

雪谷早行

雪岩樓觀

送人之劔閣倅

寄子山尚書

漫興

送張尚德

寄丁卯進士薩都刺天錫

送趙繼清令尹之官安陸

明皇按樂圖

送長沙守

送趙編修祀西嶽江瀆

代衆仲作

題宋雲舉太常臨汾二節婦序後

送王照磨之官雲南

玉堂燕集圖

寄荅桂風子先生

寄莆田先生

鄭谷圖

画檜

李貞嶠墨竹

爲歐陽少監題宋好古竹

贈楊友直

題朱邸竹木

寄阿魯翬學士

赤壁圖

題況肩吾縣令贈行卷

送朱萬初之廣東照磨

八月八日有感題視草堂壁

賦程氏竹雨山房二首

戲作試問堂前石五首

代石答五首

送魯子翬廉使之漢中

立春夜試墨

蜀人曲江之官贈以墨竹

正月十一日朝回卽事

贈別兵部崔郎中暫還高麗卽回中朝

次刁筠軒司徒足成旦公所藏英宗御題

之句元題曰日光照吾民月色清我心

又題琴曰至治之音

次勻李侍讀東平王哀詩

慶史顯甫治書父八十

送國王朶而只之遼東

送陳碩

奎章閣有靈壁石奇絕名世御書其上曰

奎章玄玉有勅命臣集賦詩臣再拜稽

首而獻詩曰

送南宮舍人趙子期宣詔交趾

卷之三

送袁伯長扈從上京

代祀西嶽至成都作

贈星上人歸湘中

子昂秋山圖

題黃竹村所藏画卷

過池陽與周南翁同知

安慶路雙蓮寺得上人超然亭

謝茅山主者贈白羅氎衣請爲作大洞祖

宗師四十五贊

送莫京甫廣憲經歷

集與諸公遊尚書何公山莊公孫斯明先
爲剪薙荆榛并致酒饌遂得瞻敬尚書
墓道盡日乃還偶成四詩酬斯明兄弟
并簡同遊者

黃氏妹之葬余以他故不及送之旣葬之
明日仲常弟與譚元之表姪述事興懷
形諸詠嘆後十餘日始得併見諸公和

章集憂患之餘觸事易於傷感俯仰存
歿不覺清涕之交頤也依舍弟韻亦述
二章一以示黃氏諸甥一以寄元之表
姪

題故太子少傅翰林承旨李野齋幽居圖

送江聲伯

歐陽元功待制入院後僕以兼領成均辰
酉甚嚴絕不得相見今夜當同宿齋官
賦此先寄并柬謝敬德修撰

次韻張蔡國公淡菴青山寺詩

次韻國子監同官 二首

次韻馬伯庸寶監學士見貽詩并簡曹子

貞學士燕信臣待制彭允蹈待制 二首

鼇峰者國史院庭中石名也伯寧御史爲

僕言自其先公時與諸老名勝賦詩者

蓋數百篇今玉堂無本而御史家具有

之且曰峰所托差低盍稍崇其地乃八

月五日旣克如命因賦此以報且請錄

示舊詩補故事以傳云

進講後侍宴大明殿和伯庸贊善韻 二首

十一月二十夜思仲常弟 二首

次韻道士竇神清賦舜粟

太一道士張彥輔族本國人從玄德真人

學道妙齡逸趣特精繪事爲其友天台

徐中孚用商集賢家法作江南秋思圖

東觀大隱蜀虞翁生爲賦此詩

贈竇神清歸隱茅山

題南野亭

送貢仲章學士奉祠嶽瀆

次韻吳成季宗師赤城阻雨

次韻伯庸尚書春暮遊七祖真人菴兼簡

吳宗師

四首

送宋誠甫太監祀天妃

觸石墜馬臥病蒙恩予告先至上京寄漑

之學士敬仲參書

二首

閒閒宗師和前韻期望過當復用韻以謝

二首

雲州道中數聞異香

次韻楊友直北行道中

王儀伯參政見和郊字韻詩復用韻序謝

二首

十月十六日奎章奏對回至李漑之學士

宅宣旨行香孔林按上得佳紙因賦此

詩并得其鎮紙王蟾

次韻馬伯庸尚書

送甘太史祀名山大川

就甘太史并寄天台武夷太無三君

子昂墨竹

二十五日卽事呈閣老諸學士

賦胡氏皆山

賦礪山成簡卿心遠亭

送全州錄事

與衆仲助教讀王臨川遺事慨然興懷良

上人口蔣山善公求送行因爲賦此

玉堂讀卷

謝吳宗師送牡丹并簡伯庸尚書

和范德機從楊撝進士見寄

送進士劉聞文廷赴臨江錄事

大廷策士問經世之道僕忝在讀卷之列

觀諸進士所對有感賦此錄以贈別鐫

性粹中支渭興文舉二賢良

羅朋友道擢高科拜官還崇仁賦此爲別

贈趙生

贈昇龍觀主

訪李真人不遇

賦壺洲

完哲篤下第歸蜀

吳宗師夢予得山居竒勝特甚夢覺歷歷

分明忻然相告賦此

答李簡伯司直分俎

次韻朱本初訪李漑之學士不遇

寄趙子敬平章

仁壽寺僧報更生佛祠前生瑞竹有懷故

園 四首

題張太玄爲陳升海画廬山圖

別國史院鼇峰石 二首

神鳳琴

繼陶居士傳

謝書巢送宣和瀘石硯

送蘇伯修御史

次韻柯玉文寄別

謝書巢惠梅花

再用韻簡巢翁

送玉泉長老栗木果

送王君實御史

寄句曲外史張伯雨

寄答馬昂夫總管

觀大洞經書與董道士

送劉宗師歸茅山

與薩都刺進士

送歐陽元功謁告還瀏陽

二首

送王師魯編修祠南鎮

次韻楊友直

題東平王與盛熙明手卷

和馬侍御西山口占

到先隴爲墓人書

八月十五日傷感

題暖翠亭

送許有孚赴湖廣提舉

賦石竹

集爲朶兒只慎齋平章題紫微亭用王右丞語也并賦詩一首奉寄

賦碧筠堂

奉同吳宗師賦蔡七祖新齋

次韻吳宗師

寄來鶴亭主人

送王中夫赴安慶教授

送張兵部巡視運河

謝吳宗師惠墨

再和 二首

三用韻答巢翁就以奎章賜墨賜之

四用韻寄吳宗師奉祠城東岱祀其一謝

夏真人送海棠一枝 二首

謝吳宗師送牡丹

題著色山圖

題熊太古画

送趙伯常自中臺出貳淮憲

題淨慈書記

送趙秉彝因王君實末章以起句

題画

城東觀杏花

題張希孟中丞送畢提點申達卷後

寄海南故將軍

次韻宋誠甫學士城南訪病莫歸

寄泉南三老人

次韻答衆仲助教相壽之句

題康里子山尚書凝春小隱六韻

次韻杜德常博士萬歲山

次韻宋顯甫

燕陳公子宅贈燕學士

宣和墨竹寒雀

上馬

題旦僉司所藏慧甄腐瓜行蟻圖

雙鴛圖

画扇雀竹

画扇柳蟬

画雙蝶

商德符画松

河梁泣别圖

題蒙古松壑圖

捕魚圖

子昂画 二首

雜寫 七首

題柯敬仲雜画 十五首

題李漑之學士湖上諸亭

烟蘿境

金潭雲日

漏舟

紫霞滄洲

秋水觀

無倪舟

紅雲島

蕭閒堂

松關

大千豪髮

觀心

題熊太古画 二首

敬仲竹樹古石

題柯博士九疑秋色圖

題柯士画

卷之四

次韻竹枝歌答表伯長 三首

木夫容

水夫容

送四川憲使 五首

曹將軍馬

舊屋

誰家

馬圖

先君大史棄諸孤之四年集來吳門省連
州府君大墓始見叔父南山翁翁與集

同出太師雍國公蓋四從矣翁曰後會
未可期幸畱數語識歲月翁方客授外
鄉又以推人生年月日論禍福以助道
故不能久畱城中敢用賦此以承命云
耳 三首

王母圖

四首

竹杏沙頭鷓鴣

閩州海棠

画猿

記夢中詩

祝融君紫虛君率子廉

三首

題周東陽進士爲南郭園林記後

維摩

錢舜舉折枝夫容

商德符小景

天曆改元十月題子昂馬

寄馬伯庸尚書

商德符小景

賦故宋李忠襄公植烏石渡舊隱

訪杜弘道長史不值道中偶成

聽雨

春雲

與趙子期趨閣

王堂讀卷雜賦次韻 三首

題陳衆仲助教送人之官南平序後

院中獨坐

題歐陽原功少監家柯敬仲画 二首

子昂人馬圖

紹興間臨安士人有賦曲一春長費買花

錢日日醉湖邊玉驄慣識西湖路驕嘶

過沽酒樓前紅杏香中簫鼓綠楊影裏

鞦韆晚風十里麗人天花壓鬢雲偏画

船載得春歸去餘情付湖水湖烟明日

重扶殘醉來尋陌上花鈿思陵見而喜

之恨其後疊第五句重攜殘酒酸寒改

曰重扶殘醉因歐陽原功言及此與陳

衆仲尋腔度之歌之一再董此宇求書
其事因書之并系以此詩

題画古木

八月十五日得旨先歸驛騎在門復召還
草詔十七日至桓州驛壁

子昂幽蘭修竹

子昂竹石

画竹石 二首

酬書巢送棕箒

子昂画

送上黨長

画馬 二首

画羅漢

題納涼圖

題画

題趙子固山礬瑞香水仙藜蕙

息齋竹

冬至前一日答吳宗師

題吳彩鸞所書唐韻

壬申芝亭春帖子 四首

華萼樓宴集圖

爲歐陽學士題子昂墨竹 二首

送道士趙虛一歸金陵

題子昂春江聽雨圖

賦思州田氏楊夫人栢舟堂

次韻杜德常典籤秋日西山有感 四首

題柯敬仲雜畫

黃筌夫容乳狗

題柯敬仲畫

題蔡端明蘇東坡墨蹟後 四首

題著色山圖

題東坡帖

題張彥輔小景

題李氏青溪精舍

題李氏浩然堂

聽雪軒

放鶴亭

臘日偶題 二首

無題

與陳升海

與陳道士

題扇與周幹臣

卷之五

環洲詩爲蔡天璧作

冰雪相看亭

竹林七賢圖

竹溪六逸圖

題汪華玉所藏蘭亭圖

寄題曹元賓尚書臨流圖王繼學叅政畫

玉隆畱題

黃堂畱題

記夢

次韻陳溪山梭履 三首

浮丘公吟寄赤城陳道士入山有遇爲溪

山壽

爲變理普化題陳立所作龍眠山圖

和陳溪山韻

和陳溪山送蘭花韻

送空岩印公還徑山

題張觀海所攜虛舟竹所二毛圖

送龍翔高獨峰上人還金陵

送海東銛上人十首

楚石琛藏主自蔣山歸却欲就叢林閱藏

同舟清江之上賦此贈之

題東郊山房

題蒙菴爲黃石谷賦

爲黃氏賦大雅詩

己卯十月廿二日從宜春郡幙嚴伯威觀

南軒新閣登舟有賦却寄同游者劉粹

中賢良

秋堂 二首

題雪泉齋

平江開元雪廳光禪師訪予臨川山中其
歸也予與賓客用一雨六月涼中宵大
江滿分韻送之不足予爲繼之而予分
得一字

賦彭氏靜深堂

秋山行旅圖

爲題馬竹所九歌圖

清明山房爲危太朴作

次韻太朴良友對何仙舟讀書山中見懷

之作

卷之六

江樓看劍歌書趙子昂劍銘後

劉忠肅公之四世孫中書舍人諱震孫之

曾孫益之題其居曰雲松巢予家與劉

氏累世之契故爲書忠肅公文集之首

詩三篇并賦此詩與之

吳興趙子昂十馬圖

畫馬

題画

空山歌

爲變玄圃題鰲溪春曉圖

題馬竹所画

霍元鎮規模董北苑米南宮父子寫山水

雲物殊有標致見示春江捕魚圖賦此

南岡

題何大夫画馬

同開先南楚悅禪師觀息齋画竹卷於崇

仁普安寺煜公之禪室蓋煜之師一初

本公所藏也因記延祐甲寅息齋奉詔

寫嘉熙殿壁南楚與之同寓慶壽寺惠

予時爲太常博士俯仰之間已爲陳迹

乃題其後云

題村田樂圖

柳塘野鴨

丙吉問牛喘圖

江貫道江山平遠圖

爲汪華玉題所藏長江萬鴉圖

盤車圖

贈羽士費無隱

題漁村圖

題韓幹画馬

題黃都事仲綱山居溪閣圖二首

題秦虢二夫人承召遊華清宮圖

方壺画山水歌

示罔

玉隆宮所藏宋乾道宸翰雲壑二字

寄忽承旨

寄三衢守馬九臯

題朱澤民山水

寄題汪道士草亭

黃敬延送竹本

聞鴈

錢舜舉画

山水圖

丹霞觀黃知微畱別

題馬竹所画

題曹霸馬

答陳溪山元日卽事

送客北門晨登山水閣

次韻陳溪山

二首

杏園詩爲黃思順賦

寄題樓撫山普潤禪寺

寄題許愿夫抗雲樓

贈劉無作

又贈劉無作

卷之七

與燮元溥登仙遊和李浩卿韻

陳可復爲予寫戴笠圖賦詩四首

仙遊道士余岫雲爲從珠溪余隱士求得

華山下黃茅岡一曲規作丹室喜而賦

之不覺五首

崇仁監邑阿里仁甫茉莉花盆中折竹插

之而生枝葉近年翰林學士薩公謙齋作御史時亦有此瑞朝之士大夫引寇萊公故事以爲徵名其堂曰瑞竹而咏歌之薩公仕東南歷郡守部使者所至有仁政著清節美名耆壽今爲中朝老臣瑞蓋不虛發也仁甫長邑三年清介明恕孚于上下此竹之生父老庶士爭走山中相告因取而觀之略寫其狀賦詩以美之

撫郡天寧明極覺講主陪敬齋監郡奉祠華蓋特有高詠三讀敬嘆僕偶共清游輒復次韻衰退不工聊資笑粲

鄧公信吾契家賢弟比奉憲臺書幣存問衰朽于山中其還也無以爲餞賦此與之二首

安成劉雲章漢章兄弟兩秀才來訪一長書一長詩皆有志文學賦此爲別

壽陳溪山生日

秋日同朋游北塔山 三首

送尼山廟學彭山長

游洛湖田舍

題范德機詩集後

溪山翁所居與小雅易君相近翁與余賦

詩易君之季子至善輒隨錄之遂成巨

帙賦此以答其美意云爾

題徐孟俊屏山閣

送易用昭

和陳溪山雪中雪晴 二首

和陳溪山立春後三日卽事

寄陳奉常

集自郡城歸溪山翁寄詩并和申字韻垂

教依韻再呈殊愧遲拙 二首

謝陳溪山送蛾眉豆種

己卯秋舟過清江憶范德機 二首

宜春臺晚眺

廬陵歐陽德器游京以所藏先世誥敕見

原功於玉堂賦此以送之

送黃子勗

書武進縣學記後

己卯臘八日雪爲魏伯亮賦 二首

寄賀吳宗師七十壽旦 二首

和陳溪山元日後雪

和吳先生韻

和天師韻

自和韻

贈武夷道士羅鑑空兼憶范德機

題張采石新造觀瀾亭

某與胡伯友書問疏闊稍久因楚石藏主

待謁翹仰高誼賦寄此詩

贈楚石藏主謁饒心道六有先生

十月朔旦同監邑大用暨僚屬游北塔山

九月與薛玄卿外史會于黃氏溪園陪坐

溪山先生玄觀古仙像

會後將登華山按茆岡玄卿先往候予至

子與玄卿相遇山下別後和朱德嘉韻奉
寄重厯賡和再用韻奉謝

和朱德嘉登華蓋山有賦韻寄薛玄卿和
詩未成登山已遇玄卿下山道中足成
以寄

縉山張君榮字仲華來丞撫之崇仁歷兩
政六年心平氣順上下相安如一日雖
有遠役重勞亦無闕事甚可稱也予之
閒居相愛如故舊每懷扈從東道往來

縉山道中見其風土之勝民俗之美未
嘗不談道以爲樂於其受代調官京師
因記之以詩而與之別明年進秩南來
觀舊治父老兒童相迎於東門之外又
當歌此以爲一笑之歡也 三首

集家世以文學爲業亂離顛沛憂患困苦
無敢失墜然學未成而出早涉筆爲文
應事而已人或以爲能自知其不足也
歸田以來稍得安閑而目疾相嬰學不

加進於立德立言之事無有乎爾也是以所作事過卽罷不復記錄至元庚辰冬臨川李伯宗黃仲律來訪山中拾殘藁于敝篋得粗可屬讀者二百餘篇而錄之賦此以謝

答黃仲律學文之問

重題環翠亭爲李浩卿作

答馬竹所見示詩韻 二首

送吳文明

冬至後陳溪山貺以佳句謹用韻奉答

雪夜有懷華蓋山王玉玄

答盱江聶空山 二首

寄和吳閑閑大宗師

答吳宗師壽稀年詩韻 三首

送撫郡經歷海朝宗調官 二首

寄趙知微廉使

題致爽樓

東坡墨竹

白雲閒上人度夏

寄龍翔寺訢笑隱

寄魯學士

答甘允從寄海東白紵

次韻董子羽見寄 二首

次韻答聶空山

寄貞居張先生

孫宰金碧山水

甲戌四月十七日至臨川冲雲寺祝聖壽

齋罷爲賦此詩

蜀人錙夢良效楊補之掀蓬圖

寄吳思可廉使

寄南安燕信臣總管

遊仙遊山賦詩

方壺作仙遊山圖

畚錢翼之

次韻聶空山送杏

和陳溪山春雪見貽

予少年過薊門酒樓賦此題曰連十八書

郡人疑其爲呂洞賓詩也謾記於此

卽事

四月十六日

目疾偶成

二首

柯敬仲画古木疎篁

答盱江石門江秀才

夢吳成季真人見訪夢中作

嘉平歲望陳谿山白山齋還邑月下獨步

有賦

二首

題馬竹所照磨捕魚圖

李伯宗錄詩

壽陳溪山生日

鶴

二月雪與陳齊賢

閩憲克莊以故舊託文公五世孫明仲遠

徵鄙文老退遺棄散逸荷伯宗用昭止

善浩淵子勗至善及余表姪孫陳誼子

兄子豐仲弟之壻賈熙用昭之從子

大年等十餘人寒冬連旬日夜錄之得
五十卷亦已勞矣賦此爲謝

送朱明仲歸建安并簡貳憲幹克莊

送王公輔遠遊

題趙師舜謝安遊東山圖

活水源爲王欽道賦

夜宿周氏簡饒復心李伯宗

贈朱萬初之官建寧

題汪華玉子昂蘭石

四首

題黃與可所藏錢舜舉瓜圖

題趙師舜光風轉蕙汎崇蘭圖

春妍帶雪圖

江村秋晚圖

題饒世英所藏錢舜舉四季花木

海棠

黃蜀葵

芙蓉

家茶

題趙師舜所藏雪竹圖

題饒世英所藏孤鶴圖

贈朱萬初

四首

卷之八

雪後偶成

二首

自贊題白雲求陳可復所寫像

築室

客有好仙者持唐人小遊仙詩求予書之

惡其淫鄙別爲賦

五首

子昂竹

子昂蘭石

夢蟾圖

唐五王出遊圖

八駿圖

射獵圖

二首

題白玉蟾像

題大別山柏圖

答趙秉彝送地黃膏

酬張用鼎

題關尹問道圖

中秋前偶賦 四首

次韻答魯子暈叅政

題赤城站壁

又和赤城壁韻

秋夜有作

玉龍圖

郭熙画木

浙西提舉陳衆仲以其省之命請考秋試

其還也賦此贈之 五首

贈閒白雲

無題

題亡弟嘉魚大夫與眉山奴詩後 二首

書蘭亭後

題黃敬申虎圖

聞機杼

賦玉簪花 四首

溪橋踏雪

奉答吳仲谷見寄兼簡許愿夫 三首

賦范德機詩後

題文丞相詩後

次韻陳溪山春日卽事 三首

題呂洞賓見滕子京像

題魏受禪碑

崇仁邑士吳景永客授齊安寓定惠院書
來報寺之海棠東坡所爲賦詩者今二

百五十餘年枝萼復盛住山明月溪增

葺坡翁舊寓并錄所賦爲寄偶成三章

答之并呈幹公克莊部使者云

次韻東山鳳栖別墅四時詞 四首

臨川艾蜚英茂才求書北游京師荒山久

病筆墨盡廢偶有近詩二首寫寄 國

史侍講祭酒先生數千里外一笑契舊

有同在者共一看之亦知衰朽託庇無

恙也 二首

和陳溪山韻 二首

題樓攻媿織圖 三首

送程以文兼柬揭曼碩 三首

西郊草堂圖爲從子豈作 四首

至正改元辛巳寒食日示弟及諸子姪 二首

寄成都孝成姪

寄吳門弟姪

寄子安民從子宣

癸酉歲晚留上方觀 四首

葵榴雙鳧

題明皇按舞圖

題昭君出塞圖

題陳氏遠塵樓

偶成 三首

桂亭 二首

田舍

題漢孝宣受貢圖

荅饒心道 四首

題約牖爲譚無咎賦 四首

別變玄圃後重寄

聞變玄圃除御史

變玄圃除御史後寄蕭往淵巡檢

題趙子固梅

古檜

題夢良梅

留易小雅樓促陳溪山同飲

和陳溪山櫻桃

補遺

留題龍門寺 四首

題周怡臨韓幹明皇出游圖

明皇出游圖

端午賜大長公主

董元夏景山日待渡圖

徽宗画梨花青禽圖

趙千里小景

燕文貴小景

趙千里出峽圖

蘊能羅漢圖

白樂天重屏圖

陳闔画中宗射鹿圖

羅漢圖

韓幹馬

曹霸下槽馬

韓晉公滉土星像

柯博士画扇

胡虔取水蕃部圖

滕昌祐蘂香睡鵝圖

虞伯生詩目錄終

國家圖書館, NATIONAL CENTRAL LIBRARY, TAIWAN, R.O.C.

虞伯生詩卷一

明虞山 毛晉子晉 訂

味經堂詩

有序

國子祭酒魯公伯子暈父作味經堂自爲
記以勗其子遠公嘗命遠從予遊故賦此
詩

維昔玄聖有子過庭學禮學詩詔之丁寧面牆之
室絲不知味親能使學不能使嗜觀于德容聽于
德音詠歌周旋實悅我心邈乎千載聖往言在舍

而不求匪往斯殆畏友輩父窮經篤行既有諸躬
思貽厥成既菑既畚俾稼之食既畋既漁之
實作堂高明曰子遠來吾經在茲遠其味之始予
虛■匍匐來食茹草飲水以禦朝夕窮人得歸自
我父師俛焉斯文老至不知煌煌靈芝如彼嘉玉
薄言采之在彼中谷南陽之人來詹來言君子豈
弟宜其後昆

題宋誠甫侍郎垂綸亭

岷源建高駛無游舠漢會其委安流滔滔爰有君

子垂綸其下雖不得魚意甚閒暇援藟引楫至于
中沱蔭樹以休悠悠永歌逝波汙汙不轉維石樂
茲忘憂矢言不食烝然雲興風舉以高駝翔中天
遺景九臯木其落矣魚亦潛渚睠言夙好除于風
雨風吹衣裳彼爲栖栖行吟望予寔勞我思山有
榛棘河有鯉鯉豈其飲泉必冷之美君子冠純秩
秩大經洞有清酌可以濯纓

高彥敬青山白雲圖

兩崖之間曾不容舠白雲悠悠與山俱高

趙忠簡公祠堂詩

皇元至順三年春解州聞喜縣學用禮部
符祠其鄉先生故宋丞相趙忠簡公公六
世孫國子博士篔翁求虞集作迎送神詩
山河邈悠宗國爲虛騎箕來歸懷此故都鳴梟在
樹飢鱷在渚閔宮不存公食無所董澤之陂有蒲
與荷子孫具來式燕以歌瞻彼洛矣其水泱泱斯
文在茲俾也可忘

秦檜旣貶趙公於海南隨使人逼殺之公

臨終從所寓寺僧索素帛一方書其上云
身騎箕尾歸天上氣作山河壯本朝以付
寺僧而絕聞喜之董澤公鄉也

賦衛節婦王夫人

汎汎淇水岍有佳竹閨門巖巖樂爾貞獨泛泛淇
流岍有松舟閨門間樂爾貞幽汎汎淇右有堂
孔阜娟娟貞幽肅肅眉壽淇原有泉可濯可沿亨
鬻勺尊樂爾高年高年樂止亦有孫子式歌衛風
以告國史

題學易齋

其人將詣孔林

惟學易君子慎其齋居動息有存起處是於奇耦
玩畫方貞視圖書循靜始夜根動初罔不在中日
居月諸乃秉元化以時盈虛共惟玄聖啓我後愚
載瞻巍巍魯林鬱如

諼草生竹間

諼草生竹間翠色相綢繆美人欣有託君子故忘
憂昔聞有鳴鳳飲水來丹丘不食衆木實樂只淇
園秋

高竹臨水上

高竹臨水上幽花在崖陰以彼貞女姿當此君子
心春陽不自媚夕露忽已深湘妃昔鼓瑟悵望蒼
梧岑

月出古城東

月出古城東海氣浮空濛車騎各已息宮闕何穹
窿牧馬草上露吹笳沙際風帳中忽聞鴈傳令鼓
雕弓

書上京國子監壁

神京極高寒幽居了晨夜雷風無時發零雨每飄
灑炎光不到地蕭爽度長夏大化漠無宰豈必事
陶冶楊雄不曉事守道栖栖者玄經百無徵白髮
謾盈把

至治壬戌八月十五日榆林對月

日落次榆林東望待月出大星何煜煜芒角在昴
畢草樹風不起蛩蝩絕啁啾天高露如霜客子衣
盡白羸驂齷餘棧嫠婦泣幽室行吟毛骨寒坐見
河漢沒驛人告晨征曛曛曉光發

憶三十年前與元復初參政同賦秋日梨花
元有句云朝食葉底梨莫看枝上花而忘其
後句因續之云

朝食葉底梨莫看枝上花花開食實後霜風振長
柯遠水良可鑒彩雲亦易過念爾白於雪日莫當
如何

李老谷

十轉山崦交九度沙磧溜始辭平漠曠稍接山木
秀老病畏行役慰藉得良靚秋嶺晚更妍寒花晝

如繡故園夫如何朝陽眩霜袖

秦定甲子上京有感次韻馬伯庸待制

翰音迎日轂儀羽集雲路寂寞就書閣老大長郎
署爲山望成岑織錦待盈度我行起視夜星漢非
故處

賦水木清華亭

中流泛蘭柁望彼嘉樹林落日蕩野水浮雲生夕
陰游魚戀芳藻好鳥鳴幽岑爲樂恐易老吾將脫
朝簪

天曆戊辰前續詠貧士一首

目昏畏附火枯坐寒窗中破褐著絮重虛豆兼冰
崇病骨於此時浮屠屹撐空呼兒檢餘曆記日待
春風雖欣解凍近翻驚紀年窮貫酒欲自廣無錢
似陶翁

又一首畬舍弟見和

蜀侯昔罹憂嶺海萬死中詩書庶不泯焉思祿位
崇爾來五十年所以恒屢空涉世惟信道卓然立
顏風漫仕非我能偶貧豈人窮深耕定有獲歸歎

兩衰翁

後續詠貧士四首

老骨寒不寐夜長況聞風心悸危欲折跼踖敗絮
中雞鳴當晨參馬疥芻不充山童衣百鶉喚之愧
匆匆求火掃木葉庭樹亦已空決起不敢怠曙光
屋南東苟遂牛馬性歸放春草豐

又

歸蜀越關隴棧閣危登天適越河濟隔堰水丈尺
間飢寒迫旦暮舟車計茫然東家有一叟欲去初

不言早朝聽詔畢喚馬閭闔前童奴受宿戒向暖
爭相先聞之嗔兒子我何爲汝牽屨無千金賈吾
足安暇憐

又

爲政貴察色讀書在研覃司視旣不明兩者無一
堪尚不遑吏責爲師固宜慙聖世無棄物況茲久
朝簪決去豈我志知止亦所諳頗聞南山下菊根
浸寒潭濯餌千日期冰臚復清涵老馬果識道更
服鹽車驂

又

天風夕號怒霜日殊清妍探架得古書前日手所
編奈何視茫茫字若萬蟻緣精意成寂寞惆悵還
棄捐於惟仲尼衰清夢不復然小子未聞道何以
卒歲年

觀花有感

掛巾花樹枝酌酒花樹下風吹巾上塵花落手中
竿清唱起相壽母遽且聊暇流光急去人莫怪行
樂者

赤城館

雷起龍門山雨灑赤城觀蕭騷山木高浩蕩塵路
斷魚龍喜新波燕雀集虛幔開戶微風興倚杖衆
雲散

同閣學士賦金鴨燒香

黃金鑄爲鴨焚蘭夕殿中窈窕轉斜月逶迤動微
風綺席列珠樹華鐙連玉虹無眠待顧問不知清
夜終

退直同柯敬仲博士賦

月下白玉階露生黃金井疎條栖鵲寒衰蕙流螢
冷戀闕感時康懷歸覺宵永晨鍾禁中來白髮聊
自整

送良上人賦得井上桐

桐陰秋轉薄井氣曉爲霜交柯舞幽鏡墮葉響鳴
璫高巢翠羽下澄水玉蚪藏上人從定出行吟繞
石床

送吳子高

懷寶獻京國悼亡還獨歸日落雲中樹風吹江上

衣湘靈瑟在席織女石支機遠道多寂寞強飯勿
相違

于仲元舍賦紅梅

白雪不成夜丹露遂崇朝妙質承日映飛英向風
飄醉來紅袖近歌罷彩雲消揚州問何遜何似董
嬌嬈

寄題新冶亭

窈窕冶亭莫蕭條江南秋泛覽山河外張樂鳳皇
丘公子飛翠蓋美人回綵舟從茲至黃髮樂哉以

忘憂

題儋耳東坡載酒堂

翳翳儋耳城歷歷桄榔樹百年遺故丘新堂設賓
乍清風海上至朝陽在庭戶丹山五色鳳覽德屢
來下甘辛熟桂酒羅列雜諸蘋苻黎多孫子食飲
祭先具蛟龍波浪深歸來風雨除

又

鑿井得甘泉渴者恒自私流潤不擇地委順復何
疑海南絕風雨水木況華滋鄰舍解讀書諸生還

誦詩何必懷故都聊樂宜在茲星河度白鶴山月
懸蛾眉來晚去何速勞人千載思

盜發亞父塚

彭城有盜識寶氣於亞
父塚上發之得一劍云

盜發亞父塚寶劍實累之塚開寶氣盡獄吏書盜
辭盜言惟見寶寧知亞父誰項王不相信弟子遂
輿尸黃腸下深錮千歲復何爲大河繞城東落日
在城西過客立城下踟躕望安期

應制題王拙畫吳王納涼圖

雨過太湖上風生響屨廊紅綃拂几席白紵製衣

裳朱光淪厚地明月在高堂何以保玉體長年樂未央

步虛詞四首

步虛長松下流響白雲間華星列燿火明月懸珮環肅然降靈氣穆若愉妙顏竹宮愴清夜望望久乃還

又

稽首望太霞離羅間層霄網縕結冲氣要眇出空謠前參千景精後引務猷收攝衣上白鶴招搖事

晨朝

又

朱光出東海高臺迎赫曦六龍獻陽燧九鳳保金支鍊丹軒轅鼎濯景崑崙池拜賜冰玉佩玄洲共遨嬉

又

學仙淮南王問道劉更生三年鍊神丹九載凌上清日月作環珮雲霓作旆旌回首召司命靈雨灑蓬瀛

題商學士畫

方士好服食商山多紫芝采之長松下濯以清澗
漪滄涼百里內秦皇都不知駕舟載男女築宮東
海涯

贈藝監小吏

廣術何迢迢榆槐蔭蔽之鼓鍾晨莫起車馬中間
馳此有嫠居者閉戶教孤兒十歲學文史十五從
吏師丹青出天性落筆有令姿藝監取材伎小大
無一遺署兒筦庫下祿薄不足爲手持一束書求

以慰母思告兒勿薄吏公卿出自茲請看孟氏里
軻母自有祠

記子昂畫

春風動蘭葉庭戶光陸離言收竹上露石角掛練
衣車行不擇路芣苢何楚楚遊子憺忘歸徘徊歲
云莫

送西臺治書仇公哲

陝郊得時雨生意始來復存者事稼穡還者葺牆
屋安知凋瘵餘政可致新福闢除正廣術區井表

深瀆均齊定恒志忠厚保敦篤豈無憂世士受仕
在芻牧爲義苦多違好名常不足治書肅將指善
類庶有勗

送張道士歸上清

白雲盱水上自古多仙人手攜綠玉杖頭戴白綸
巾袖中出風雨天上禮星辰歸來庭戶靜芳草自
生春

日出行

日出上城府日莫當蚤歸城門已擊柝出郭何焉

依下馬投館人空垣月當扉涼風振庭樹巢鳥屢
驚飛起坐搔白髮忽如霜草稀周公不復夢仲尼
故沾衣老萊有孺色傳聞惟食薇求之事已晚徘徊
行道微

贈治冠者

車馬入隘巷言尋治冠師反關不受客高坐哦書
詩布衣不掩脛晝食甘藿藜冠成動經歲不售亦
不辭我少好文章把筆無不爲愧爾爰寂寞慎與
當自茲

贈寫真佟士明

佟郎居上京閱人如風花拈筆寫其似千歲留英
華邇來七十年將相紛在目來者有如此往者那
可續昔我初北遊面白髯如鴉點染煩粉墨華星
映丹霞今如雪中松苦硬雜蒼白却視當年容邈
如不相識不識當如何臨風且長歌黃雲接河漢
白雪漫陂陁乞身願歸老吳蜀山總好贈君千黛
螺翠色秋可掃

寄陳衆仲助教上都作

學省足清晝詞垣驚蚤秋美人隔河漢落月在高
樓持衣未成曲吹笛不勝愁還趨鳩鵲觀別製鷓
鷃裘

贈鐵庵道者二首

昔遊雲臺觀山色上衣青松花春雨落栢葉秋露
零飢來煮白石睡起看黃庭人間忽已老莫問少
微星

又

海上別妻子山中求茯苓白虎戲玄渚蒼龍護黃

肩燒香招五老行廚庖六丁從子似非遠丹霞粲
華星

題商德符華山圖

昔祠雲臺館行穿御階栢夕陰嵐氣深重碧照行
客獨訪張超谷漸覺巖險迫冰生玉井頭日射仙
掌側豈無鐵鎖懸翻身若飛鶻恐煩華陰令不奈
昌黎伯王事況有程車馬何忽忽流觀終南山周
覽天府國爾來十七年欲往不再得山河想邈悠
傷殘轉蕭索摩娑商老圖彷彿希夷宅高哉蓮華

峰白雲澹秋色

寄幻庵主者

朝遊武夷麓莫入匡廬岑放舟臨野水採藥過幽
林清泉磨寶劔磐石鼓瑤琴臘月歸溪上還作蚤
春吟

賦茅山道士雲松巢

昔年李太白廬山思結巢寒雲自天上和鶴止松
梢道士潘間遠高居古大茅誦經門臥虎看劔石
眠蛟飛步脫鳧鳥長吟吹鳳匏九江攬秀色許爾

作神交

酬上清道士鈔陰何詩

殘雪松上落輕冰硯裏生
寫詩過夜半歌枕又天明
少陵愛何遜太白似陰鏗
不愁勞弱翰亦足助高情

題李漑之學士白雲半間

山中多白雲何由到城邑
招之恐不來欲攬遽無迹
栖檐候晨光納牖作秋色
用沖不爲盈常住寧若客
分張任蒼松散石日照香
爐峰月射

仙掌側有恩封一鄉與子當共食

題浴日觀

煌煌赤老烏三浴乃出海
波濤始晃濛宇宙破冥昧
西登泰華顛東望方丈外
稽首希夷翁今晨良慶會

爲范尊師賦雲林清遊

大茅千仞下結屋三四楹
雲林戶牖潤鶴去海天
平坐上發長嘯人間聞玉
笙斲苓春霧重煮木晚
烟輕綠室嘘丹氣蒼崖受
日精樵遺伐木斧真降

引霓旌九鼎金還就千齡樹不傾問誰解居此云
是范長生

吹笛圖

白雲悠悠去長松披高丘匡坐吹笛人似是馬督
郵飛鴻遺哀響幽泉發春流女樂亦何有消搖以
忘憂

送甘以禮調官歸鄉

甘君有良材於政無不宜白頭郡縣下尚覺非所
施奈何筦庫冗而可絀吏師豈直名吏師積學本

書詩高情抗浮雲廉節濯清漪君子安所遇固無
喜慍辭嗟我忝從官簪筆恒殿帷竟無國士薦徒
稱故舊知晚歲向田里藜杖相追隨尊酒以怡老
未爲負明時

送李彥方閩憲

文監李公彥方出貳閩憲同朝群公皆賦
詩以爲贈彥方屢擢臺職激揚之宜有不
待予言者適有一事深有感於愚衷先正
魯國許文正公實表章程朱之學以佐至

元之治天下人心風俗之所係不可誣也
近日晚學小子不肯細心讀書窮理妄引
陸子靜之說以自欺自棄至欲移易論語
章句直斥程朱之說爲非此亦非有見於
陸氏者也特以文其猖狂不學以欺人而
已此在王制之必不容者也閩中自中立
之歸已有道南之歎仲素愿中至于元晦
端緒明白皆在閩中不能不於彥方之行
發之去一職吏治一弊政不如此一事有

以正人心儒者之能事也集臥病目眚尤
甚援筆書此云

七閩去天遠顛連苦無告牧人受深寄昧者覆爲
暴犀象雜金貝飢渴劇飮膏大言相鄙夷壓奪心
自校豈無循廉吏實病黑白撓聰明屬旒黈聽瑩
資所到李侯金閨彥圖史擅讎校晨聞大夫奏夕
理武夷棹君子慎修職寧適豐廩稍蕉荔甘多毒
薑桂老堪芼所懷延平翁揚休似明道授受有源
委精微足深討言立聖如在表正愚可造師匠久

不與真妄如枘鑿云何誚支離肆誕長兇傲異言
古所誅末學足深悼閩雖在海隅前聞此淵奧正
誼從簡編良俗宜善導贈言不及他持此永爲好

題鄭秀才隱居

陶翁昔好菊荒徑不暇鋤素琴■無絃名酒亦屢
虛雖有二三子薪水不讀書淒涼千載下高名將
焉如不如鬼谷洞鄭子樂有餘種菊以爲田田中
更爲廬善藥不二價詠觴送居諸有子揮五絃涼
風在庭除時來青田鶴亦出濠涕魚昨者遊京師

侯門曳華裾捧檄忽一喜翩然告歸與芳蒲采甘
露玉漿釀清醕老父在堂上稚子具籃輿晨遊南
山陞暮濯清水渠席間撫猗蘭房中詠關雎以此
得高壽何必南陽居

題朱邸竹木

猗猗淇園竹結根磐石安枝幹相扶持風雨不可
干其實鳳所食君子思保完恒恐聲影疏蕭條霜
露寒金玉慎高節千載承清歡

詠史

軒后邈已遠漢武亦雄哉荒忽九州外百年過煙埃
變化庶長久臨海築層臺黃金靡鏤飾喬林摧斷
裁樂通竟先死孫卿殊未回不知作者意空令來者
哀奉盤泣繁露馳道殷奔雷志氣昔所在風雲恒往來

畫古木

荒郊臥蒼苔蛟龍在其上不知風雨來垂影一千丈
後主撥鐙法江南久寂寥空令沒骨畫容易媚中朝

賦蘇伯修滋溪書堂

滋源恒伏流春雨川乃盈林疇廣敷潤草木俱繁榮
臨深見遊儵仰喬有鳴鶯君子樂在斯齋居托令名
積學抱沉默時至有攸行抽簡魯史存采詩商頌并
禹穴追馬公湘江歌屈生紉蘭不盈握伐木有餘情
浩然欲浮海歸興還濯清方舟我爲楫白髮愧垂纓

題薛外史瓊林臺

高臺積方石瓊林樹交柯晨光眩白雲夕景纏紫

蘿每聞樵子唱恐是仙人過塵世在足下豈能聞
笑歌過海祇騎鶴開池還養鵝外史政瀟灑太白
鳥足多

送張兵部孟功巡河分題得屋上烏

花發上陽春門開未央曙城柝起群栖流光散朝
羽息影須近檐結巢願當戶輓轡轉金井終日灌
嘉樹

題彭澤陶氏家譜

百甕在戶外五柳當門前燕去王謝宅人依墟里

燭述德尚千載人情猶昔年以安遺孫子高哉爲
世賢

虞伯生詩卷一 終

國家圖書館 NATIONAL CENTRAL LIBRARY, TAIWAN, R.O.C.

虞伯生詩卷二

賦洛川老人九十

洛川老人年九十鬚眉如畫身玉立錦袍金帶方
烏巾手挽強弓無決拾八月平原秋氣高聞有狡
獸依蓬蒿清晨上馬薄暮返累騎毛血懸韃橐身
是前朝將家子生逢太平百無事都將英氣化高
年何物小兒堪指使太守上言朝有恩束帛養牛
兼上尊洛川老人過百歲擊壤爲歌傳子孫

張令鹿門圖

張侯襄陽人深知襄陽樂十年宦學懷襄陽故托
豪縑寫山郭老我不樂思蜀都人言嵩陽好隱居
三十六峰常對面水竹田廬還可圖欲往不能心
燥燥忽見新圖被山惱沙禽浦樹俱可人金澗石
床爲誰好向來耆舊皆英雄駕言從之道焉從弄
珠月冷識遊女沉劔潭深知臥龍八月霜晴水清
淺聞道扁舟足迴轉何時古寺傍檀溪幾處殘碑
在江峴呼鷹臺高秋草多養魚池中蓮芡波蜀嵩
未必不如此我今不遊奈老何張侯張侯蚤結屋

莫待史詹爲君卜要看壠上課兒耕好在漁梁白
沙曲

子昂画馬

憶昔從公侍書殿天閑過目如飛電池邊儘有吮
豪人神駿誰能誇獨擅公今騎鯨隘九州人間空
復看驊騮惟應馭氣可相逐黃竹雪深千萬秋

湛湛行

湛湛天字玄以黜星白如銀垂近人牛羊散漫草
多露大帳中野傍無鄰去年八月羽書急婦女上

馬小兒泣今年八月天子來身屬橐鞬月中立

家兄孟脩父翰賦南還

大兄五月來作客八年不見頭總白五人兄弟四
人在每憶中郎淚沾臆我家蜀西忠孝門無田無
宅惟書存兄雖筦庫實父蔭弟竊微祿承君恩文
章不如仲氏好叔氏最少今亦老五郎十歲未知
學嗟我何爲長遠道諸兒讀書俱不多又不力耕
知奈何憂來每得二三友看花把酒臨風哦蜀山
嗟峨歸未得盤盤先壠臨川側碧梧翠竹手所移
應與青松各千尺南風吹雪河始冰兄歸烏帽何
眾眾明年乞身向天子共讀父書歌太平

子昂墨竹

吳興画竹不欲工腕指所至生秋風古來篆籀法
已絕止有木葉雕蚕蟲黃金錯刀交屈鐵大陰作
雨山石裂蛟龍起陸真宰愁雲暗蒼梧泣湘血吳
興之竹乃非竹吳興昔年面如玉波濤浩蕩江海
空落月年年照秋屋

商德符画幽篁古木

湘君宮在洞庭湖幽篁古木龍所都石壇雨長碧
苔蘚水屋風動青珊瑚老人歆枕看螻蟻嫠婦停
舟聽鷓鴣江南蜀道問來往商公商公今有無

吳郡陸友仁得白玉方印其文曰衛青臨川
王順伯定以爲漢物求賦此詩

將軍騎從公主時豈意刻玉爲文章珠襦已隨黃
土化此物還同金鴈翔軍中只識長平侯西風木
葉茂陵秋人生卑微何可忽碌碌姓名誰見收
爲達兼善御史題墨竹

荒涼多古木篔簹千尺相因依小年慣見今
白髮杜宇愁不歸老可嘗作陵州守古墨蛟
龍多人手春雷每恐破壁去神鼎空令夔魅走丹
丘越人不到蜀修葉何以能縱橫內府人家爛熳
寫使可見之心亦驚江南御史龍頭客暫別那能
不相憶知君深識篆籀文故作寒泉溜崖石

画鶴

薛公少保昔画鶴毛羽蕭條向寥廓通泉懸壁久
微茫故物都非況城郭長鳴闊步貌閒暇解寫高

情亦竒作田中芝草日應長石上松花晚猶落赤
壁江深孤月小白雲野迥秋霄薄群帝相從絳節
朝八公許製黃金藥誤嬰塵網跡易迷移召中洲
夢如昨借懸素壁憶真侶忽有微風動林壑碧虛
寥寥積雪高直過蕭臺絕栖泊

題畫

棠梨生竹間牽牛引蔓相因依晨華墜露天水碧
斷蘚絡石爛斑衣鷓鴣踏枝歲將莫蟋蟀在戶人
當歸蕭條落墨人間稀蕭條落墨人間稀

寫廬山圖上

憶昔繫船桑落洲洲前五老當船頭風吹雲氣迷
谷起霜墮楓葉令人愁高人祇在第九疊太白一
去三千秋石橋二客如有待裹茶試泉春岩幽

題旦景初僉司畫

旦公山堂城東南畫圖古檜何毵毵城中無山有
山癖直藉豪墨窮幽探旦公彈琴古檜下鬱鬱窗
戶生晴嵐春雨時來鶴鳴谷秋聲夜作龍吟潭先
皇晝坐群玉府內使趣召飛雙驂畢宏韋偃出中

祕營丘北苑開滕緘是時旦公主舒卷一二文士
相交參旦公歸來坐成想亦頗拈筆爲楸楠伯熙
奉詔每有作礪礪相並將無慙嗟予懷歸亦已久
摩挲老目百不堪山中豈乏真偃蹇可容白髮抽
朝簪

題柯敬仲畫

予先世居隆州州治之後山石室翁守郡
時隆爲陵州州事簡時來就吾家拾故紙
背作茅蘭竹木之屬所得頗多吾幼時尚

收得數紙今亦亡之丹丘生用文法作竹
木而坡石過之近又以新意作墨花甚妙
從子悅有眉山學官之行丘爲作此予愛
而賦之

昔者老可守陵州守居北山吾故丘太守時來看
山雨每画紙背成滄洲老蒲松煙色過重揮霍陰
崖交劔矛百年離亂亡故物敝篋江南誰復收新
圖篔簹枝葉修使我不樂思昔侯碧雞祠前杜鵑
叫玉女井上叢篁幽棠梨樹高青子落碧花翠蔓

縈牽牛楊雄無家不歸老蠨蛸蟋蟀寒相求丹丘
先生東海客何以見我空山秋蕭條破墨作清潤
殘質刊落精英留陂陀重複分細草山石縈紆生
亂流眉山學官莫厭冷言歸故鄉非遠遊石田茅
屋倘可得萬里欲上東吳舟百花潭深濯新錦持
報以比珊瑚鉤

白翎雀歌

烏桓城下白翎雀雌雄相呼以爲樂平沙無樹托
營巢八月雪深黃草薄君不見舊時飛燕在昭陽

沉沉宮殿鎖鴛鴦夫容露冷秋宵永芍藥風暄春
晝長

敬仲畫扇

松根伏令如石髓服食令人壽千歲子欲求之觀
此圖老身偃寒枝扶疎長鑱篝火新雨霽羽人丹
丘期不至却剪蒼筤崖石間吹作龍吟秋滿山

題簡生畫澗松

簡生與我皆蜀人留滯東南凡幾春每拂齊紈作
山水使我感慨懷峨岷如此長身兩松樹滿谷悲

風散陰霧雌雄如劍變爲龍鱗鬣齊成擘崖去祕
閣嘗觀韋偃圖蒼潤雄深世所無默識形神出模
畫把筆莽蒼增嗟吁玉堂寶書本同館官府旣分
難復見摩挲新墨慰衰朽鬢雪飄蕭數開卷昔我
樵牧青城山坐起政在雙樹間當時簡生若相見
應并寫此聽潺湲劉郎集賢好賓客好著幽窗對
晴碧凌靈爲我哦七言有鶴飛來破秋色

題李受益承旨作東平章萬戶繼志堂後

將軍腰間黃金符父兄功成百戰餘太平不復事

弓馬秋雨高堂聞讀書門有喬松墓有草永言思
之願終保幙中賓客誰屬文東魯儒生國元老

題柯博士畫

磯頭風急潮水長蒹葭蒼蒼繫魚榜青山一髮是
江南白頭不歸神獨往幽篁繞屋茅覆簷木葉脫
落秋滿簾買魚沽酒待明月定是黃州蘇子瞻子
瞻文章世希有謫向江波動星斗夜投斷岼發清
嘯栖鶻驚飛怒蛟吼圖中風景偶相似欣然揮洒
春雲開子瞻應是念鄉里還化江東孤鶴來

題高彥敬尚書趙子昂承旨共畫一軸爲戶部楊侍郎作

不見湖州三百年高公尚書生古燕西湖醉歸寫古木吳興爲補幽篁妍國朝名筆誰第一尚書醉後妙無敵老蛟欲起風雨來星墮天河化爲石趙公自是真天人獨與尚書情最親高懷古意兩相得慘淡酬酢皆天真侍郎得此自京國使我觀之三歎息今人何必非古人淪落文章付陳迹

題灤陽胡氏雪溪卷

去年予與侍御史馬公同被召出居庸未尺東折入馬家甕望縉山度龍門百折之水登色澤嶺過黑谷至于沙嶺乃還道中奇峰秀石雜以嘉木香草輦道行其中予二人按轡徐行相謂頗似越中但非扁舟耳適雨過流潦如奔泉則亦不甚相遠郭熙畫記言畫山水數百里間必有精神聚處乃足記散地不足書此曲折有可觀恨不令郭生見之灤陽胡太祝乃以雪溪自

號豈所見與予二人同乎然灤水未秋冰
已堅尋常已不可舟況雪時耶當具溪意
云耳因爲賦詩云

積雪平沙陰山道射虎殘年不知老豈識船如天
上坐翠竹爲帷樹爲葆昔乞鏡湖苦不早白髮如
絲照清潦它年此地若相逢應著漁蓑脫貂帽

題楊友直檢校所藏李營丘枯木圖

老龍出海蒼髯鬚營丘枯木天下無回枝屈鐵墮
崖雪澗底應拾青珊瑚明堂清廟要梁棟朔風吹
沙澤腹凍老身不用歎遲莫按圖來求萬鈞重

題詹圃老梅圖

鄉人共識古梅樹移植詹亭仍百年計時當生宣
政前僻遠幸遺花石船昔僑寶唐尋故物石樓嗟
峨白沙白陵陽慈竹樂公移根節相扶俱遠客此
樹乃在鄰邑間看花食實真足間人言支離故多
壽我意培植茲惟艱華蓋高人世師表爲爾賦詩
歌窈窕詹家孫子多讀書早晚春雷化龍矯

酬蕭侯送蒲萄

蕭侯昔致蒲萄苗山童不灌三日焦宛西上品復
 親手種窗南自澆水一月當生一尺長移向江
 頭薜荔牆
 舉囊石壓青霞漿是
 時蕭侯當走馬來訪
 酒酣舞劍傾一
 尊不信金盤露如瀉

題袞塵騮圖

驂騮食粟石每既立仗歸來汗如洗脫羈展轉聊
 自恣落花塵七隨身起君不見春雷起蟄龍欠伸
 霧擁雲蒸九河水

林臯亭

九月天氣蕭鶴鳴在林陰使君甚好客來者總能
 吟紅樹秋山近黃華夕露深鄰翁八九十有酒卽
 相尋

題子昂長江疊嶂圖

昔者長江險能生白髮哀百年經濟盡一日畫圖
 開僧寺依稀在漁舟浩蕩回蕭條數根樹時有海
 潮來

挽胡伯恭令尹二首

二十南陵簿才名舅氏同千金劍客散一棹酒船
空朱紱稱循吏安輿已病翁神明盡今日嘆惋謾
群公

其二

病起思歸日齋居臥治時抱孫方在膝反席遽如
遺江路牽愁遠坊門望到遲遙怜賢弟哭未忍老
親知

題雪谷曉行圖

踏雪度嶙峋霜髯跨玉麟前瞻那有際後至豈無

人松樹紛紛老梅花的的春金烏海底出遍界爛
如銀

送先隴二鄰僧還吳二首

闌若背山陰松筠夾逕深門間容虎臥湖近聽龍
吟雨過泉添澗風飄磬出林衲衣皆舊識一一謝
幽岑

又

東崦憶招提幽尋日未西過山隨虎跡倚石待猿
啼雲外催歸錫松間覓舊題十鄰吾欲老母惜伴

扶藜

節婦王夫人劉氏

中丞在清淳古道存節高賢女弟文托外諸
孫慈竹宜家慶桓楹表國恩燕秦鬱相望美俗繫
人門

次韻阿榮存初參議秋夜見寄

寓館城門夕高秋雨露開天垂華蓋近月轉紫垣
來疏闊思良會淹留到不才深期謝安石揮塵散
風埃

雪谷早行

積雪擁柴門行人稍出村溪頭或遇虎木末不聞
猿接棧迴山閣支橋就樹根駟車上重坂回首見
朝暾

雪岩樓觀

高閣丹青起中天紫翠分窗當大白雪門俯九疑
雲伐木山人去吹簫帝子聞塵中歸未得春思轉
紛紛

送人之劔閣倅

往年登劔閣快馬著春衫設險懷前賦磨崖覓舊
劔鄉人遊雪界郡倅試冰銜歸道觀新政春江不
掛帆

寄子山尚書

竹色侵衣碧重簾雨氣深白鵝翻墨沼紫燕入書
林北海春尊側西山夕閣陰東曹公事少歌舞散
黃金

漫興

雨閣添衣潤風簾隱几高白頭更事少病日向書

勞南客傳音信東家問酒醪江邊茅屋破歸楫若
爲操

送張尚德

史館薦張尚德爲檢閱官朝廷以爲宜稱
可其請未奏也有司以闕簿注新進士尚
德頗有聞卽斂裳宵逝噫進退若是可以
信史館之薦人矣予力雖不足以留之亦
終不敢失之也故作是詩以餞之

六月初聞雨官河潦水生江南歸宋玉稷下謝荀

卿鵬鸚青霄迥蒹葭白露盈都留詩興在來聽上
林鷺

寄丁卯進士薩都刺天錫

鎮江錄事宣差

江上新詩好亦知公事閒投壺深竹裏繫馬古松
間夜月多臨海秋風或在山玉堂蕭爽地思爾佩
珊珊

送趙繼清令尹之官安陸

雲夢開七澤陪尾貫連山爲政煙塵表吟詩松竹
間故人總華要令尹獨清閒文學偏宜老毋愁鬢

髮斑

明皇按樂圖

新度霓裳曲三年教得成驚鴻渾不下飛燕若爲
輕芍藥春亭莫夫容野水生黎園多白髮吹笛到
天明

送長沙守

白髮長沙守循良又好文近辭金馬去遠有玉魚
分對竹聽湘雨開簾看嶽雲漢庭思賈誼一飯莫
忘君

送趙編修祀西嶽江瀆

西道祠官去東風入旆斜
汾陰已歸鴈江水正飛
花歲事聞宜穀鄉人喜過家
老來思故里欲寄使君車

代衆仲作

昔在泉州住將軍每見招
春雲山對屋夜雨水平
橋池鴨穿荷葉溪魚上柳條
禁城鐘鼓起車馬晚蕭蕭

題宋雲舉太常臨汾二節婦序後

許氏姪從姑相承患難餘
自傷還自誓同志復同居
白髮冰霜共丹心鐵石如有關
名教重珍重太常書

送王照磨之官雲南

遺廟珍珠浦歸舟熨道溪
飛鳶愁暑雨走馬畏山泥
官署尊丹鷲祠官勝碧雞
題詩遠相送紅日五雲西

玉堂燕集圖

朝廷多暇日別館又青春
薄醉猶催酒清歌況有

人玉堂金硯匣翠袖白綸巾老去渾無賴憑誰爲
寫真

寄荅桂風子先生

深隱廬山裏題詩忽見存風高應跨虎月落更聽
猿酒熟邀皆去丹成笑不言雲屏第九疊相與浴
晨暎

寄莆田先生

懸榻塵生席深居晝下帷齊眉安饋食擁髻近歌
詩藥裏須鍾乳書題憶荔枝白頭吟更苦何必蜀

人思

鄭谷圖

道士徐太虛生紙畫山居林壑春煙裏桑麻夜雨
餘過橋九節杖連屋一床書似是子真谷歸耕三
月初

畫檜

茅山多古樹此檜更長生鶴鶴棲來穩蛟龍化得
成雲深還近戶月落似聞笙千載如相見蒼然故
舊情

李貞嶠墨竹

河東李學士隨意放洋州月落亭陰迥雲生谷口
幽江濤空渺渺筆墨更悠悠瀟灑西清地令人憶
舊遊

爲歐陽少監題宋好古竹

幕中能寫竹作此雨瀟湘出石根還瘦臨溪影更
長班班稚子立一一鳳雛將日有長安使平安問
老蒼

贈楊友直

雒陽楊友直字儼漢中郎畫若錐穿石垂如雨漏
牆舞花羞女美醉草笑僧狂昨日鴻都學煩君寫
數行

題朱邸竹木

江上復春雨曾陰覆碧波石高龍影臥林迥鶴聲
過解佩倚蘭浦揚旂落木坡佳人翠袖薄日暮欲
如何

寄阿魯翬學士

問訊東泉老江南又五年涼風鳴步屨明月棹歌

船陪講長懷舊還朝獨後賢治平二三策蚤晚玉階前

赤壁圖

過鶴生新夢攜魚憶舊遊清霜凋木葉落月湧江流隱者時堪訪良田亦易求如何玉堂夜白髮不勝愁

題況肩吾縣令贈行卷

縣庭都禁謁祇許見諸生接壤皆興學遊民亦願耕絃歌居室迴山水畫圖清千載雲巖石能留令

尹名

送朱萬初之廣東照磨

聖主多清暇臨池愛日長天章垂鳳彩雲氣動龍香進諫慙簪筆爭書敢近床承恩君最蚤服玉向炎方

八月八日有感題視草堂壁

載筆趨芸閣探囊索縵袍坐銷秋日淨心折夜風高識字頭先白謀生計轉勞文園多病渴常想賜蒲萄

賦程氏竹雨山房二首

春雨過山竹幽泉繞舍鳴燕泥書帙晚魚浪釣絲
晴奉席從孫子連床總弟兄舊聞林下叟讀易到
天明

又

遊子聞春雨思親望故園竹間開几席花底注山
尊累世書連屋頻年稻滿村卜鄰淳朴地絕學欲
重論

戲作試問堂前石五首

試問堂前石來今幾十年衰顏空雨雪幽致自風
煙微醉寒堪倚孤吟靜更眠舊湖春水長誰繫釣
魚船

又

爲問堂前石何年別太湖春風神不王夜月影長
孤不中明堂柱空遺良嶽圖頗思嘉種木歲晚與
相扶

又

爲問堂前石何無藤蔓纏金蓮疑可致紫菊若爲

妍舊夢遺波浪間情閱歲年祇緣相識久親爲濯
清泉

又

碣石久淪海女媧曾補天乾坤遺蕞爾霧雨護蒼
然淬劍龍隨化彎弓虎自全昔賢多賦此誰賦最
流傳

又

爲問堂前石屢逢堂上人遠來嗟最久獨立與誰
鄰運載勞車馬摩挲識鳳麟鑿車書吉日追琢到

嶙峋

代石答五首

幸自鄰頑鄙毋煩問歲年當寒金作礪向暖玉生
煙眉黛無歸意毛群有叱眠涼州三百斛亦未醅
觥船

又

昔觀一柱觀還度幾重湖雪盡身還瘦雲生勢不
孤研穿鄴臺瓦賦就草堂圖芝閣玄雲在危踪敢
藉扶

又

牛角何堪礪蝸涎謾自纏沉冥辟邪古羞澀望夫
妍神物須清鑒靈根厲小年金輿曾共侍千載憶
甘泉

又

轉徙寧論地存留亦信天露盤危欲折劫火不同
然雒下殘經斷岐陽數鼓全向無文字托寂寞竟
誰傳

又

去歲留詩別嗟哉白髮人冠依子夏製居切左丘
鄰執籥充振鷺修辭綴獲麟終須愁坎壈勿用謂
嶙峋

送魯子暈廉使之漢中

封上頌臺禮輕車入漢中節毛吹渭雨木葉動秦
風把酒臺基石馳書歲事豐朝回倚西閣日日數
歸鴻

立春夜試墨

輕雪作春花飛來入鬢斜紫貂迎曉霧絳蠟炫晴

震書詔頻趨閣思歸卽借車幾時將稚子隨意踏
江沙

蜀人曲江之官贈以墨竹

粘筆寫琅玕清風入室寒蜀山空偃蹇海郡更盤
桓雲霧瓊簫遠冰霜玉節完莫忘鄉里意持向曲
江看

正月十一日朝回卽事

宮樹春陰合霓旌拂曙來天光臨閣道雲氣轉蓬
萊晝漏沉沉鼓晨尊灑灑杯香霖簾底霧樂殷殿

前雷祥瑞儀曹奏珎淳尚食催舞庭分鷺序效獻
過龍媒融雪微生草輕風不動埃老人南極至王
母上方回玉色何多喜金華得重陪裁詩賀新雨
西閣待門開

贈別兵部崔郎中暫還高麗卽回中朝

束髮來東海從軍護北門珠光連旭景玉氣達春
溫淵靜龍含德門嚴虎列屯從容叅幄帳慨慷屬
橐鞬拜表推黎獻趨朝謁至尊雲依溫室樹星入
紫微垣不道璠璣貴仍嬰筦庫煩利行雖近市義

守不窺園眷遇忘身得危難欲手援懷邦維父母
於國實甥婚還羈勒原原致壁殮魯連名竟
重箕子教應存簡在從當日扶持宿藩清宮風
蕭蕭驂乘火焯焯帝所爲郎重王家報禮敦暫伸
桑梓敬末愛李桃繁神闕秋期蚤康侯晝錫蕃九
成思閣鳳六月待溟鴟

次勻筠軒司徒足成旦公所藏英宗御題之
句元題曰日光照吾民月色清我心又題琴
曰至治之音

化國多長日高人侍紫宸觀書從上相屬筆念生
民雲漢文章備風雷號令新惟應青簡在能載古
風淳御翰龍池曉繙經鷺殿陰雲依清靜葉月印
妙明心千載堂堂去諸天肅肅臨朱絃誰爲鼓至
治有遺音

次勻李侍讀東平王哀詩

宇宙生竒變明良陷逆圖傳聞昏白晝悲憤結全
區治極機潛否恩深事失謨犯車仍斷軌壞戶竟
傷樞魑魅嫌明鏡強梁忌雅模甘心成首禍藉口

肆群腴隱忍危衝決馮陵善唯俞自天俟鈇鉞累
月具簞壺裹革疑亡地招魂競出都笳鳴
馬僨四交衢所痛倉皇際將無古昔殊腹心何蠱
蝕肘腋不支梧列位多翹楚干城總豹羆詎言歸
厄數不復頌貞符天討公無赦皇心愛不姑報讎
論婉變錫爵醕嗚呼相業今如在民生寔少痛誰
能疵璧玉唯有泣瓊珠執簡書群盜當關欠一夫
馳奔嗟薄日沐浴止中途決去思投闕違之或汎
湖危知無復死恨不奮前誅春雨煩冤滌朝陽瘴
思蘇謳吟申感慨述作懼荒蕪芒忽思離散焄蒿
起苑枯神還嵩岳峻氣直斗杓孤陟降先皇側回
翔造化待英靈常會合瞻想豈虛無

慶史顯甫治書父八十

治世尊三壽高年見八朝羽儀叅漢皓神觀邁周
喬柱下聲名遠壺中日月饒微醕霞灼灼新冰雪
蕭蕭地厚原初峻天全玉不瑀一經傳令子貳憲
蕭詳僚侃侃稱時望英英樹國標繡衣兼綵服白
日上青霄上壽歸榮異推恩錫爵超紫深宗伯橐

金重列侯腰珍膳應恒從安車必見招乞言逾藥
石報德稱瓊瑤千歲庭來鳳群工韻合韶陳詩方
懿頌擊壤比康謠

送國王朶而只之遼東

太祖收中夏元臣有武功建邦開土宇爲位冠君
公奕世王章在諸孫相業隆春秋周正月禮樂魯
新宮鹿幣金遺耐熊侯算失中河山仍鐵契寶玉
右瑯弓投筆鄒枚秀揚旂茵綰雄塞雲依碣石凍
雨灑遼東戎器橐藏盡賢書奏納同大夫勞替御

惇史采民風

送陳碩

莆田陳氏慶曆名法從故家也自衆仲來
京師集得友焉凡問學修己之事有益於
愚陋多矣又從知其父兄之賢也問所自
出則南塘趙氏信乎其學之有傳矣嘗以
其從子碩來見予愛其端謹可望南歸省
父衆仲送之以文予不能忘也乃賦詩曰
六歲過閩郡書聲憶滿城目盲今子夏心醉昔延

平爾叔同游息吾文愧老成每分重席暖相對一
燈明遠海乘桴意高山伐木情願攜邛竹杖往看
離支生辟椽青衫舊趨庭綵服輕爲言穿木榻亦
未厭藜羹寶瑟留飛鴈蘭舟及轉鷺佩懷湘渚贈
綬向會稽迎去去江雲濕飄飄島霧清重來知有
意時我已歸耕

奎章閣有靈壁石竒絕名世御書其上曰奎
章玄玉有勅命臣集賦詩臣再拜稽首而獻

詩曰

禹貢收浮磬堯階望喬雲自天承雨露拔地起網
緼擊拊磬音合衡從玉兆分巨鼈三島力威鳳九
苞文辨位資乾坎爲山填幅員固知興寶藏不假
運神斤書帙侵春潤香爐借宿薰烟光晴冉冉波
影晝沄沄融結繇元化登崇荷聖君瑞於龜出洛
重若鼎來汾柱立尊皇極磐安廣帝勛詎云陳祕
玩因願獻前聞

送南宮舍人趙子期宣詔交趾

三年頒正朔五月向南交將命方離闕陪臣已在

郊衣裳鴻羽漸干戚虎皮包瘴霧衝風散瀧湍急
雨捎朱鳶窺土室白雉下槽巢夜浦蛟停織陽岡
荔折苞初筵紛艷罽後騎器笳鏡諏日修王貢兼
時眠客庖方言書仄理海錯藉青茅漢柱苔侵篆
秦林桂拂旃括囊無意苴當戶有蠨蛸卽見還英
節母煩筮繇爻

虞伯生詩卷二終

虞伯生詩卷三

送袁伯長扈從上京

日色蒼涼映赭袍時巡毋乃聖躬勞天連閣道晨
留輦星散周廬夜屬橐白馬錦韉來窈窕紫駝銀
甕出蒲萄從官車騎多如雨祇有揚雄賦最高

代祀西嶽至成都作

我到成都纔十日駟馬橋下春水生度江相送荷
主意過家不留非我情鷓鴣輕筏下溪足鸚鵡小
臆知客名賴得郫筒酒易醉夜深衝雨漢州城

贈星上人歸湘中

潭北湘南無影樹一花吹度海門潮
天香滿室定初起雲氣上衣身
欲飄寶月夜寒龍在鉢銀河秋
近鵲成橋豈無一箇邛州竹
與爾松根共寂寥

子昂秋山圖

翁昔少年初画山丹楓黃竹雜潺湲
直疑積雨得深潤不假浮雲相往還
世外空青秋一色牕中遠黛曉
千鬟瀛洲雞犬同人境尚想翁歸
向此間

題黃竹村所藏画卷

雪後城陰雪一坡寒梅疎竹共婆娑
經行不覺籃輿遠點染還疑綵筆多
蜀棧煖雲生野樹匡廬晴照落江波
商公已老高公死惆悵誰人奈汝何

過池陽與周南翁同知

使過池陽聞上日好懷浩蕩爲君開
江干維楫車馬集亭上持盃風雨來
通夜魚龍聽語竟明年鴛鷺憶朝回
九華秋色翠可食爲問謫仙安在哉

安慶路雙蓮寺得上人超然亭

超然之亭何所超雙蓮孤塔共峩城
頭疎雨散

花至江外斷雲將樹朝晨飯舊從香積化晚鍾常
送海門潮尋原悵望空歸去此地安禪試往招

謝茅山王者贈白羅氅衣請爲作大洞祖宗
師四十五贊

鶴氅裁成雪色新仙翁持寄感情真清高自此全
拋俗寬博由來穩稱身佩玉洞聞雲外響劍光飛
射日中塵画图寫向羣真裏便是揮毫贊詠人

送莫京甫廣憲經歷

延春閣下承恩日是我經帷侍講時方擁青編臨

綺席遙看朱紱拜丹墀風微細草鳴珂珮日煖飛
花近鬢絲上憶遠人常軫念莫言南海是天涯

集與諸公遊尚書何公山莊公孫斯明先爲

剪雍荆榛并致酒饌遂得瞻敬尚書墓道盡

日乃還偶成四詩酬斯明兄弟并簡同遊者

盛德高年陟泰階歸尋仙隱石樓開舊闢前引朱
衣吏每爲行吟綠逕苔夜色園林瓊圃樹春寒庭
館石湖梅誰家今有賢孫子黃菊高秋與客來

又

先君夙有登臨志老去無能共往還敢謂菊華憐
寂寞許教筇竹歷孱顏地高天近惟秋好雲淡風
輕盡日間早晚涪翁酬素約更從几杖一躋攀

又

石梯一逕仙凡交過此先見蒼崖坳幽穿斗角潛
蛟窟危出雲根棲鳳巢題字百神驚澗底嘯歌衆
籟越林梢重吟仙伯石樓詠一解齊人山鬼嘲

又

黃姑仙崖置屋牢我躡飛磴如猿猱環山翠黛是

城郭平地白雲皆海濤人頭關上走馬健仙掌峰
前飛隼高願得金丹換毛骨三清入極共遊遨

黃氏妹之葬余以他故不及送之旣塋之明
日仲常弟與譚元之表姪述事與懷形諸詠
嘆後十餘日始得併見諸公和章集憂患之
餘觸事易於傷感俯仰存歿不覺清涕之交
頤也依舍弟韻亦述二章一以示黃氏諸甥
一以寄元之表姪

寒泉涓涓山木秋子弟行役荒原頭忍聽諸生哭

慈母浩將孤淚灑新丘山川神氣早晚復珠璧輝
光日夜浮不惜衰年待爾輩受成積德過岑樓

又

憶別高堂十五秋不堪俯仰雪盈頭翁時贈玉歌
清渭子正將車從太丘久矣孤懷成寂寞勗哉古
學矯虛浮每看舍弟承咨辨如見從容月滿樓

題故太子少傅翰林承旨李野齋幽居圖

車蓋歸來托遠林魯山齒萃魯原深漁樵相識頻
分席賓客時過共賜金百歲儀刑猶近古五朝文

物至於今披圖想見登臨地松滿徂徠起夕陰

送江聲伯

家近茅峰無百里羨君來往及清秋每看丹井晨
光起幾見龍池雨氣浮白髮紅塵嗟我老素書玉
訣使人愁仙都羣老渾相識定著雲裘訪羽丘

歐陽元功待制入院後僕以兼領成均辰酉
甚嚴絕不得相見今夜當同宿齋宮賦此先
寄并東謝敬德修撰

學省初兼禁直稀故人同署却相違食餘首藟承

朝日坐候棠梨過夕暉

成均堂東有棠梨樹日影至則師生始散二十餘年

矣預喜奉祠秋寺燭定知催襪早朝衣今晨瘦馬

經門巷想擁青綾尚掩扉

次韻張蔡國公淡菴青山寺詩

相國觀山負夙期聖恩祇許暫相違身隨雲影留
三宿心了泉聲絕百非開士談空依寶樹野人耕
雨薦山薇雙龍深護安禪處繞坐諸天近紫薇

次韻國子監同官

坐隱烏皮髀肉消諸生應笑懶邊韶階前老馬隨

秋草袖裏遺編俟早朝乞米西鄰晨有粥畱家南
國暑無綃經明亦是歸耕好清夢無時萬里橋

又

學宮南直禁垣陰假寓唯愁兩壁沉一曲鏡湖遺
老事三年經幄小臣心銀河回夜天逾近草逕迎
秋露轉深珍重鄉人居巷北時能來往和鳴琴

次韻馬伯庸寶監學士見貽詩并簡曹子貞
學士燕信臣待制彭允蹈待制

禁廬曉直夾城西經筵龍光映壁奎繞閣浮雲飛

野馬當階生草伏馴麕雷行已識天無妄風烈唯
聞帝弗迷徒積寸誠無補報每懷冰署欲鷄栖

其二

奉節通宵虎帳西重光貫玉護文奎賜餘分食兼
羔雉侍側專茵雜豹麕樂事易成團月怨吟情深
入五雲迷上林更有高枝在彩鳳還來擇舊棲

鼇峰者國史院庭中石名也伯寧御史爲僕
言自其先公時與諸老名勝賦詩者蓋數百
篇今玉堂無本而御史家具有之且曰峯所

托差低盍稍崇其地乃八月五日旣克如命
因賦此以報且請錄示舊詩補故事以傳云
視草堂前石一拳何人移置自何年久憐翠色連
重地故拔孤根近九天俯仰百年承雨露等閑千
尺接雲煙故家御史遺書在爲錄鼇峰舊賦篇

進講後侍宴大明殿和伯庸贊善韻

丞相承恩自九天講臣春殿秩初筵養賢敢謂占
頤象陳戒猶思誦抑篇旣奏文韶兼善美豈無后
稷暨艱鮮願推餘澤均黎庶樂只邦基億萬年

又

劍履歸來帶玉璫元臣促召不崇朝
盍簪誠與朋求助納約須從牖
向招御柳新條臨晝殿仙桃曉
色上春潮校書寂寞揚雄宅亦賦
凌雲麗九霄

十一月二十夜思仲常弟

江梅應發去年叢叔也俄爲畢竟空
來後去先康節苦離多會少子瞻窮
近書時閱猶疑在舊學重思孰與同
萬里相從憐季子白頭清淚夜牕中

又

還京聞訃在秋餘老淚無多眼易枯
丹旄到無頻入夢佳城得否未收書
食貧未已憐孤幼述德無聞愧老夫
忍讀近緘成永訣爲敦衰薄趣歸與

次韻道士竇神清賦舜粟

帝德無爲保太和歷山遺種有嘉禾
想經稷教躬耕法正及堯時擊壤歌
旆旆九秋新雨露離離千古舊山河
曲肱飲水幾忘肉最憶宣尼感歎多

太一道士張彥輔族本國人從玄德真人學
道妙齡逸趣特精繪事爲其友天台徐中孚

用商集賢家法作江南秋思圖東觀大隱蜀

虞翁生爲賦此詩

三年別却釣魚磯
晝看新圖夜夢歸
石壁蒼松含爽氣
江沙翠竹弄晴暉
西瞻雪嶺家何在
東入天台路轉微
賀監若蒙湖曲賜
遍翔千仞振塵衣

贈竇神清歸隱茅山

翩翩歸鶴自遼東
又向茅山擬住冬
啄食定依何處竹
結巢應得古時松
雪滿空山騎一虎
月明秋水佩雙龍
別來彷彿三千歲
亦欲還棲第一峰

題南野亭

門外煙塵接帝局
坐中春色自幽亭
雲橫北極知天近日
轉東華覺地靈
前澗魚遊畱客釣
上林鶯轉把杯聽
莫嗟韋曲花無賴
畱擅終南雨後青

送貢仲章學士奉祠嶽瀆

三十過從今六旬
故人唯我兩吟身
空華作賦相爲壽
寧復升堂互拜親
送別轉令嗟影獨
思歸從此上心頻
南湖春滿鷗波綠
定艤乘槎往問津

次韻吳成季宗師赤城阻雨

人間伏日當蚤休道上馬車如水流神仙不愁風
雨夕父老已知禾黍秋誰憐司馬久多病惟有杜
康能解憂北溟之鷗六月息載我八極歌遠遊

次韻伯庸尚書春暮遊七祖真人菴兼簡吳

宗師

賞心不作三春過高興都爲百事牽願解蘭舟溪
水汎思攜藜杖野雲穿真人館在無塵界太尉詩
如絕行仙花下共遊仍獨往不辭泥醉晚朝天

又

石渠承雨作流泉中有參差荇菜牽花近飛觴魚
駭逝柳低步障燕隨穿紅塵朝路常叅吏清晝齋
居幾劫仙但乞會稽尋賀監酒船一棹水中天

又

花時宮館多賓客春酒盈缸餼在牽據石發歌風
爲起臨流揮翰硯將穿紫髯一去惟憑夢白髮頻
搔豈解仙賴有看雲高閣在江東烟樹共晴天

又

一住京華三十年春花秋月謾相牽高情總付珠

簾卷危坐空餘木榻穿水曲停驂新禊事墻陰題
字昔遊仙動成陳迹多惆悵安得長生老後天

送宋誠甫太監祀天妃

使者受節大明殿候神海上非求仙廟前水生客
戾止帷中靈語風泠然麗牲有石載文字沉璧用
縑求淵泉賈生何可久不見海若率職君子還

觸石墜馬卧病蒙恩予告先至上京寄漑之
學士敬仲叅書

翠幄臨都尚駐郊言瞻龍漠度前茅雨餘草氣干

原合日下雲章五色交給札修辭持玉筆賜羹充
腹出珍庖白頭感遇知何補阿閣清嚴棲鳳巢

又

趨召顛躓歎日昏旋聞予告荷深恩藥頒西域千
金劑酒賜初筵九醞尊默憶舊書忘晝永行吟冷
署覺春溫摩挲素壁光於雪思得叅書寫樹根

閒閒宗師和前韻期望過當復用韻以謝

草堂長憶蜀西郊屢卜歸休自折茅司馬檄傳驚
父老少陵詩苦入神交山多美竹深宍屋江有嘉

魚遠致庖乞得閒身當及早堯時元自有由巢

又

書卷連床度曉昏懷歸猶復戀君恩養生賴得南
華論好客時傾北海尊山木向秋俱老大海霞迎
日共清溫蓬萊正與鼇峰接幾見浮雲起石根

雲州道中數聞異香

雲中樓觀翠岩堯載道飛香遠見招非有芝蘭從
地出略無煙霧只風飄玉皇案側當霄立王母池
邊向日朝却袖餘董散人世九天清露海塵飄

次韻楊友直北行道中

蕭蕭戎馬昔升虛壯士吹笳慘不舒關外羽書三
月急道傍茅舍百年餘沙田雨足仍生黍河水冰
消不禁漁洛下賈生猶獻策平明立在玉階除

王儀伯參政見和郊字韻詩復用韻叙謝

龍游宮沼鳳游郊通水明堂不剪茅絲蕝草儀三
日具大亨饗帝五雲交執輿已信神爲馬和鼎寧
容祝代庖八月涼風張樂地頌聲洋溢播雲巢

又

聖遠言湮感墊昏汾河千載最知恩垂綸論道稱
前古束髮明經奉至尊車騎身從遊汗漫庭闈心
在視寒溫朝回未覺歸途晚斗柄西移揭角根

十月十六日奎章奏對回至李漑之學士宅
宣旨行香孔林按上得佳紙因賦此詩并得
其鎮紙玉蟾

聖恩深念魯東家林木蕭條散暮鴉丹詔先令修
古廟彤庭卽日遣皇華閣中學士馳山驛天上文
星絢海霞偶爲傳宣到書閣就床奪得玉蝦蟆

次韻馬伯庸尚書

邃閣晨趨禁掖西莫街騎馬及鷄棲退朝每想花
邊散得句應從竹上題賜被南宮無宿火齋居方
丈有蒸藜鳳池何似承明近久候文星共聚奎

送甘太史祀名山大川

名山閱秘經承恩衣繡喜趨庭江頭飛蓋逢
春雨林下幽人使星宣室夜深蓮燭絳石渠風
煖竹書青清朝盛典須成蹟最想遙歸駟馬駟
就甘太史并寄天台武夷太無三君

武夷山裏芝三秀
華頂峰前黍一炊
湖老每懷鴻去遠
山人毋謂鳳來遲
浮關紫氣緣書任
照夜青黎賴客知
賀監清狂天所放
故令華髮侍安期

子昂墨竹

高崖數竹凌風雨
老可當年每画之
修影自憐流水遠
虛心如待出雲時
縱橫鴻爪畱沙磧
宛轉鸞羣向墨池
百世湖州仍見此
故知王子善參差

二十五日卽事呈閣老諸學士

松陰鵠立候宮車
風送飛花著白鬚
水影漸移簾

側畔鶯聲祇在殿
東隅近床儼進名
臣操載筆親題列
女圖太液雨餘波
浪動龍舟初試散
魚鳧

賦胡氏皆山

萬山起伏如波浪
外固中寬故可居
日出擁金千仞雪
雲生納翠八牕虛
亭中畱客多爲酒
谷裏成樓更貯書
朝往莫歸勞杖屨
醉翁應不憶環滁

賦碭山成簡卿心遠亭

作亭臨河河水渾
草樹繞屋啼鳥聞
夢回枕上彭城雨
目送檐間芒碭雲
歸來黃菊有佳色
坐老青

山無垢氛但願尊中長得酒曲阿莫問舊叅軍

送全州錄事

清湘郡城公事少錄事官曹盡日間且可隨雲度
流水更空把酒看青山僧前虎跡石苔紫雨裏烏
聲江竹斑應會吟詩一百首寄與明年春鴈還
與衆仲助教讀王臨川遺事慨然興懷良上
人口蔣山善公求送行因爲賦此

霜筠雪竹鍾山寺最憶臨川舊所遊病骨荒陂秋
澹澹白頭遺恨思悠悠燕歸雲海迷華屋鷺起星
河近綵舟欲托善公重到日松間石上試相求

玉堂讀卷

玉堂策士詔儒臣御筆親題墨色新省樹坐移簾
底日宮壺馳賜殿頭春虞廷制作夔龍盛漢代文
早董賈醇書閣算年偏感遇但歌天保答皇仁

謝吳宗師送牡丹并簡伯庸尚書

風紫陌少塵沙忽見金盤送好花雲氣自隨仙
天香不許世人夸青春有態當窗近白髮多
帽斜最愛尚書才思別解吟胡蝶出東家

和范德機從楊撫進士見寄

清江先生最好奇十年不出髮如絲田舍每詢歸
後計玉堂今見寄來詩風前雨過林花動日下雲
行省樹移還覓舊遊春欲莫楊撫爲我道溪期

送進士劉聞文廷赴臨江錄事

清江百尺石爲城太華千峰積雨晴官府幾時書
映靜漁舟盡日釣絲輕故家好訪春秋學上國多
傳月旦評頗有老懷煩錄事到州爲問范先生

大廷策士問經世之道僕忝在讀卷之列觀

諸進士所對有感賦此錄以贈別鑷性粹中

支渭興文舉二賢良

昔人有欲問先天林下相期二十年已向塵埃成
白髮尚從燈火事青編獲麟遂訖春秋後鳴鳥猶
喧樂前春雨未來農事晚獨懷歸計在山田

羅朋友道擢高科拜官還崇仁賦此爲別

一江疊嶂竹交加曾著芒屨踏白沙名勝多年嗟
實文章此日羨才華青雲步武纔重見白屋詩
口尚幾家鄉邑相逢煩告語好敦忠信作生涯

白沙

生詩

十六

汲古閣

道居近之昔崇仁有何同父尚書李公父舍人
畧故宅在焉國朝六科崇仁舉進士第者惟家
與友道方二人故云重
所以深期望於來者云

贈趙生

天門一日觀黃榜茅屋三年掩素扉湘帙蠹魚春
雨潤練囊螢火夜光微夢遊朔雪留鴻跡思入南
山望鶴飛會倚宮墻看射策上林初日炫朝衣

贈昇龍觀主

榻前親製先生號賜與江南謝舜咨太華雲開天
使下少微星動史官知龍飛滄海留珠樹虎卧丹

房守玉芝聖主無爲千萬壽更應築館候安期

訪李真人不遇

退朝花底佩珊珊去訪真人曉出關芳草欲迷行
逕古長松深護步廊閑蒼龍挾雨得瑤簡白鹿穿
雲致玉環如到天壇看月影定知清露滿人間

賦壺洲

傳聞海上有玄洲曾是安期舊所遊千頃白雲都
渾玉一杯弱水不勝舟魚龍夜護黃金鼎鸞鶴晨
朝紫綺裘波浪不驚星斗近步虛聲裏度清秋

完哲篤下第歸蜀

西郊長憶草堂吟，塵外幽居更可尋。
奏賦上林春事晚，攜書舊隱歲華深。
濯錦江波紅灩灩，浣花潭水碧沉沉。
白頭未覺歸與莫，待子重來獻好音。

吳宗師夢予得山居奇勝，特甚夢覺歷歷分
明，忻然相告賦此。

夜來夢我山居好，笑我平生豈有之。
野服許辭金殿直，俸錢足辦草堂資。
安知蓬島非兜率，不是匡廬定武夷。
還有勝緣同晚歲，至人無睡已多時。

答李簡伯司業分俎

憶昔同堂肄樂歌，朝陽煦煦午風和。
炮羔升俎堆紅玉，醕酒盈尊汎綠波。
坐席已成三載別，交情猶似嚮時多。
尋常飽德寧私我，願賦緇衣上禁坡。

次韻朱本初訪李漑之學士不遇

城南城北煖塵飛，伐木相求苦未歸。
吟到碧桃還雨，行尋芳草又斜暉。
綺牕綵筆題詩徧，斗帳沉人袖微。
共載小車勝上馬，重遊莫待曉紅稀。

寄趙子敬平章

乘閒入翠微猶愁嵐氣溼人衣道傍野樹飛
花盡溪上春雲作雨歸故舊釣絲輕在手仙人棋
忘機赤松曾許同千載擬向高秋傍鶴飛

仁壽寺僧報更生佛祠前生瑞竹有懷故園
故園生瑞竹試從來使問何如蒼莨獨出千
手衣翠節駢生數尺餘比管可吹丹穴鳳長竿莫
釣錦溪魚折筵已向靈氛卜亦說能歸似兩疏

又

聞道故園生瑞竹令人歸興滿江干扁舟不畏瞿

塘險匹馬誰云蜀道難杜甫溪頭花匝孔明廟
裏栢闌珊新堂題作歸與字定得臨江把釣竿

又

聞道故園生瑞竹山僧爲我重栽培百年雨露餘
生息一日風雲幾往迴壠上枯桑烏萃止城東華
表鶴歸來聖恩若許歸田里千石清尊爲爾開

又

聞道故園生瑞竹吾家孫子好歸看佛祠竟日夫
陰覆先隴多年莫雨寒門戶淒涼嗟老病鄉關迢

通報平安重來慎勿勞余夢駟馬橋邊據馬鞍

題張太玄爲陳升海画廬山圖

誰向匡廬成舊隱画中一似夢中看千株松樹叅
天起一箇茅亭傍水安清風空谷傳吟嘯白日高
岑生羽翰寄語山中陸修靜葛巾不畏過溪寒

別國史院鼇峰石

秋雨莓苔數尺身文章曾見百年人吁嗟一代興
王盛付托諸公製作新垌野有詩皆在魯泰山無
刻更先秦鳳麟一去無消息空使駑駘愧後塵

又

執戟揚郎九不遷頻年從幸到甘泉賜歸特許先
三日作賦時令奏一篇翠勺娛人花帶露貂裘倚
馬草橫煙殷勤爲謝堂前石何處來秋共月圓

神鳳琴

鳴鳥人間久不聞遺紋欲托斷琴紋曾看土鼓歌
朝日亦共陶尊醉夜分五色雲中迎太一九疑山
下望湘君采詩應被唐風譜早晚樓船或祀汾

繼陶居士傳

湘水滔滔蜀嶺高
蓬蒿千壘棘心勞
道間化虎作人語
城上慈烏向夕啼
一樹新歌殘王氣
朱門往事付鴻毛
將軍莫歎今爲庶
居士當年已繼陶

謝書巢送宣和瀘石硯

巢翁新得瀘州硯
拂拭塵埃送老樵
毀壁復完知故物
泥沙俄出認前朝
豪翻夜雨天垂藻
墨汎春冰地應潮
恐詔相如今草檄
爲懷諸葛渡軍遙

送蘇伯修御史

新除御史南臺去
頓覺文星闕下稀
病起可堪江

霧溼信還莫待苑
花飛千年鳳鳥來
阿閣萬里鱸魚出
釣磯總道揚雄文
最古君知頭白久
思歸

次韻柯玉文寄別

避弋驚鴻過遠汀
啄苔病鶴想華亭
臨邛枉騎情都盡
於越扁舟影更傳
賓客莫詢溫室樹
君王猶問楚江萍
重來賈傅非年少
前席從容對夕廷

謝書巢惠梅花

巢翁遠送梅花樹
正在東風四日前
紅萼無言餘舊雪
白頭相見又新年
喜從嘉樹來江雨
憶共香

杭上海船春夜不眠賓客醉只畱孤鶴伴清妍

再用韻簡巢翁

豈無尊酒梅花側聞道長齋繡佛前方閣護雲宜
煖日小車衝雪稱高年願辭閣下金蓮炬但乞湖
中卷画船約取巢翁携鶴去鬢毛同白不爭妍

送玉泉長老栗木果

非青非黃栗木果使者西川馬上來楚國共疑金
橘味衛人祇道木瓜栽頻婆妙色情懷別橄欖餘
甘齒頰迴歸到玉泉應說法試令闍老聽轟雷

送王君實御史

頓覺文星闕下稀旁人猶道此言非東風十日京
城雪西道三春客子衣鶯滿鞦韆川君定到鵑啼劍
閣我思歸千花竝繞圖書府相待承恩入紫微

寄句曲外史張伯雨

獨抱長纜管白雲琴心誰錄內篇文清齋三日秋
仍瘦徧禮羣真夜每分石記恐妨塵外事仙經聊
許世人聞已從司馬求真錄更爲通章九老君

寄答馬昂夫總管

白髮先朝舊從官幾年南郡尚盤桓九華山裏詩
題徧采石江頭酒量寬鴈到京城還日暮馬懷餘
棧又春殘何時得共鳴臯鶴八月匡廬散羽翰

觀大洞經書與董道士

江東昔有大茅君大藥親令二弟分紺絲俄消頭
上雪玄黃初合洞中雲雷鳴春谷龍三變月滿秋
空鶴一羣一落人間成老大何年名字刻瓊文

送劉宗師歸茅山

長松落落千峰雪碧漢寥寥一鶴風十月暫離句

曲洞早春還謁大明宮君王舊識蒼龍劍圖畫新
傳白髮翁欲把紫芝歌隱德三茅應聽月明中

與薩都刺進士

當年薦士多材俊忽見新詩實失驚今日玉堂須
倚馬幾時上苑共聽鶯賈生誰謂年猶少庾信空
慚老更成唯有臺中馬侍御金盤承露最多情

送歐陽元功謁告還瀏陽

憶昔先君早識賢手封製作動成編交游有道真
三益翰墨同朝又十年心似古人機獨敏用周當

世德仍全雍祠已有蒼崖石欲托高文與代傳

又

曉奉新書進御床解纓隨見濯滄浪歸鴻不計江
雲闊倦驥空懷野水長竹簟暑風竟夢遠茶烟清
晝鬢毛蒼藍輿千里空春道投老相求訪石霜

送王師魯編修祠南鎮

山陰巖壑多塵迹王事能來況暮春太史好探神
禹穴老夫先是會稽人海東日出雕闌近湖上風
生白苧新若得拖樓同晚飯便從賀監卜爲隣

次韻楊友直

真館能容客避囂深簾飛絮晝寥寥數枝芍藥誰
相贈一束生芻故可招坐定驚雷經席上酒闌纖
月在林標何由長共陶弘景聽取松風作鳳韶

題東平王與盛熙明手卷

宋宣和手敕一通卷首題識四字我朝英
宗皇帝御書也帝嘗以至治三年正月十
五日幸五華山臣有以此書獻者丞相拜
任侍側就題以賜之既歸第曲先盛熙明

寫金字佛書一帙贊丞相丞相因以此卷
馳之且語以其故至順三年三月八日熙
明屬歐陽玄記其事於左方

聖代御題前代敕小臣叨備史臣書事業久爲人
士直文章猶作世璠璣海淪碣石圖空在墓築祁
連計已疎誰識全燕天所靳萬年形勝帝王居

和馬侍御西山口占

岿堯宮殿水西頭春日時聞翠輦遊霧引旌幢連
閣道風傳鍾鼓出城樓羣臣頌德金爲刻萬歲稱

觴玉作流避暑醴泉涼氣早旋京應喜大田秋

到先隴爲墓人書

未忍他鄉作故鄉故因使騎入陵陽鄉人共訝聲
音似客路疑將鬢髮蒼親老長懷鄉里意孫多宜
置墓田旁治生自可口諸葛數頃膏腴八百桑

八月十五日傷感

官車曉送出神州點點霜華入弊裘無復文章通
紫禁空餘涕淚洒清秋苑中苜蓿煙光合塞外蒲
萄露氣浮最憶御前催草詔承恩回首幾星周

題煖翠亭

老去惟思卧白雲一亭萬竹喜初聞
波回曉日鴛鴦竝沙散晴煙翡翠分
把釣左泉歸衛女乘舟北渚望湘君
誰能獨采薇盈袖却道高寒思不羣

送許有孚赴湖廣提舉

奉詔掄文祕殿西才華知合藉金閨
思親浩蕩江波遠戀闕遲回苑樹低
望鶴樓前移綵鷁吟詩花底聽黃鸝
歸來尚覺春風早鴈字充庭玉筍齊

賦石竹

積雪初消萼綠華東風吹動絳綃霞
龍嘘石氣千年潤鶴過林陰一逕斜
刻字欲尋金錯落折旌如織翠交加
綺牕坐對吹笙煖未覺人間歲月賒

集爲朶兒只慎齋平章題紫微亭用王右丞語也并賦詩一首奉寄

右丞昔向終南住獨對南山賦紫微
春雨乍收原上牧晚晴仍見谷中歸
好畱杜牧爲賓客更覓園公共蕨薇
聞道新亭多雅興想持尊酒看清暉

賦碧筠堂

藹藹江東雨後雲。碧筠堂上注芳尊。眉山老去無
賓客。香水春生有子孫。團扇晚涼畱翠黛。疎林纖
月對黃昏。問誰吹得參差玉。爲斲蒼苔向石根。

奉同吳宗師賦蔡七祖新齋

城南煙樹聽鶯啼。石上莓苔覓舊題。自有琴心傳
內景。更將書帙事幽棲。晚來相鶴風生竹。雨過籠
鵝水滿溪。蜀客草玄成底事。蕭條白髮愧青藜。

次韻吳宗師

硯池滿貯薔薇水。罌腹輕磨翡翠釵。仙苑煙雲隨

地煖。道山風日向春佳。巢笙夜夜鳴金屋。飛鳥
時步玉階。祇恐江頭花事晚。謾勞車馬賦茅齋。

寄來鶴亭主人

德清舊館何時到。雨後春泉定滿池。綠字久無
景信。紫苔應長少霞碑。數峰煙樹天垂野。千頃
波雨散絲。海內交遊多老去。爲誰溪上放船遲。

送王中夫赴安慶教授

太行積雪都消盡。船到舒州水正高。江樹連城
野色。門生加豆薦溪毛。尋原自去書山石。問字

能載醴醪爲覓種椒張處士早收丹實待歸舫
予延祐己未秋南歸安慶城東有張教授
與予同舟從者得椒實數升至江右種皆
成予復來京師又數年山中椒已無存者
可爲求種秋過江上行取之爾

送張兵部巡視運河

画橋冰判動龍舟鴨綠粼粼出御溝使者旌旗穿
柳過人家鳧鴈傍溪浮桃花吹雨春牽纜江水平
堤夜唱籌應有餘波方浩蕩不令歸楫恨淹留

謝吳宗師惠墨

念我衰年不廢書錦囊古墨送幽居明窗塵影丹
同熟玄圃雲英玉不如敢爲文章勝虎豹祇應箋
註到蟲魚研磨不盡人間老傳與兒孫尚有餘

再和

價見天真按筆書七言宛麗出閒居誰云太璞無
存者藏在丹房已久如寫韻臺虛人跨虎換鵝池
煖水生魚玄霜比似金丹祕祗得刀圭便有餘

又

家傳戈法負遺書得墨深將藻繪居華采每慚誇
既往平安聊遣問何如画殘翠黛愁蛾綠寫得畫
庭辟蠹魚鬚髮如霜還可染硯池不敢棄君餘

三用韻答巢翁就以奎章賜墨賜之

鄰父長思長史書不辭頻謁惱巢居臨池三月方
霜盡對月千篇白雪如賦敵洛波翔翠羽歌成如
浦媵文魚故分瀘石松烟色猶是奎章舊賜餘

四用韻寄吳宗師奉祠城東岱祀其一謝百

真人送海棠一枝

休奉東封遠獻書神宮咫尺九重居香飄祕殿人
顛若靈降方壇樂翁如水上祓除祠候燕雨中歸
牧夢占魚此時最憶風雲地濯濯清沂詠歎餘

又

定計歸來已束書高齋虛寂似禪居好花送與春
風共病目愁看宿霧如四月落林多野筍半陂流
水足溪魚今春又過今秋早一飯跣趺不願餘

謝吳宗師送牡丹

人人看盡洛陽花誰似堯夫小小車高閣每煩君

實望西街還過伯淳家東風寒食吹烟散燕子空
梁莫景斜最憶青城坪上樹樵人祇向擔頭誇

題著色山圖

江樹重重江水深楚王宮殿在山陰白雲窈窕生
春浦翠黛嬋娟對晚岑宋玉少時多諷詠江淹老
去倦登臨扁舟却上巴陵去閑聽孤猿月下吟

題熊太古畫

亭上長松三百丈何人可以此經過窮冬藜杖出
同谷清夏蓋輿還曲阿棲鶻每來從島嶼老猿時

復下藤蘿王維韋偃久不見病目摩挲愁奈何

送趙伯常自中臺出貳淮憲

淮南地沃偏空麥況可扁舟弋鴈鳧此地正須能
賦客中臺新剖使君符山城過雨驚春盡野老扶
藜到日脯行部若臨江岸濶烟波冉冉有漁夫

題淨慈書記

寒梅的的西來意翠竹青青劫外春日出碧雞山
作霧臺空彩鳳地無塵八年寫徧湖光好萬里歸
來月色新我在錦宮城裏任白雲滿屋便爲隣

送趙秉彝因王君實末章以起句

朝裏儒冠盡白頭斯言三復使人愁芳叢獨見芝
蘭樹蚤歲不矜稊稗秋藏書靈谷訪遺老把釣清
江懷故侯大中梁棟小榱桷匠氏尋引還相求

題画

緝熙殿裏御屏風零落誰收百歲中錦樹總含春
雨露画橋猶是舊青紅花開陌上懷歸燕潮落江
頭送去鴻何似綠波生太液絳桃風急綵船東

城東觀杏花

明日城東看杏花丁寧兒子早將車路從丹鳳樓
前過酒向金魚館裏賒綠水滿溝生杜若煖雲將
雨少塵沙絕勝羊傅襄陽道歸騎西風擁鼓笳

題張希孟中丞送畢提點申達卷後

十年七聘不還朝起爲飢民夜駕輶嘉樹百年誰
忍伐生芻一束不能招西州華屋交游少北海清
樽意氣消欲寫濟南名士傳泉聲山影晚蕭蕭

寄海南故將軍

海上風來五月秋晚涼應上木蘭舟金盤丹荔生

南國玉椀清冰出北州狂客醉時花作陣美人歌
罷月如鉤期門舊識將軍面從獵還披翠羽裘

次韵宋誠甫學士城南訪病莫歸

騎馬城南覓舊題飄蕭蕭帽碧雲低東風花柳過
韋曲落日兒童唱大堤繡閣豈無和玉髓□□□
□□金蹄歸來吟轉樓頭月池冷芙蓉翡翠栖

寄泉南三老人

春城連海樹扶疎中有幽人八十餘庾信流傳江
左賦伏生零落濟南書鄰翁社舞尊多酒弟子晨

炊饌有魚前代衣冠今絕少故懷三老載安車

次韻答衆仲助教相壽之句

老牛無力服柴車道遠鞭驅未到家碩果當畱霜
後樹寒梅深辨雪中花青城萬里懷空谷滄海千
年望太霞賴有良朋相慰藉釣竿隨分倚江沙

題康里子山尚書凝春小隱六韻

羣玉府中香滿袖凝春亭裏看花開綵雲近席微
風動紅日當牕好客來西海珊瑚階下長東家蝴
蝶雪中回竹深每聽尚書履池暖時分太液盃鳳

味浮烟金錯落鵝羣隨水白毡毳人間應得函封
帖青李來禽繞舍栽

次韻杜德常博士萬歲山

秘閣沉沉便殿西頻年立此聽春鸞風搖翠岸新
生袖□□銅池舊產芝玉几由來長咫尺衡門此
日遂栖遲申生欲去柴車在杜甫長吟雪鬢垂墨
沼遊魚翻宿藻畫檐飛燕習晴絲山中竹簟涼如
水應夢釣天九奏時

次韻宋顯甫

御溝雪融三月初鳧鷖鴻雁總來居蒲萄水綠可
爲酒楊柳條青堪貫魚迤邐天河起箕尾滉漾雲
海浮青徐舟前花落傍飛燕隄上風來溼舞裾翠
輦時畱金駉鬣錦波不着玉夫渠臨流宋玉偏能
賦莫待東都客問予

燕陳公子宅贈燕學士

落日炤大隄花間聞馬嘶城頭鼓角起相送五門
西

宣和墨竹寒雀

洒墨寫琅玕深宮春晝閒蕭條數枝雪不似紇干山

上馬

眼昏身手鈍上馬怕風沙
祗好扶藜杖循籬看落花

題旦僉司所藏慧甄腐瓜行蟻圖

瓜腐來螻蟻梧生致鳳凰
荒園空宿雨阿閣自春陽

雙鴛圖

戢翼石梁陰秋風日夜深
使君莫行野江水蕩人心

畫扇雀竹

啄粟野田莫飛鳴亦求雌
誰家江上雨發船歌竹枝

畫扇柳蟬

不食遂終日長吟如老翁
金盤九秋露玉樹一絲風

畫雙蝶

舞罷庭花落池邊看睡鳧無端雙蛺蝶飛上繡羅
襦

商德符畫松

松根生茯苓松葉纏兔絲服之可長生歸哉南山
陲

河梁泣別圖

落葉滿長安秋風漢節還裁詩寄歸雁三月到天
山

題蒙古松壑圖

長風壑中來吹雨洒高竹憶昔曾見之終南跨黃
犢

捕魚圖

網罟日相從天寒澤國空釣竿長倚樹老却渭川
翁

子昂畫

拂石藜竹間采蘭幽林下遊子口忘路何以遺遠
者

右

松上一枝雪竹間千本蘭江湖嗟遠道風雨憶蒼
寒

雜寫

韓子登華封縣令捐其口口呼始得下亦不傷雅
懷

右

粵人善操舟先去令人愁今年水未落不見蓴鱸
秋

右

狂罵人不怒徒然傷天和謂君丹丘月當勝白蘋
波

右

雲間陸士龍寧知千金貲文章倘有取論薦何愧
辭

右

長鬚一握雪昏目九重雲不爲成去計猿鶴皆怨
紛

右

夕望姑蘇月晨瞻太湖波金章還闕下隨意覓漁
叢

右

貪祿戀君恩三年金馬門願於堯舜世頭白老人
村

題柯敬仲雜畫

北苑今仍在南宮柰老何青山解浮動端爲白雲
多

右

雨過蒼苔石雲生埜岸泉幽懷春冉冉稚子秀娟
娟

右

鐵石餘生色冰霜作曉妍春雷明日起何處尚龍
眠

右

雨過黃陵廟蒼梧雲正愁何時倚虛幌對此滿林
秋

右

江上秋漠漠風雨晚蕭蕭千載誰相識惟應待老
樵

右

昔過篔簹谷鉤衣石角斜
儼尋龍作杖拾得上天
槎

右

黃金千瑣甲瑠玉六簾鈎
雨送鴛鴦夢烟籠翡翠
愁

右

娟娟生玉潤楚楚作金聲
羽扇迎風定羊車過月
明

右

峽口春雲重江南夜雨多
水深桃葉渡風急竹枝
歌

右

蒼涼初出日黃落早知秋
不遇采芝客寧知叢桂
幽

右

明堂要梁棟大匠取修直鬱屈崖石間秋風動蕭瑟

右

平陸蒼龍起近山生遠烟前村三萬頃明月水平田

右

莓苔生石路翠竹自交加不惜青鞵溼臨流踏白沙

右

昨夜采樵去偶逢三尺枯山人不到海不識是珊瑚

右

瀟洒一枝新惟堪掃淨塵白雲在窓戶畱作老僧隣

題李漑之學士湖上諸亭

烟蘿境

玉女乘烟霧松間采薜蘿飛行了無跡明月送空

歌

金潭雲日

羣
金沙灘上日潭底見雲行
祇有琴高鯉時時或作

漏舟

風
春水如天上秋潭見月中
如何列禦寇猶欲待冷

紫霞滄洲

琴
洞裏琴鳴澗洲前棹入雲
儼尋雲谷叟同訪武夷

秋小觀

風
湖深山影碧天淨月光空
幸自無波浪蘋花謾晚

無倪舟

還
三周華不注水影浸青天
不上銀河去空明擊棹

紅雲島

風
日出湖邊曙雲生島上紅
綵舟移曲岸白塵對微

蕭閒堂

受業蕭閒老令人憶稼軒高堂何處是湖曲長蘭
孫

松關

黛色浮空表蒼髯積雪邊雞鳴從此度掉臂向秋
天

大千豪髮

善聽返無聲善視入無覩還將一緒雲散作萬山
雨

觀心

炯炯燈畱室微微息若存仰探當月窟俯察識天
根

題熊太古畫

路過秦時檜家畱蜀道山長安都看徧回首入柴
關

右

海內此亭古幽村春事多扁舟歸未得江水已生
波

敬仲竹樹古石

雪樹寒逾勁，霜筠晚更修。
玄雲動蒼石，令我憶湖州。

題柯博士九疑秋色圖

余獨游兮洞庭野，雲徘徊兮天將雨。
望九疑兮不可見，結幽篁兮聊延竚。

題柯士畫

登孤丘而望遠，見江上之楓林。
放余舟兮今澧浦，天高而水深。

虞伯生詩卷四

次韻竹枝歌答袁伯長

沙禽東去避網羅
蕩舟相逐如遠何
越山青青越女白
從此勞人魂夢多

又

春江風濤苦欲歸
東盡滄溟南斗低
明年白日百花靜
憶爾琴中烏夜啼

又

燕姬當壚玉雪清
簫中吹得鳳凰聲
不及晴江轉

拖鼓洗盞船頭沙鳥鳴

木夫容

九月襄王宴渚宮
霓旌翠羽度雲中
滿汀山雨衣
裳溼宋玉愁
多賦未工

水夫容

長洲宮沼醉西施
蕩漾蘭舟不自持
願奉君王千
歲樂一盤清露玉淋漓

送四川憲使

晚趨嚴召直承明
侃口論思歲未更
國老不應侍

節去鄉人徒羨過家榮

又

錦溪園裏千尋竹
夏日移床就綠陰
烏帽練衣邛
竹杖閒來誰與其清吟

又

已歎玄經返墨池
復愁國史奉嚴祠
離鄉遊子歸
仍晚獨對東風惜髮絲

又

小東郭外今無舍
萬里橋西况問田
不恨錦官非

昔日但尋玉局是何年

又

龍游峽口芝千本仙井山中玉數參老去首丘天
所念未甘孫子祗東南

曹將軍馬

高秋風起玉關西踣鐵歸朝十萬蹄貌得當時第
一匹昭陵風雨夜聞嘶

舊屋

舊屋已屬他人家臨風且復立江沙欲從子雲訪

墨沼更向少陵尋浣花

誰家

誰家結屋倚江湍五月湍聲入座寒種樹已堪維
馬騎開軒卽可把漁竿

馬圖

昔在乾淳撫蜀師賣茶買馬濟時危鄉人啜茗同
觀畫解說前朝復有誰

先君太史棄諸孤之四年集來吳門省連州
府君大墓始見叔父南山翁翁與集同出太

師雍國公蓋四從矣翁曰後會未可期幸畱
數語識歲月翁方客授外鄉又以推人生年
月日論禍福以助道故不能久畱城中敢用
賦此以承命云耳

玉屏古栢與天齊使過于今又七期各道遺書向
江上西風江水髻絲絲

又

玉遮墓下有諸孫東望滄波每斷魂泣血三年餘
喘在更將衰淚灑荒園

又

族人散處江南郡不識音容但記名世澤須令孫
子憶故家今幾尚簪纓

王母圖

瑤草春深盡日閒靈芝清露自怡顏雙成吹徹參
差玉八駿人間去不還

又

偷桃小兒癡且妍恃恩無賴更蒙憐竊翻雷電天
公怒風雨落花紅九川

又

黃竹遺墟白雪高空桑戴勝向晨鳴茂陵多欲非
仙器枉賜金盤五色桃

又

西望瑤池斗柄旋金明水淨月娟娟請觀阿母神
仙籍名在龜山第幾篇

竹杏沙頭鷓鴣

蛺蝶飛來石竹藜羅襦曾試繡紋重荷花啼鳥銀
屏暖臥看牕間吐碧茸

閩州海棠

閩州城南天下稀海棠參天鸚鵡飛百年高興付
蕭散老著西江何日歸

畫猿

冷泉亭下呼常到巫峽舟中聽更愁老石枯藤還
見汝因懷經處思悠悠

記夢中詩三首

祝融君紫虛君率子廉

出海雲霞九色芒金容澗瀆水中央向曾賜服玄

洲玉今結蕭臺五鳳章

又

飛步崔嵬上九宮親題彩筆篆明虹玉樓臨海連
天碧待子扶桑鶴出籠

又

失脚漁磯返棹遲幾回石上候來期老翁巖下諸
年少總解題詩笑髮絲

題周東陽進士爲南郭園林記後

南郭名園纔隔縣好添花竹及清時歸來未老柴

車在百里尋春定可期

維摩

二士同開不二門是何境界儼評論若爲普供諸
香飯貴得薰聞悟識根

錢舜舉折枝夫容

白髮多情憶劔南秋風溪上看春酣剪來一尺吳
江水儼比千花濯錦潭

商德符小景

商君昔者觀秦蜀劔閣崢嶸筆底開又向江南住

三載不爲廬阜卽天台

天曆改元十月題子昂馬

朝廷無事日從容太僕承恩出九重前代王孫今
閣老只畫天閑八尺龍

寄馬伯庸尚書

江上河豚吹柳花三月淮船當到家賜金盡賣買
田舍坐對八公吟日斜

商德符小景

五老峰前屢往來紫雲如蓋蔭崔嵬十年京國類

看畫最愛高僧坐石苔

賦故宋李忠襄公植烏石渡舊隱

窈窕幽篁帶薜蘿青春白日坐蹉跎試詢烏石江
頭水寧有微波接汨羅

訪杜弘道長史不值道中偶成

雨挹輕塵道半乾朝回隨處借花看橋東千樹垂
楊柳飛絮時來近馬鞍

聽雨

屏風圍坐鬢毵毵絳蠟搖光照暮酣京國多年情

盡改忽聽春雨憶江南

春雲

春雲漠漠度宮城樓雪初融水未生行過御溝成
久立起頭枝上有流鶯

與趙子期趨閣

日出風生太液波畫橋千尺彩船過橋頭柳色深
如許應是偏承雨露多

玉堂讀卷雜賦次韻

待漏宮門聽鑰開袖中進卷總賢才奏名殿裏千

花合傳敕階前好雨來

又

千花覆檻柳垂絲晝刻傳呼淑景遲聖主自觀新
進策侍臣簪筆立多時

又

文章光焰貫長虹來者無窮去者空頭白眼昏心
力盡高堂深夜燭搖紅

題陳衆仲助教送人之官南平序後

我憶錦溪最上原春雲爲雨日行天何時獨上溪

邊閣不待冷風已灑然

院中獨坐

何處他年寄此生山中江上總關情無端繞屋長
松樹盡把風聲作雨聲

題歐陽原功少監家柯敬仲畫

潯陽日日水生波翠袖黃裳晚懼過珠樹月明花
婀娜鳳毛春暖錦婆娑

又

楚宮朝雨過江潭燕燕新來試浴蠶庭下錦衣皆

稚子江南香色是空男

子昂人馬圖

綠衣奴子十七八面如紅玉牽馬過繡簾美人時
共看堦前青草落花多

紹興間臨安士人有賦曲一春長費買花錢

日日醉湖邊玉驄慣識西湖路驕嘶過沽酒
樓前紅杏香中簫鼓綠楊影裏鞦韆晚風十
里麗人天花壓髮雲偏畫船載得春歸去餘
情付湖水湖烟明日重扶殘醉來尋陌上花

細思陵見而喜之恨其後疊第五句重攜殘
酒酸寒改曰重扶殘醉因歐陽原功言及此
與陳衆仲尋腔度之歌之一再董此字求書
其事因書之并系以此詩

重扶殘醉西湖上不見春風見畫船頭白故人無
在者斷堤楊柳舞青煙

題畫古木

高秋木落洞庭空岳陽城南多晚風蛟龍夜護玉
壇古劍影長留明月中

八月十五日得旨先歸驛騎在門復召還草

詔十七日至桓州驛題壁

烏桓東望天無際祗有銀蟾出海頭不得吹簫送
清夜禁城鐘鼓度中秋

子昂幽蘭修竹

舊時長見揮豪處修竹幽蘭取次成欲把一竿茗
水上鷗波千里看雲生

子昂竹石

數尺琅玕近玉階連昌宮苑少人來庚庚蒼石如

人立恐有題名上紫苔

畫竹石

井中墮却翡翠釵海上拾得珊瑚鈎蒼龍過雨影
在壁斷雲零落令人愁

又

簞簞谷中春事晚老鶴俛啄莓苔生長鳴戛戛雨
氣潤舞羽脩脩山月明

酬書巢送棕箒

積雨蒼苔路不分松華盡日落紛紛塵埃滿袖歸

來晚誰與柴門掃白雲

子昂畫

棠梨枝上白頭翁墨色如新最惱公直似故園花
石外銅盤和露寫東風

送上黨長

春雨人參長紫苗縣庭無事坐終朝俯看雲氣千
山表野有新田市有謠

畫馬

蕭條沙苑貳師還苜蓿秋風盡日間白髮圉人曾

習御長鳴知是憶關山

又

號國夫人學畫眉宮門催入許先馳春風十里聞
蕪澤新賜金鞍不受騎

畫羅漢

虎嘯千山木葉空晴空無處著神通蒼龍浴罷軍
持水閒玩明珠似日紅

題納涼圖

百頃芙蓉水滿隄綺窓只在畫橋西羊車薄暮過

湖曲驚起鴛鴦不並棲

題畫

松戴蓬萊山上雪竹含滄海岸邊風三更月上誰
能看唯有河東學劍翁

題趙子固山礬瑞香水仙藜蕙

梁園池館日蒼涼飛蓋追隨憶故鄉澤畔行吟春
事晚時時駐屐近微香

息齋竹

紫貂蚤解獵圍驂一棹夷猶雪滿簪山雨欲來春

樹暗盡將情思寫江南

冬至前一日答吳宗師

綿綿微息起黃庭仰望樽桑拂帝青海上鶴來知
有意手持楊許寫來經

題吳彩鸞所書唐韻

豫章城頭寫韻軒繡簾窄地月娟娟尋常鶴唳霜
如水書到人間第幾篇

壬申芝亭春帖子

祇今江上無茅屋何日成都有薄田若荷聖恩歸

去蚤東風擊壤慶堯年

又

髮從更白三千丈身似初生第一春久向黃庭畱
白鶴偶隨華蓋駕蒼麟

又

東風吹雪著髭鬚目力都妨讀舊書兒子總堪供
稼穡故人還許共樵漁

又

一種芝蘭異楚薪儀如鸞鳳氣如春他山借石成

瑚璉莫負深耕種玉人

華萼樓宴集圖

華萼樓前翠輦來寧王吹笛百花開夾城誰敢爭
馳道獨對霓裳進玉盃

爲歐陽學士題子昂墨竹

蒼崖倚木雲千尺新筍穿林玉一雙若到瀟湘聽
夜雨定知剪燭向西牕

又

先生歸到歸鴻閣閣下應生此竹枝定有鳳凰來

共宿可憐翡翠立多時

送道士趙虛一歸金陵

三月二十五日集侍立延閣上顧問集嘗
至金陵否集謹對曰嘗到又曰冶亭是汝
所題往年八九至其處新松當長茂矣集
謹對曰臣猶是未種松時到也近臣奏曰
玄妙住持道士趙虛一所種也上曰然又
顧集曰已陞觀爲宮汝知之乎集謹對曰
臣奉敕題榜賜之矣是日趙虛一來別歸

江南卽告以聖上不忘冶亭之意又三日
吳大宗師賦詩贈行董先生爲持卷來索
賦因錄所得聖語如上云

春明晝侍奎章閣聖上從容問冶亭爲報仙都趙
貞士新松好護萬年青

題子昂春江聽雨圖

越鳥巢南枝所欲得於江湖之上者甚不
多也區區不余畀覩此慨然

憶昔江湖聽雨眠翩翩歸雁度春前數株古木依
茅舍老去何年踏釣船

賦思州田氏楊夫人栢舟堂

白髮高堂晝霧昏自將忠義教兒孫邊傍種得千
株柳春雨深深荷主恩

次韻杜德常典籤秋日西山有感

落日龍舟山下回寺門依舊對山開霜凋碧樹烟
生草從此頻傷八月來

又

百頃夫容野水光石梁秋日度流香空遺玉座臨

高閣只有金仙住上方

又

閣上露華生翡翠潭陰日色射金虬舊時車駕迎
風動此日闌干傍水流

又

每進文章出殿遲日華西轉萬年枝甘泉罷幸揚
雄老滿鬢秋風不受吹

題柯敬仲雜畫

夢裏江南憶舊遊明璫翠佩不勝愁一鉤纖月清

如水吹笛何人共綵舟

黃筌夫容乳狗

西旅初聞效貢來金毛覆地不凡材駟虞麟趾同
靈囿抱子花陰臥石苔

題柯敬仲畫

牽牛引蔓上棠梨上有幽禽夜夜栖自有秋風動
疎竹江南落月不須啼

題蔡端明蘇東坡墨蹟後

天際烏雲含雨重樓前紅日照山明嵩陽

道士今何在青眼看人萬里情此蔡君謨
夢中詩也僕在錢塘一日謁陳述古邀余
飲堂前小閣中壁上小書一絕君謨真跡
也綽約新嬌生眼底侵尋舊事上眉尖問
君別後愁多少得似春潮夜夜添又有人
和云長垂玉筍殘粧臉肯借金釵露指尖
萬斛閒愁何日盡一分真態爲誰添二詩
皆可觀後詩不知誰作也杭州營籍周韶
多蓄奇茗嘗與君謨鬪勝韶又知作詩子

容過杭述古飲之韶泣求落籍子容曰可
作一絕韶援筆立成曰隴上巢空歲月驚
忍看回首自梳翎開籠若放雪衣女長念
觀音般若經韶時有服衣白一坐嗟嘆遂
落籍同輩皆有詩送之二人最善胡楚云
淡粧輕素鶴翎紅移入朱闌便不同應笑
西園舊桃李強勻顏色待春風龍靚云桃
花流水本無塵一落人間幾度春解佩暫
酬交甫意濯纓還見武陵人固知杭人多

慧也

祇今誰是錢塘守頗解湖中宿畫船曉起鬪茶龍
井上花開陌上載嬋娟

白樂天蔡君謨陳述古蘇子瞻皆杭守也

又

老却睂山長帽翁茶烟輕颺鬢絲風錦囊舊賜龍
團在誰爲分泉落月中

又

三生石上舊精魂解后相逢莫重論縱有繡囊畱
別恨已無明鏡著帶痕

又

能言學得妙蓮華贏得春風對客誇乞食衲衣渾
未老爲題靈塔向金沙

丹丘柯敬仲多蓄魏晉法書至宋人書殆
百十函隨以與人弗畱也他日獨見此軸
在几格間甚怪之及取觀則吾坡翁書蔡
君謨夢中詩及守居閣中舊題也第三詩
以爲不知何人作其軒轅彌明之流與陳
太守放營妓三詩亦辱翁翰墨流傳至今

亦有緣耶卷後多佳紙敬仲求集作詩識
其後賦此四首是日試郭岷墨但目疾轉
深不復能作字又知年歲後雖若此者亦
尚能作否臨楮慨然至順辛未二月望日
蜀人虞集書

題著色山圖

巫山空翠溼人衣玉笛凌虛韻轉微宋玉多情今
老矣閒雲閒雨是耶非

題東坡帖

東坡先生書少陵翁負薪行筆力與辭氣
同一高古憶在江上聞舟人竹枝一首謾
識於此

魚復浦前春水生負薪渡江初月明憑郎莫下巫
峽去楚王宮殿在專城

題張彥輔小景

山下吳王避暑宮宮前浪起白蘋風抱琴響屨廊
頭去多是扁舟笠澤翁

題李氏青溪精舍

昔逢李白青溪上醉著宮花紫綺袍松雪落崖廻
晚權海風吹月見秋豪

題李氏浩然堂

水滿青溪花滿藂浩然堂上看春風小車還過溪
頭去徧看青山似洛中

聽雪軒

樓前宿鷺起星河近歲江南雪轉多投老鍾山寒
不寐滿山松竹夜如何

放鶴亭

山人不受北山移春雨開田種紫芝昨日華陽真
逸到借令過海問安期

臘日偶題

大藥無功卦氣銷等閒雙鬢雪飄蕭東家釀得黃
精酒說道凌晨許見招

又

舊時燕子尾毵毵重覓新巢冷未堪爲報道人歸
去也杏花春雨在江南

無題

夏簟琅玕冷於水綠鞵烹魚手操七西風歸燕杏
梁深恨不身先貴人死

與陳升海

門外大風都不起牕前卷書淨於水匡廬道士上
清來吹笛數聲月明裏

與陳道士

門外大風吹樹倒牕下燒香禮黃老日午誦徹大
洞經白鶴隨人啄瑤草

題扇與周幹臣

上疊松花蜜餅香龍珠星顆露盤涼遙知環碧樓
中坐翠竹蒼松夏日長

伯生詩卷四 終

國家圖書館 NATIONAL CENTRAL LIBRARY TAIWAN R.O.C.



虞伯生詩卷五

環洲詩爲蔡天璧作

爰有清流環我中洲
雜華鮮明芳草和柔
詠有文君鳴有睢鳩
采采遊女侃侃良疇
載泳載遊在我中
泚遡遡無端沿沿無
止旣采蘋藻亦有蘭
芷觀彼嘉魚一日千
里彼畎彼畝皆爲方
田分合雍丘我流璧
旋星迴於天雲媚于
川君子樂豈眉壽永
年言命輕舟言載百
壺駕我乘黃履我雙
鳧汎汎彭蠡至於匡
廬詠歌以歸清風載
途

冰雪相看亭

有序

趙君有道之先故宋南渡時自東都徙分
宐二百年于茲矣其大父登進士第仕至
文林郎湖北憲司幹辦公事其父兩舉江
西轉運司進士覃恩受官宋亡不復仕城
中故地美竹萬箇作亭其間而隱焉名之
曰冰雪相看信國公之子平遠宣慰之所
題也有道信厚敦愿衣冠容氣翩翩然有
王孫公子之遺風敏稼穡以服徵賦謹詩

禮以保族姓無外驚無妄求弗變其父之
志以老其身以長其子孫是以士君子稱
焉夫元亨利貞之爲德猶春夏秋冬之爲
時也君子觀乎運序以自處則合於時措
之宐而不過焉方其以振振麟趾之賢處
富貴之極則大亨春夏之時也自其來南
族蕃以久非秋之利乎其在有道爲冬之
貞無疑矣冰至堅而不折雪至潔而不汗
凜然相看不接于他物誠得處貞之道也

予聞而善之故爲之賦詩焉

挺挺直筠琴岡之陰豈無春陽匪今斯今高空於
天下蟠地深不易其節侃侃素心豈無膚敏白駒
駸駸我獨考槃樂乎幽林堅冰在淵積雪在岑獨
往不廻悠然行吟采采紫芝園綺是尋還求陶生
撫我素琴邈乎古人副我夙欽

竹林七賢圖

瞻彼修竹下臨清流文石偃隄華松蔭丘植表界
壤翦茅宅幽梁度高巘臺隱中洲方床讀書異宮

同休詠歌相聞觴豆相求或時名藥或釣遊儵課
藝嘉植坐思遠遊濯纓微波看雲良疇逸而不放
儼而自修泰哉沮溺邈乎巢由按圖以觀永宐春
秋孰若五君遺其故儔糟粕塵世高踪莊周我懷
古人邈而違憂安得揮弦以招湛浮

竹溪六逸圖

悠悠逝川矯矯逸民攜書相從敷席水濱支頤負
暄揮羽却塵躡屐遠道隱几重茵幽響中發虛觴
載陳投我嘉實舍和茹醇優哉悠哉及茲良辰山

有鳴鳥郊有遊鱗濟濟以寧我懷古人

題汪華玉所藏蘭亭圖

衡茅負晴旭有客至我門共披會稽圖山水盛續
紛衆賢坐水次飛觴汎沄沄夷曠各有趣高閒知
右軍幽情付後覽陳迹感前欣悠悠千載來不異
更且昏探穴問神禹望海悲秦君逝者皆如斯死
生固奚云所以鼓瑟人思從童冠羣春服沂新浴
歸歟聊永言撫卷不知老遐思在茲文東南極積
水日暮多浮雲

寄題曹元賓尚書臨流圖王繼學叅政畫

昔聞適炎服中道臨清漪潏潏蕩荒日悠悠動寒
颼來者何滔滔逝者不可追聖有川上歎晝夜固
如斯解纓手自濯浩蕩忘險夷高人今摩詰萬里
同襟期抽豪寫幽思滯雨更題詩三年反田里春
河釋冰斯舟楫繫野樹灌沐晞晨曦上堂喜懼集
艱辛謝親慈入室換野服登山采靈芝庶以永年
壽豈惟療朝飢開囊見舊物感慨深係之歲晚金
石友看雲立多時憐我不共看寄言令我知來鴻

春苦早去燕秋易衰道遠不相覲加餐慰遐思

玉隆畱題

仙真治茲山重阜隱延廣冲與元氣會運至法靈
響與世作司命神宇廓弘敞及門春雨來玄感副
夙仰摩挲晉時樹託身何蕭爽千載抱微息日月
共來往欲爲黃髮期日待紫芝長上天垂光彩月
出江海上故人不可待惆悵理歸鞅

黃堂畱題

雲館息塵鞅夜間春雨聲溪水俯階長仙茅新綠
生曉氣動原野曠分見夷平神真昔叅合觀泉宅
幽貞儼然師弟子歲來會秋清遺民千載後高宴
從簫笙因嗟蚤好道晚歸濯冠纓矯首望遠海駕
言羽翰成神仙在平地崎嶇愧凡情太乙有移召
中洲良可營

記夢

夢行衡廬間千仞過蒼壁崇高仰神明深廣下不
測雲雨蓄盤礴時至如欲出網緼尚回旋揮霍忽
奔逸物怪匿岩穴懔若俟霹靂黑波汎高樹木葉

走崩石升身登玄間縱觀龍變跡俯視九州野草
木
有輝澤乃在風雨外手畫素三尺揮豪極動盪
落墨更沉鬱圖成示坐人共笑不可得顧瞻以脚
躄恍惚增歎息因之命肩輿出門聊有適大術何
舒舒白鶴從數客略經幽澗濱便上青松側憑高
望遠水雙景蕩虛碧拂石共客坐芳草藉尻膝忽
然聞鐘聲睡覺北窗席

次韻陳溪山椶履

頗憶蜀并西椶欄每易討披心割魚子束皮充羣

掃澗工巧紉履文織象花草輕鬆隔沮洳緩步得
堅好長跪獻圯下會期後三早知君貴賤履陟降
恒有道憐我涉世深垂誠不待造兢兢歷淵冰縮
縮奉師保時行不違矩庶慊歲年老

又

解鳥還上方歸山據枯槁禁足結僧夏陳編謝探
討隱几或過晝凝塵遂忘掃行庭不見人誰或踐
生草寔由筋力衰無復馳走好前年當此時嚴召
出城早追度龍門水賜見沙領道鼎湖忽踰年始

克罷趨造感君素履詠幽貞可長保番番茹芝人
長歌豈知老

又

六月乃屢雨良田不憂槁獨念桂林戍觸熱赴南
討道路備攘掠所過淨於掃縛人夜送軍吏卒何
草草蠻獠亦人類義利啓戎好尋原可制亂機要
貴及早夜來送者還頗言竭橫道諸軍四面集同
月約皆造誰爲飢渴謀性命安可保藜藿雖滿盤
對之令人老

浮丘公吟寄赤城陳道士入山有遇爲溪山

壽

浮丘生上古形神蓋不泯說詩秦漢間安知非斯
人世俗苦淺迫無能信真淳雨雲不待攷飛光越
窗塵豈知有道者千歲一息勻金精歷可鍊色重
無磨磷蒼蒼紫玄峰只尺天北辰神明寂已定尊
高此依因握機稟元化同流薄無垠所以赤城子
從師踐荆榛三周日却中志確神乃親廬間玉雪
相旭陽射光新稽首受餘啜骨換非昔民不遠恆

在茲睠然願知津先生早有聞爲恭若逡巡賤子
請執御端輓駕飛麟

爲變理普化題陳立所作龍眠山圖

變侯起高科得邑舒水上民淳事稀簡田野甚夷
曠戰爭遺跡泯山水良足賞幽棲南昌尉英爽赤
壁將古仙家白雲美人化黃壤岿岿龍眠山一士
獨可尚高懷托千載妙画極羣象向來讀書處春
雨草木長夷遊昔賢遠瑶席共來享彈琴坐終日
微泉散清響來者安可期徘徊以悵悵回圖記彷彿

佛聊以慰遐想

和陳溪山韻

幽人慎履古道思獨往瞋目登高臺浮雲不足
上丹砂煉仙骨沆漉濯神爽遠懷澄江靜耿若孤
月朗河漢自傾注山川逸遊想歛跡倦飛翼歸耕
故時壤好風從東來空谷感遺響詔書薦遺逸郡
府屬高仰聊持東湖水往助敬亭賞

和陳溪山送圃花韻

幽林有藜蘭菁菁秋不衰憐彼采藥人不識敷榮

時涼風動綠葉清露生華滋世傳神農經圖書竟
空披深根寄連茹藉以瓊瑰詞同心永爲好豈但
服食空先民昔有言所貴希見知舊聞絕行仙晚
有童孺姿南陽有黃華西山多紫芝度世未聞道
咀嚼空莖枝湛一保冲炁執御正不奇靈苗無助
長無爲以熙怡始信斷金利終古貞不移千載同
一息敢忘君子期

送空岩印公還徑山

東出楞伽室西望香爐峰曲折披翳藿蕭條倚枯

筇然燈共過夜曝日忽經冬天山斷綠想海國識
行蹤忘言及生滅抽簡托疎慵追憶塔中相表茲
雲際封螭父謝五鳳永護煩雙龍

題張觀海所攜虛舟竹所二毛圖

虛舟倚亭臯修竹相因依水木有清華魚鳥淡忘
歸鷺羣晚色靜鶴羽傍林暉似是鑑湖曲幽棲掛
朝衣古道日已遠昔人相見稀蒼茫寫雲霧蓬壺
是邪非

送龍翔高獨峰上人還金陵

承詔寫宮榜馳使出丹闕黃金射江海光景依日
月邇來垂十載感遇嗟白髮神靈在雲漢畎畝慨
明發祇園何潭潭夙志返超忽幽士任精舍諸妄
久息歇浩劫鑑止水高峰獨酋率觀察勝願力知
我心兀兀清風不可執振錫出林樾

送海東銛上人十首

用雲霞出海曙梅
柳渡江春爲韻

積水衆鷗滅春空藹餘雲掩室坐修竹天花散續
紛上人東海客來去何見聞飛錫還日下珠宮浪
沄沄

又

日色出海水千波散明霞一杯承足來九載不爲
賒要觀香爐峰折蘆長風沙微吟動林響蒼龍送
浮槎

又

我昔叅秦霞東望候日出子從日下來海水中蕩
瀟坐受龍女珠簾垂夜光室持還定何有長空斷
鴈一

又

爲法不辭遠遨遊歷年載衣中得故珠終夜動光彩還持一枝葦歸泛萬里海駕言乘桴行沙際如可待

又

旨蓄崇虛豆生芻長水署無堪餉遠客桑下若爲住行囊掛屋壁破榻夜風雨神光發慧劍耿射東海曙

又

燕坐共禪月行吟向孤梅有懷匡廬山老人岌崔

崑洗錚三峽水振木東林臺乘槎動歸思欲去更徘徊

又

山居如老禪坐致不請友何方簷下雲識我門前柳翠竹不礙山黃花紛在手未覺酬對難離妄亦無取

又

老胡昔東游勝士乃西度到岸無彼此不憚費筏屨要之心本空一了不移步龍宮解相迎黃金已

先布

又

百鍊成利器千金來海邦清霜凝秋水國士歎無
雙持正行正令魔邪孰不降觀子製名字高風凜
寒江

又

正觀覓心要律儀檢凡身密言轉相付海刹幾秋
春奇哉善根熟一徹無逡巡子來得何法歸報日
邊人

楚石琛藏主自蔣山歸却欲就叢林閱藏同
舟清江之上賦此贈之

手攜北山雲却上西江水月明洲渚生葉落風不
起虛舟不移棹寒波釣金鯉銀河轉碧落北斗去
天咫龍吟匣中劍虎躍弦上矢殺機誰敢當吹毛
豈輕試貝葉啓千函木榻脫雙履惟應勝壁觀悠
悠度年歲

題東郊山房

秀挺東郊山雲氣常覆之林丘翳幽潛流泉發芳

滋盤桓在中谷良疇漾清陂開堂直岡景長年誦
書詩孝友夙所敦求道遠有師雅志尚端潔凡近
諒難知康樂昔賜履詠歌足遐思啓書訪前聞往
跡無所遺瞻彼商澗松深根連喬枝亭亭植高節
鬱鬱含令姿衆木不同泯悠哉副深期

題蒙菴爲黃石谷賦

東南有高丘下臨萬家邑汪洋浹春潤沃衍盛秋
入群山入浪波起伏翠重襲靈運好奇險高平罕
相及幽人園綺間周覽度原隰隨山導清泉積石
拾層級結菴以蒙名果行信所執良時一來游朔
月九交十門當星斗高隴卧風雨溼一川燈火歸
賓從雜車笠登高愧能賦騰身竦山立

爲黃氏賦大雅詩

岐山鬱嵯峨鳴鳥昔有聞周公盛制作經綸以彌
文朝事接燕饗勸勞兼賓軍肅雝述盛德工歌贊
前勲流蕩桑濮靡何由返咸雲陳肆輒有見吳季
真不羣公子有古絃歷然宮徵分大雅忽有作青
春日方殷高堂以居之樂康永欣欣

已卯十月廿二日從安春郡幙嚴伯威觀南
軒新閣登舟有賦却寄同游者劉粹中賢良
茲郡多美泉小大各有神深潤浹溫厚草木何光
新披圖閱名世顧皆仙佛人退儉寡外驚懷哉此
良民退之文旣遠泰伯學未醇昔我朱與張遺言
存縉紳東湖有新閣下臨南澗濱周眺忽已晚皎
然仰空旻虹梁亘溪流落日車馬塵曾丘間叢祠
鐘鼓嚴昏晨江潭嘆搖落名邦感安春爲治古有
道川原隨所因華構相爲雄大雅竟誰陳移舟古
峽口西望蒼嶙峋浩蕩無與語逝波絕垂綸

秋堂

秋堂者臨川吳生文明之親舍也生才甚
清美賦詩婉麗無塵滓之汨觀其同門未
之及也昔胡邦衡以詩人薦朱文公大儒
豈以玩物以成名哉性情之正冲和之至
發諸咏歌自非衆人之所能而士大夫各
以其見見之耳生未可自喜自畫也是以
爲賦秋堂詩云

門巷多囂塵秋堂獨高深有子能讀書幽懷發微
天高風露下澗泉落危岑神仙絕飲食穢濁無
心沉所以聽夜誦共愛風滿林神清易以哀情長
恐成淫大冶昔有作九牧歸吉金爇樞下五石工
成振鴻音宣風萬物暢神祇肅有臨鳳鳥鳴岐山
人文示來今候蟲入床下嗟哉苦勞心

又

清風拂高堂舊席忽已除下堂具甘旨上堂列琴
書垂紳夙夜至再拜問起居誦詩已三百習禮少

壯餘納交君子室執御長者車爲樂古之道誰能
咲其迂

題雪泉齋

長河沍凝合微泉自温活蛟龍依以生抱困待春
發南雪不到地流泉常在山飛英散絕澗流漸響
潺湲融結各有方不息在無二觀茲係深長乃得
養生理濯尊薦寒冽春陽向熙怡君子遠莫致永
言以相貽

平江開元雪牕光禪師訪予臨川山中其歸

也予與賓客用一雨六月涼中宵大江滿分韻送之不足予爲繼之而予分得一字

積雪何處高蜀山最嶺萃海東
極孤絕目送斷鴻一徘徊
杪櫂樹冥坐但空室園果隋
宿雨當晝從定出八月露水繁
石鉢滿華蜜相會豈無因分床便深密

賦彭氏靜深堂

君子憺無欲淵然事幽潛
貞居觀物初天機引休恬
寂寂象愚朴容容無駁狀
羣動不知止謀思隋

鈎籍反息不及踵乘舟膠漸漸
豈知本湛一不與利欲兼
圖書發聖緼受命乎不占
戒慎保靈秀先幾發微纖
進善取損益閑存日惟嚴
浩浩厚有積悠悠寢何淹
盈科以時行小人慙屬饜
虛堂積雨霽光風草侵簾
空洞溥龍澤止水澄秋蟾
善學在年富勇哉副遐瞻

秋山行旅圖

春夏農務急新涼事征遊
飯餽旣盈橐治絲亦催裘
升高踐白石降觀索輕舟
試問將何之結客趨

神州珠光照連乘寶劍珊瑚鉤乘馬垂首荷縱目
上高丘策名羽林郎談笑覓封侯大行何崔嵬日
暮摧回轉古木多悲風長途使人愁羸驂見木末
足倦霜雪稠谷口何人耕禾麻正盈疇出門不及
里酒饌相縹緲壯者酣以歌期顛醉而休安知萬
里事有此千歲愛

爲題馬竹所九歌圖

屈子久去國行吟山澤秋思君不復見婆娑感巫
謳仰瞻貴神遠俯慨淡篁幽衝波起浩蕩玄雲黯

網繆初陽翳扶桑莽蒼蕩海漚渺渺君夫人遺玘
在中洲壽夭乘陰陽孰知制命由慨然長太息
歌寫離憂想象以惆恍開卷令人愁

清明山房爲危太朴作

矯首望太清正色蒼以玄皦皦何歷歷日星高轉
旋游塵雜氛氣起滅尋丈間容光見擾擾孰與爲
控搏所以學仙者凌空恰妙顏質化入常寂凝暉
托空山據會觀往來生死何足患妙哉太朴子難
爲世上言

次韻太朴良友對何仙舟讀書山中見懷之

作

得謝荷休澤消搖在巖阿結廬庇風雨樊圃寒藤
蘿塞坐古人書日夕猶詠歌追念少壯日玩愒亦
已多兢兢事補塞奈此遲暮何美人百里內邈若
隔山河興懷貽好音縕藉三春莎報言慎芳歲卷

石崇巍峩

伯生詩卷五

終

虞伯生詩卷六

江樓看劍歌書趙子昂劍銘後

豫章高秋宴高閣乃出此劍相娛樂當時冶鑄絕
精英土蝕沙沉更銷鑠遺質所存如冷電江光不
與晝光却神光內閎氣逾深識察誰能動冥漠等
閒千年不一試壯士酣歌謾揮霍嗟予衰朽雪滿
顛空對涼風起天末或言江中有蛟壁當煩仙人
下寥廓吾故臨風拂其鏑俾伏崖陰無敢作

劉忠肅公之四世孫中書舍人諱震孫之曾

孫益之題其居曰雲松巢予家與劉氏累世之契故爲書忠肅公文集之首詩三篇并賦此詩與之

丞相昔遊泰山頂天風浩浩春晝永玉檢微茫不可求但覺靈霞熟丹鼎白日人間如水流前代衣冠成古丘悠悠憂患何足計直道千年橫素秋徂徠之松數千尺東連海上莫烟碧中書偉人如玉立每向南風望東北濁世公子何翩翩却憶匡廬還謫仙夫容出水耀初日五色光新天爲妍我今

僑居廬阜側西視峩眉歸未得豈無雲錦晚相娛月落終懷雪山白森森喬木魯東家河間禮樂更光華勿忘先世舊遊處吾秣爾馬膏其車

吳興趙子昂十馬圖

昔在祕閣見十馬云是韋偃之所画此圖位置略似心神偶同豈臨寫馬種本自渥洼來濯濯清更瀟洒常恐一旦風雨至感踏波濤遂神化豪意氣今豈無未見深沉如此者君看最後臨岸自是真龍無世價

畫馬

白年升平却走馬立仗天閑常見畫蕭灘灘頭八
十翁却寫西來大宛者高蹄如鐵項如鈎風鬣蕭
蕭首齒秋常見貢來騎不得長嘶要蹴崑崙丘

題畫

連昌宮裏古墻陰積雨過春黃竹深老樹無枝交
屈鐵立石有書名錯金吮豪池上寫幽鳥承恩春
日風光好當時執戟今白頭却對蕭森倚秋昊

空山歌

高空之山聶公宅稚川作圖纔數尺秋天薄雲千
仞表春雨喬林百年物憶昔侍郎鎮成都將佐盈
庭賓客趨錦官城外笳鼓發駟馬橋邊高蓋車先
廬舊在小東郭丞相祠堂同寂寞嚴公同訪杜陵
家退之亦到淮西幙峩肩峩久不歸江水娛人
秋日暉坐看蓬萊變桑海自古南城天下稀公子
親迎陳氏館我初至撫猶弱冠看君揮翰甚風流
豈想重逢鬢毛換君言中間一再來數見先公胸
次開鶯花風雨必求友水竹園林持酒杯嗟子晚

歲始能退寧有文章驚海內平生不受簡書畏故
家高致君應最圖中山色積翠濃雖欲舍子將焉
從蜀人相如最能賦行倚山木歌高空

爲燮玄圃題鼇溪春曉圖

夫容山陽萬家邑石嶺戴轍縈紆入溪水西行夜
雨深連村桑柘春雲溼昔因荒迥少官府日莫狐
兔作人立自從置縣二百年稍有衣冠更俗習讀
書進士比舍聞潤屋黃金亦家給山中白日浮雲
多負乘因仍足車筇燮侯世胄國勲舊賦策君門

恥沿襲朱衣作監列星宿遠人豈意高軒及援琴
不鼓書牒稀彈鋏無魚賓客集衣使者停車見
黃堂大夫下床揖登高望遠送飛鴻攬轡駸駸度
原隰人言桐鄉人愛我我愛桐鄉重於悒畫圖千
疊山木稠芟舍蕭條莫忘葺

題馬竹所畫

霜清木落江海空一棹歸來何處翁雙松千歲如
鐵石爲爾回薄旋天風憶昔神龍劔所化夕卧滄
波弄明月望中冉冉雲氣生直接銀河上瓊闕

霍元鎮規模董北苑米南宮父子寫山水雲
物殊有標致見示春江捕魚圖賦此

春江聚網萬魚急漁人相歡魚相泣負薪深山何
處樵利害相乘不相及海鷗冥冥秋影微黃葉江
南一棹歸人間得失兩無迹不廢山水含清暉

南岡

華蓋三峰立天表山北山南未了曾看雨雲出
太虛幾送餘霞落飛鳥岡頭盡歸露未晞梧桐鳳
皇相因依卧龍之孫思外氏張望輝光生翠微

題何大夫回馬

國朝画手何大夫親臨伯時閱馬圖伯時絕憶鐵
面語放筆驕驕懷此都此都大夫八九十千馬萬
馬在胸臆偶然數鬣落江南捲束上箱謝槽櫪

同開先南楚悅禪師觀息齋画竹卷於崇仁
普安寺煜公之禪室蓋煜之師一初本公所
藏也因記延祐甲寅息齋奉詔寫嘉南楚與
之同寓慶壽寺惠予時爲太常博士俯仰之
間已爲陳迹乃題其後云

嘉熙殿裏春日長集賢奉詔寫蒼筤邇來二十有五載飄零殘墨到江鄉匡廬高人昔同住每見揮毫鳳鸞翥木枯石爛是何年修竹森森長春雨

題村田樂圖

尺素自是高唐物瑩如秋水空設色何人画此畎
畝間二三老人若相識茅屋蕭條古樹下農務未
殷牛在野或怜鸚鵡脫籠繫或弄獼猴笑真假老
翁政自如兒嬉高髻襁負相扶持古時扮社祀田
祖移饌高亭隨所宜抱甕初來未貯酒亦有生鶩

宛延首村優競攜樂具至犬怪雞驚兒拍手拄杖
出門欣見賓雜華滿庭生好春歲時無事得如此
擊壤何必非堯民騎驢過橋殊矍鑠攜具荒陂來
赴約定知張果千歲人遊戲人間共盃酌

柳塘野鴨

江南水退秋光淺風柳參差萬絲捲鴛鴦在梁鳧
在渚蕩蕩扁舟去家遠千艘轉海古長策白粲連
江動秋色斷蒲折葦野水闊爛爛明星且將弋翠
盤擎露夜深寒玉色亭亭落月殘太液池頭黃鵠

下夢中曾見画中看

丙吉問牛喘圖

少陽用事春猶淺丞相公行問牛喘三公職事知
者稀嗟彼德微蒙策免天子有道守四夷中心無
爲日萬幾遠有甸服近有畿夙夜明哲發裳衣

江貫道江山平遠圖

江參去世二百年翰墨零落多無傳人間幾人寫
山水誰能意在揮毫前昨見石林舊家物春雷疊
嶂初破墨我和葉詩頗豪放三者相望都突兀險

危易好平遠難如此千里數尺間高雲舒卷非散
地麗日炫耀皆名山我持美脯酒一斗墨汁盈盤
可濡首江生精神作此山向山呼生當至否高秋
銀漢天無雲帷中冷然來夜分黃茅嶺頭華蓋頂
画我獨訪浮丘君

爲汪華玉題所藏長江萬鴉圖

雲巢幽人愛江渚抽思揮毫寫橫素波瀾不驚潦
水盡秋氣晶明絕煙霧征帆去棹不相襲岸曲洲
旋總堪賦孤村城市僅如蟻百丈牽江直如縷蕭

蕭木葉洞庭波歷歷晴川漢陽樹蕪葭宿鴈天欲
霜叢葦寒鴉日云算就中樓觀何王宮想見華年
貯歌舞丹青倒影駭靈怪粉黛含情怨幽阻青春
遊子澹忘歸白日冷風帳中語人間遺跡何足留
最惜精思墮塵土郭熙平遠無散地小米蒼茫托
天趣銛鋒鏑戟不破墨刻畫晶熒昔誰苦渤海細
書藝文草精絕戈波絕回互南唐後主萬鴉圖點
點晨光動毛羽昔年曾見今日昏雖復逢之亦難
睹江侯此卷出故家相示摩挲極愁予香奩犀軸

見者稀謾錄餘情示來者

盤車圖

大車嶙嶙牛駕輓西望大行雪千尺往時飛輓實
長安百兩仰關過阡陌亂流十里九屈曲水濺車
箱沙沒轂前和後應日云莫王事有程車下宿旂
旒央央昔臨洛東南會期出方嶽侯伯有位賦有
差載幣瞻迎來若若君不見海艘百萬乘天風京
坻連雲多腐紅天子視朝大明宮千乘萬騎來何

雄

贈羽士費無隱

東望雲林三十六聞有仙人結茅屋清露零零采
紫芝白雪深深斲黃獨國初山下苦流離義士傾
家救世危百年孫子俱華髮誰解燈前說舊時聖
恩深重絕征戰猶慮寒溫資瞑眩身着黃冠寫古
方薄素細書三十卷相從寂寞久者誰禹穴山頭
一布衣鬢如鴉羽顏如雪跳入壺中夜不歸市人
扣門呼不應光影俱消聲色泯但言解隱不言無
不道本無何所隱我欲作丹須水金人間無藥不

堪尋青霞如練還相覓華蓋衝天文室深

題漁村圖

黃葉江南何處村漁翁三兩坐槐根隔溪相就一
烟棹老嫗具炊雙瓦盆霜前漁官未竭澤蟹中抱
黃鯉肪白已烹甘瓠當晨粲更擷寒蔬共萑席垂
竿何人無意來晚風落葉何毳毳了無得失動微
念況有興亡生遠哀憶昔采芝有園綺猶被畱侯
迫之起莫將名姓落人間隨此橫圖卷秋水

題韓幹畫馬

韓生觀馬十二閑時寫一二傳人間坡翁嘗來伯
時宅見此遺迹開衰顏前行如雲塵不動後者追
風絕飛鞚昔人能事已可能始覺賞識非虛諷昔
觀祕府韓絕少得見龍眠已驚倒使人讀詩如見
畫人中豈復生坡老五雲之中天上奇代產明駒
天子騎神明尚令後古見莫歎韓生非畫師

題黃都事仲綱山居溪閣圖二首

出山作官十載餘聊托筆墨懷幽居連雲一一列
肩黛細雨往往逢樵漁隣家父老每載酒隔屋弟

兄皆讀書我久居山不待画獨念稚子扶犁鉏

又

閣前流水秋愈深故人東來還見尋方舟直過彭
蠡澤把釣坐對香爐峯雲中煙樹差可辨江上鄉
關誰與吟我欲芳蘭寄遠者日暮天際多輕陰

題秦虢二夫人承召遊華清宮圖

貴人竝鞚如輕鴻承恩馳入華清宮道途先不止
行客策蹇奔趨烏帽風奚囊墮地何足拾豈有篇
章浪相及画史當時妙墨傳光彩流動狂情急君

仙生詩 十
不見白頭拾遺徒步歸明眸皓齒事皆非朝天泥
河袖封事高閣雨餘宮漏稀

方壺画山水歌

方壺之山在海中世人欲見知無從壺中仙人憫
昏濁綵筆手開三五峰亭亭兩箇老松樹萬壑千
崖閣今古憶昔長從王子喬坐聽秋風最高處世
人画山非不多不識真山奈若何君看崑崙上丹
穴芝泉玉樹森婆娑東望方壺應不遠飛度九州
如過電便從海上問金公莫待浮杯水清淺

示囧

憶我蚤歲離親側足自踈踈心惻惻中年祿廩不
及養人羨清華已驚惕歸來老病五年餘閔子謀
食躬犁鋤蓬蒿羅生果菰異蛛網微細仍縈紆星
河江上喜非遠况與良朋適我願故人念我一相
見暑中尚慎施樓轉

玉隆宮所藏宋乾道宸翰雲壑二字

昔者雲歸壑天章自九重日華常映鳳山氣盡成
龍俯仰遺陳迹高深儼德容飄然化春雨結想在

高松

寄忽承旨

投老清江外依山結數椽扶藜循水竹把筆賦雲
煙歲熟無憂食秋清不礙眠故人相望遠北極在
天邊

寄三衢守馬九臯

聞道三衢守年豐郡事稀詩成花覆帽酒列錦成
圍鶴髮明春雪貂裘對夕暉扁舟應載客閒聽洞
簫歸

題朱澤民山水

積雪山陰道嗟峨筆底生雲門見童子禹穴闕蛟
精高卧人何在幽情幾詠成杜陵空想象晚飯拖
樓晴

寄題汪道士草亭

飛白妙娉婷新題炤草亭仙遺相鶴法客借換鵝
經霧雨歸懸黍風雲護茯苓遙知春晝永深坐養
黃庭

黃敬延送竹本

分得瀟湘玉森森忽滿林香爐來曉色石檻借清
陰好共芝蘭長毋令草蔓侵清風月如晝老朽要
長吟

聞鴈

樓近煖雲溼夜深歸鴈低聲音燈外盡羽翻月邊
迷冉冉白榆上悠悠黃竹西應逢穆王駿春草一
長嘶

錢舜舉畫

一樹花如雪清明客未歸坐看黃鳥竝夢作彩雲

飛翠袖寒猶薄羊車過絕稀相如能作賦月下卷
白衣

山水圖

之舟桑落浦望見香爐峰野水常欹樹山雲不礙
桃源攜客覓松徑與僧逢爲託荆關輩添予九
節節

丹霞觀黃知微畱別

無館隔溪津過從厭市塵振衣清露曉拄笏野亭
春歸作芝田主思存黍谷神松華頻寄取老去欲

輕身

題馬竹所画

老樹依江岸歸舟傍釣竿水花看晚淨風葉識天
寒鴈字來千里魚羹付一餐遠山青可隱日下是
長安

題曹霸馬

將軍今爲庶画馬寄高情聚立天風起長嘶沙草
生飛揚萬里意凌亂五星精日暮太行道悲哉長
短行

答陳溪山元日卽事

積雪埃塵淨光風宇宙新聞來知惜日老去善酬
春退密觀羣動憑虛集百神真人起居法無一是
違仁

送客北門晨登山木閣

辰登山木閣零雨煖於春溪水解畱客梅花偏炤
八秣香知酒熟市遠覺民淳此地堪娛老惟愁度
頻

次韻陳溪山

以棹避殘暑開樽就夕陰冥鴻聊自達幽草若爲
離索連三月棲遲共寸心遙怜溪上晚扶策獨
深

又

小興忽忘遠相思知幾何未便塵事少謾悔世緣
朝食烹芝菌秋衣製芟荷平生但隨運何地不
在陀

杏園詩爲黃思順賦

口樂多陰德名花種滿園暄風吹雪盡暑雨綴金

繁臥護煩仙虎分嘗任野猿佳兒足文學食實似
桃源

寄題樓撫山普潤禪寺

寺在撫州城南八十里唐普潤禪師道場
師姓翁氏元和元年二月八日坐化於潭
州有靈異州人就肉身裝塑後現夢撫州
太守迎歸建寺至今遺體堅固如初靈應
尤著

高人出世間未忘鄉里思靈骨萬里還深恩千載

遺嘉穀歲恒登羣生無癘疵古刹抱禪悅高丘依

毋慈

寺右有師母墳名翁家林即師故俗家

崇構起積廢新堂納華

滋

今長老秋雲富公所建

東鄰有一士峩冠誦書詩

謂表徵君誠夫

清秋約杖屨千步攀松枝

寺後有山名千步

寄題許愿夫抗雲樓

城居苦迫隘層闌上岌峩措身方丈間千里心目超可以抗浮雲誰能顧塵囂儼峴有古臺遺碑正蕭條子固若星斗其魂安可招龐公輟耕際頗懷見凌霄賦詩托飛鳥長空何寥寥

贈劉無作

袖中殘卷在動是十年前逝水從前輩傷情有妙年博聞誰共學孤坐獨求禪莫恨相知晚文章倘為傳

又贈劉無作

一家俱學佛之子更劬書諸老交游徧真乘究竟餘治生惟淨業志養足嘉蔬為問龐居士成能更久如

虞伯生詩卷六

終

國家圖書館, NATIONAL CENTRAL LIBRARY, TAIWAN, R.O.C.

虞伯生詩卷七

與燮元溥登仙遊和李浩卿韻

老去江山已倦遊。況聞風雨滿溪頭。擬尋黃鵠望
松壑。聊伴白鷗經稻疇。山崦有雲堪作供。酒樽無
婦可歸謀。從教賓客回車晚。畱取衰翁專一丘。

陳可復爲予寫戴笠圖賦詩四首

浮雲滿空無所依。高岡獨行來者稀。仙人冉冉遺
松老。鳴鹿呦呦生草肥。伐木遠聞何處谷。頃筐近
得故時薇。山中雨來霧先合。此日先生戴笠歸。

又

南園多竹暑氣微始來結屋相因依掛巾石壁晝
霧溼沐髮池水朝陽晞頻年車馬踐霜雪六月裳
衣無絺絺鄰翁問舊坐來久此日先生戴笠歸

又

老去懸車百慮灰西風獨愛菊花開田家酒熟邀
皆去茅屋詩成懶更裁欲及天清飡沆漉要觀日
出上蓬萊赤松有約應相待此日先生戴笠來

又

捨却鄉人駟馬車老身全不要人扶雲霄一羽山
頭杜風雨孤村海上蘇薄命長鑱隨積雪多情破
帽落輕烏莫圍玉帶垂朱紱此是先生戴笠圖

仙遊道士余岫雲爲從珠溪余隱士求得華

山下黃茅岡一曲規作丹室喜而賦之不覺

五首

華山東下有茅岡云是毛公舊隱場清露尚餘丹
滿白白雲今許草爲堂冬憑野燒開畬隴春託山
雷淨石牀從此便爲千載計洞天先拜紫玄章

又

茅岡地主古醇儒，乞我岡頭作隱居。嶺上閒雲從
管領，澗中流水聽開除。刀耕火種從茲始，雨笠風
瓢便有餘。自古詩人多會合，浮丘毛氏不愁予。

又

石人屹立古仙壇，雙澗交流拱一盤。臨水種松須
匠匠，就中作室要寬寬。洞經卽日真訣玉，白逢
春浴舊丹却恐山中添故事。題詩莫與世傳看。

又

仙遊辦得茅千束，華蓋須分屋數間。微咏上經忘
我老，謾調金鼎勝於開龍雷。變化從舒卷，鶴露清
寒自往還。何似綺園諸老者，採芝初不離南山。

又

茅岡初割一溪雲，玄契華陽舊隱文。謁簡自題香
案吏，封章先報大茅君。種成和露桃千樹，借與摩
霄鶴數羣。便是宸清真洞府，不煩夢想託紛紜。

崇仁監邑阿里仁，甫茉莉花盆中折竹插之。
而生枝葉。近年翰林學士薩公謙齋作御史。

時亦有此瑞朝之士大夫引寇萊公故事以爲徵名其堂曰瑞竹而咏歌之薩公仕東南歷郡守部使者所至有仁政著清節美名耆壽今爲中朝老臣瑞蓋不虛發也仁甫長邑三年清介明恕孚于上下此竹之生父老庶士爭走山中相告因取而觀之畧寫其狀賦詩以美之

華盆插竹忽生根枝葉青青向曉暎直節有生資地力虚心無愧荷天恩薩公堂上今重見萊國祠前孰更論但得清風千古在常扶筇杖看淇園

撫郡天寧明極覺講主陪敬齋監郡奉祠華蓋特有高詠三讀敬嘆僕偶共清游輒復次韻衰退不工聊資笑粲

三峯宮殿接新橋十月長齋陟翠巖朝步仍垂蒼玉珮登歌還引紫瓊簫千枝絳蠟連虹貫五色香雲向日飄賴有高人陪後乘輕清詩句似參寥

鄧公信吾契家賢弟比奉憲臺書幣存問衰朽于山中其還也無以爲餞賦此與之

二首

幙府秋高寄遠情飛鴻肅肅度江城深慚衰朽勞
人問豈有文章與世驚疏傳多年餘賜盡揚雄已
老太玄成憑君歸致殷勤謝擊壤田間荷聖明

又

故人將命清嚴地越陌經阡枉見存松菊荒蕪慚
重客裳衣顛倒出柴門老忘舊事尋書卷喜走鄰
家覓酒尊此邑故家無幾在更崇令德及諸孫

安成劉雲章漢章兄弟兩秀才來訪一長書

一長詩皆有志文學賦此爲別

步屨東行好弟兄束書銜袖見才英只愁困學孤
來問豈有奇聞外素誠知道言辭無詭妄及人事
業匪縱橫名鄉自昔多君子珍重歸來在矯輕

壽陳溪山生日

西來羈客作南居來往風流舊不疎好句每容鄰
曲寫高情不解世間書溫溫中夜還丹鼎冉冉高
仙畢道車千歲相期真有約九天風露壽尊餘

秋日同朋游北塔山 三首

縣西北塔極蕭疎投老能來幾度餘山木已隨樵

斧盡屋塵猶護醉翁書遠懷天上多騎鶴近愛槎頭可釣魚九日懸厓多細菊可能無意再巾車

又

縣道蕭條北客疎西人居者亦無餘春尋道士松花館秋覓山人柿葉書太史闕文誰借馬相君退食尚烹魚何因得似先天叟維下人家揔駐車

又

歸田多病故人疎好客相逢樂有餘老去深盃那解飲詩成大字尚能書門生去上青驄馬道士歸

騎赤鯉魚如此餘閑多樂事誰能七十始懸車

送尼山廟學彭山長

尼山新作素王庭春告成功用上丁徂徠有松充采斲靈光何殿效丹青風霆形氣皆垂教金石文章具刻銘天子萬年綏福祿曾孫奉若薦明馨

游洛湖田舍

近郭林泉無可游行尋田舍逐徵流春眠稍可遠鐘鼓秋熟或能求豆區萬里橋邊祠廟古百花洲畔釣船幽兒童不愛憶鄉里老夢時時還故州

題范德機詩集後

抱膝長吟老范兄寒巖古柏兩同清東都高節鴻
毛遠南海真仙鶴骨成遺藁飄零存梗槩孤兒孱
弱賴高情若無塵外知心友千古誰聞出世名

溪山翁所居與小雅易君相近翁與余賦詩

易君之季子至善輒隨錄之遂成巨帙賦此
以答其美意云爾

橫塘烟雨易東家翠竹娟娟映白沙絲筆徧題詩
滿卷繡簾長對樹交花往來二老隨天分爛熳三

春感物華却問綺園商嶺外曾無高咏到烟霞

題徐孟俊屏山閣

題詩遠寄屏山閣回首人間二十年西嶠依然仙
子館東湖還載隱君船同時翰墨嗟誰在滿屋詩
書嘆獨賢欲買一舟江海去遠看喬木翠參天

送易用昭

詩成長是倩人書最愛東家織翠裾遠樹斷雲春
雨外華星明月晚涼初滿牕柿葉題都徧短帽梅
花畫不如莫向墨池成久別鷺羣還欲謝崇虛

和陳溪山雪中雪晴 二首

柴門積雪未全開
千樹瓊林豈異哉
鉛鼎微溫過半夜
玉經細咏却千災
江南冰向川流合
天際春隨斗柄回
太華高人觀物表
詩成先寄鶴飛來

又

東風先散息寒威
病骨欣然解帶圍
日照瓦溝生淑氣
冰融硯沼漾晴暉
銀旛試戴花枝弱
玉鱸新嘗菜本肥
尊酒欲爲君子壽
除公誰是兩忘機

和陳溪山立春後三日卽事

夢朝金闕見明晨
滉泱泱間積玉塵
三日新春三日雪
一分深雪一分春
柳條封盡芽如粟
梅萼飄殘實已仁
欲破鳳團銀盃凍
冬溫且酌井泉新

寄陳奉常 并序

昔聞朝廷寧廟升
祔奉常陳君新甫以世胄之貴游博洽之高誼特奉明詔出使江海之上采上金明材擇良工絕藝新作禮器樂器求在郡國之書與通樂律之士以備一代之盛典焉鴻儒碩彥感嘆其委任

之隆非尋常效一職治一事之凡近而已
故賦相餞奇辭瑰句傳乎四方何其盛哉
僕泊然老懷未忘舊俗亦成一章奉寄

新廟工師謹駿奔奉常承詔出修門鑄金就徵楊
州貢觀樂應求季札論功德頌成諧鳳鳥文章篆
定刻瑤琨千年制作于今盛擊壤猶慚荷宿恩

集自郡城歸溪山翁寄詩并和申字韻垂教
依韻再呈殊愧遲拙 二首

暮春長日雨兼風買得江船未及東出郭故人邀

杜老輟耕田父訝龐公謾從修禊志溪曲何用安
車徧洛中且起紫芝行復長詠歸先與謝崆峒

又

待客花陰午過申茶香榆火一時新千竿嫩綠搖
輕暑數萼餘紅墜晚春坐憶雲林行道迹夢遊仙
島意生身連根分種如冰雪來向清池對玉真

謝陳溪山送蛾眉豆種

種豆南山憶故鄉蛾眉分種喜封囊底須飛鵲能
銜子未許蹲鴟共淪湯玉椀茶香分瑟瑟瑛盤櫻

顥間煌煌然箕煮金催詩句更約鄰翁共佛床

已卯秋舟過清江憶范德機 二首

歸來江上鬢如絲所謂伊人獨繫思千載清風東
漢士百年高興盛唐詩離離宿草秋雲斷采采黃
花夕露滋山水含暉無盡意他生何處共襟期

又

玉堂風日擅揮毫海上馳驅嘆二毛太傅竟無宣
室召拾遺空署華州曹孤兒衣食交遊古百世文
章墓石高車過不畱應腹痛寒泉秋菊賦離騷

宜春臺晚眺

長沙王子舊層臺古佛神龍寶殿開秋水繞渠三
峽漲春雲垂雨大瀉來萬家香火網緼合四而峰
巒紫翠堆最憶老藤陰覆地空中幾見異僧迴

廬陵歐陽德器游京

以所藏先世誥敕見原
功於玉堂賦此以送之

充公孫子不離鄉封誥于今幾世藏恩數重懷全
盛日標題猶是故時囊遠從史館求同姓未覺輜
車滯一方昭代治平多制作討論應及漢文章

送黃子勛

作生詩

又九

汲古閣

從師學道暫辭親百里西來動十旬夜讀松林堂
下月晝吟梅夢坐中春每欣老筆蛟龍走亦愛幽
居鹿豕馴春服蚤成還再到永歌同向澗之濱

書武進縣學記後

縣令之職有社稷民人之寄不敢以百里爲小也有政焉有教焉不可以偏廢也陳君子瑛治武進修學校馮彥思記之可以知其所系之重矣崇仁之士觀乎其記蓋亦有所感而不及爲者豈非天乎因邑士之意賦詩以書其後云

從容文學聖門優惆悵吳人獨子游百里絃歌誰
濟濟千年禮樂付悠悠邑人此日傳新記弟子遙
知憶故侯何事紫芝三秀地空聞疎雨過新秋

己卯臘八日雪爲魏伯亮賦

官橋柳外雪飛綿客舍樽前急管絃僧粥曉分驚
臘日獵圍晨出憶殘年白頭長與青山對華屋誰
爲翠黛憐唯有寒梅能老大獨將清艷向江天

又

漫空飛絮散輕綿所異寒威欲折絃縣令溫存僵
臥叟詞人解頌太平年剪雲爲葉煩相寄種玉成
田不受憐丹鼎溫溫千歲熟樂天事業在知天

寄賀吳宗師七十壽旦

月三詩

卷七

七

開府希年正樂康聖恩錫宴在斯堂歲周二十逢
熙洽年接期願披寵光劍珮摠從仙苑集簫韶還
就洞庭張簪花當日今誰是試向雲籤閱舊章

又

舊德高年荷聖恩幔亭如宴武陵君松喬能壽多
深隱園綺來朝只暫聞千歲天邊觀鶴髮五雲日
下護龍文山七日陽初動遙禮三台過夜分

和陳溪山元日後雪

瓊妃剪水散春天坐下先迎華嶽仙飛步摠鳴蒼

玉佩閑居能檢白雲篇朝元閣近星辰北獻壽盃
深雨露前白髮舊時香案吏幾迴七日是千年

撫郡玄都觀羽士黃一初自京師還得大
宗師吳公所爲和詩三篇其一故翰林學
士吳先生廿年前廬山中所賦其一則和
天師所與詩其一則予在茅山羅山第一
谷中送一初詩也臨行大宗師囑之云到
臨川卽以示予也忽復一歲一初又將北
游却賦此一百六十八字託一初謝大宗

師古道高誼也

和吳先生韻

世外神丹起積疴
牕塵坐見月明過
侯生猶識遺經草
梁甫空成鼓缶歌
柱史通家今昔少
番君分祀子孫多
淒涼遠寄懷賢咏
譜入朱絃久未和

和天師韻

白髮高居古道山
蓬萊雲氣隱垂環
尚方徧識前朝履
特進仍先法從班
桃李成蹊春日滿
風雲繞坐晝陰閑
梅仙舊隱玄都館
紫陌紅塵有客還

自和韻

荒陂野色帶餘曛
隴上時逢植杖耘
靈囿鳳麟千載去
玉階鷓鴣此時分
誦詩自託浮丘伯
垂問長勤大隱君
爲報黃茅岡曲舍
簷端盡日宿浮雲

贈武夷道士羅鑑空兼憶范德機

學道應須住武夷
青山綠水不勝思
九天清露三生夢
千古高情兩鬢絲
羽客鑑空猶有鑑
故人詩後更無詩
懸厓仙骨堅如玉
明月長歌覓紫芝

題張采石新造觀瀾亭

雪嶺春融萬里來浮雲天際兩眉開魚龍夜水星
前起風雨春潮足裏回尊俎誰陪賢太守文章莫
媿昔英才無邊李白登臨意更覓遺碑步紫苔

某與胡伯友書問疏濶稍久因楚石藏主待
謁翹仰高誼賦寄此詩

喬木千章萬壑秋使君清興在危樓星沉夜水神
魚化霜落寒汀宿鴈留紅袖烏絲酣楚客畫屏銀
燭看吳鉤不知肯著枯藤杖采采芙蓉涉遠洲

贈楚石藏主謁饒心道六有先生

不識南塘第幾橋翠樓華屋上岿嶷古文獨許揚
雄識幽興誰爲杜甫邀伐木春聲生澗谷涉江秋
影蕩蘭蓀散花如雨攜雙履解與高人話寂寥

十月朔旦同監邑大用暨僚屬游北塔山
敗壁殘書五十年重來山色尚依然田疇稍稔農
民喜官府多閑令佐賢黃菊不差蓬鬢改清尊一
聽酒盃延坐中有客天邊去金榜春風待鴈傳

九月與薛玄卿外史會于黃氏溪園陪坐溪
山先生談玄觀古仙像

自昔簪纓盛邑東新堂還見百年風兩人白髮驚
先老一客玄裳喜暫同食飲具陳先世業耘鋤全
效野人功談玄不及紅塵事盡日溪園樂意中

會後將登華山按茆岡玄卿先往候予至

石斛金釵感素秋洞懸鍾乳入山幽扶衰不是人
間藥聞健聊爲物外遊雲作衣裳塵不染詩成珠
玉世誰收石人久立黃茅月歲歲能來爲客畱

予與玄卿相遇山下別後和朱德嘉韻奉寄
重厯賡和再用韻奉謝

茅岡七疊七香車誰賦新宮蔡少霞千歲畱蹤丹
井曰諸天獻供菜羹瓜石人兩立春衣溼崖蜜蜂
來晝樹譁憑仗仙翁須一到浮丘已遣鹿銜花

和朱德嘉登華蓋山有賦韻寄薛玄卿和詩
未成登山已遇玄卿下山道中足成以寄

相期秋晚命柴車同看華峯散綵霞農父苦畱杭
似雪山人先許棗如瓜蛟翻巨石痕猶在鶴立危
峯語不譁邂逅不畱知有意林臺菊有未開花

縉山張君榮字仲華來丞撫之崇仁歷兩政

六年心平氣順上下相安如一日雖有遠役重勞亦無闕事甚可稱也予之間居相愛如故舊每懷扈從東道往來縉山道中見其風土之勝民俗之美未嘗不談道以爲樂於其受代調官京師因記之以詩而與之別明年進秩南來觀舊治父老兒童相迎於東門之外又當歌此以爲一笑之歡也

昔從時巡出縉山翠畦綠樹畫圖間驅車百折龍門險載筆千峯虎帳閑麥粉勸嘗銀縷熟梁炊持

獻玉漿還道傍父老應常好爲說鄉風一破顏

又

馬公同涉龍門道歎似山陰及武夷儘有千崖如
罨畫但無一棹弄清漪知君久有鄉關夢老我能
無木石思抱甕青梁洪玉食饋漿道左野人誰

又

太平縣道喜年豐每出城南訪野翁粗有軒牕開
草木謾畱車馬翳蒿蓬心寬易醉毋多酌事簡無
私亦屢空好得公田多稼地長年歌詠聖恩中

集家世以文學爲業亂離顛沛憂患困苦無
敢失墜然學未成而出早涉筆爲文應事而
已人或以爲能自知其不足也歸田以來稍
得安閑而目疾相嬰學不加進於立德立言
之事無有乎爾也是以所作事過卽罷不復
記錄至元庚辰冬臨川李伯宗黃仲律來訪
山中拾殘槁于敝篋得粗可屬讀者二百餘
篇而錄之賦此以謝

冰生鐵硯不堪磨收錄殘編夜每過老病自知才
思少應酬常愧語言多天人理一非無學內外篇
分豈自訛只恐玄經終寂寞空煩彌月駐山阿

答黃仲律學文之問

少學文章慮每周鄉人未免是吾羞讀書次第依
先覺下筆流行稍自由血氣旣衰尤帖帖神明自
至但休休聖賢端緒無岐徑篤信躬行莫妄求

重題環翠亭爲李浩卿作

亭深環翠燭光寒曾與詩人語夜闌秋色相高風
蕭蕭露華如洗月團團莫疑窈窕圍歌舞自愛空

間接羽翰我憶舊書陰德事百年應長萬琅玕

詩人

謂變元傳
觀志能也

答馬竹所見示詩韻

黃茆分土勝封畱惟有松喬是匹儔戴笠不愁山
雨溼倚筇嘗聽澗泉流玉堂夜永空餘夢瓦甕春
生欲自浮豈料朝雲停翠竹能從幙府一來游

又

壯氣橫秋勢利輕讀書讀律摠畱情爭看撤幙清
風起歸拜懸車白髮榮馬上詩成憐我老尊前花

發爲君清鳳池緩步春還近莫厭羹魚斫尾鱗

送吳文明

山雨牕寒詠楚辭可人同有古人思冰梅的的開
生面霜菊英英係令姿詩似仙成隨世換學如春
到只心知重來宜及東風早華蓋茅岡長紫芝

冬至後陳溪山貺以佳句謹用韻奉答

一陽初動反隆寒久雨山居絕往還彩筆曉題傳
密意綠樽春泛換衰顏希夷睡足風雲外安樂吟
餘水竹間共看往來閒日月紛紛塵事不相關

雪夜有懷華蓋山王玉玄

三峯千仞玉穹廬石骨金筋守靜孤渺渺微陽丹
建地緜緜深息火生符瓊林撐柱虛明兔銀海奔
吞黑赤烏持酒相尋行迹斷人間無鶴到蓬壺

答盱江聶空山

老去文章不滿車蕭條家學賴兒扶從師授業渠
能達對客揮毫我病蘇春雨解憐轅下犢朝陽愛
及屋頭烏德星何日賢人聚膝上瑤環看畫圖

又

繞屋看山不命車天寒翠袖自攜扶梅花照眼春
常健竹葉怡顏氣倍蘇復有新雛娛老鶴莫將舊
事憶童烏畫堂圍暖歌春雪蜀錦波瀾列海圖

寄和吳閑閑大宗師

釣天樂徹洞庭波野迥誰爲擊壤歌筆硯烟雲塵
世隔鶯花風雨客愁多傳書稚子空遺簡伐木樵
夫久爛柯舊識浮丘華蓋近相思何處看雲過

答吳宗師壽稀年詩韻

早接雲龍晚散萍三年交信祝修齡公從天上承

恩宴我向山中讀道經老兔幸分千歲藥高鴻還
借九秋翎蓬萊清淺人應識拄杖過頭弁會星

又

老子長年藏室居舊聞星象動江湖尚方別賜三
公鳥維嶽恒馳六轡駒龍馬河中先聖畫麒麟閣
上列仙圖從游童冠俱頭白幾度涼風咏舞雩

又

能歌能辨九爲章無限才情屬楚襄巫峽草生春
易晚渚宮花發日何長玄經寫就池皆墨國語成

來目少光把筆題詩亦聊爾坐中何用怪韋郎

送撫郡經歷海朝宗調官

館閣論思拜命新風雲近接屬車塵受釐宣室多
清夜奏賦甘泉是暮春雨過落花行處少日移高
樹坐來頻知君此日行吟思驄馬封章又避人

又

論撰西清近九天回頭二十五華年送人趨召迎
新雨對客停思倚暮烟染翰朝朝裁五色吟詩往
往過群賢故人若遇楊開府莫說韋郎鬢颯然

寄趙知微廉使

曾賜玄洲水玉丹南征六月海生寒
宣威辨說誰爲陸列守文章孰是韓
溟渤不驚天蕩蕩烟塵如洗月團團
故家文獻應催召拭目雲霄一羽翰

題致爽樓

易君小雅雅士也自其先長沙知錄公老
於是邑子孫守儒業至于耆耆又以醫藥
活人鄉邦稱世有善人者也小雅與余年
相近少相好也元統癸酉余自京師還小

雅觴余新樓之上望眺平遠山川邑屋烟
雲竹樹歷歷在目而易氏子孫或仕或處
皆循循敏藝而敦本小雅髮須郁然顏貌
充悅諸子侍立若弟兄之相次也余深嘆
善焉小雅曰樓未有名也子爲我題之余
以爲米元章最號善標置嘗自名其軒曰
致爽子之樓四面皆可觀而西面獨遠請
用柱笏意字之曰致爽仍請賦之

易公屋上有青山故架層樓擁髻鬟客至每留風

燕外詩成多在雨簾間南階竹似兒孫長東老身
同日月閑若道神仙平地好便從南郭覓柴關

東坡墨竹

扁舟憶上浣花溪風雨橫江萬竹低石室歸來秋
似水峨眉相對醉如泥春雷翻石蛟龍起夕照穿
林鳥雀栖二老何年重會面爲揮濃墨寫淒迷

白雲間上人度夏

白雲長傍太湖飛忽向西江度釣磯彭澤小龍邀
共飯潮陽遠客憶畱衣笋因春雨朝朝喫橘待秋

霜顆顆肥我自本名無所住經函松下共柴扉

寄龍翔寺訢笑隱

贏得歸來休便休鶯花何處更追遊閒雲過樹依
檐宿好雨添泉繞舍流世上文章將底用夢中塵
業又何憂隨身宮殿香雲裏還見千峯百海秋

寄魯學士

往歲樓船過太湖珠簾翠幙護圖書泉南五馬傳
燈後天上群龍進講餘滿座賓朋尊有酒盈疇稭
稻食多魚趣裝未覺曹叅晚應有賢人載後車

答甘允從寄海東白紵

海國練衣雪色明寄將千里見高情著隨野鶴渾
相稱行近沙鷗亦不驚江露滿船歌醉起爐烟攜
袖憶詩成秋風遊子偏愁予誰采芙蓉共晚晴

次韻董子羽見寄

家徒壁立相如宅森列雲山作畫屏前日遠煩天
子使至今猶詫野夫亭有來妙句題章草政爾齋
居讀道經積雪滿庭誰見問故人千里眼終青

又

昔年供奉慙清切簪筆春明近御屏一日攜書歸
菊徑幾回對雪坐茅亭女蘿薜荔如新葺華蓋夫
容歷舊經最憶先生天上去皇都應見草青青

次韻答聶空山

惠我名香海上來講帷還憶舊親陪微風高閣紆
天步細雨深簾對露臺滿袖當時攜馥郁孤村此
日爨蒿萊高人雅意相期遠未覺匆匆白髮催

寄貞居張先生

司馬先生苦著書久飡金液日清虛星辰欲動含

精劔雲霧長隨畢道車重憶仙翁千仞表爲修真
錄百篇餘白頭供奉黃金盡靈笈何因到隱居

孫宰金碧山水

昔代香山避暑宮中天積翠立夫容雲生金水三
春柳露滴銀床五粒松飛瀑橋長通窈窕斷堤人
倦立從容舊時行處今看盡烟雨樓臺晚更濃

甲戌四月十七日至臨川冲雲寺祝聖壽齋
罷爲賦此詩

郭西寺門雙石頭水檻相對林塘幽白花過雨落

松暝黃鳥隔溪鳴麥秋衰朽虛蒙宣室問淹遲實
愛小山畱爲貪佛日同僧話滿袖天香念舊游

蜀人鐫夢良效楊補之掀蓬圖

錦屏山下花如錦却愛清江野水邊放筆豈能無
直幹掀蓬方欲鬪清妍最憐半面畝歌扇更笑輕
身障舞筵君看上林千樹雪繁枝何處獨娟娟

寄吳思可廉使

歲月將題傑閣成寄來三筆荷高情知公任比中
丞重念我文慚吏部名王勃當年神所助江淹老

去夢還驚尚懷曝日茅檐下解寫農謠詠治平

寄南安燕信臣摠管

昔同禁苑又經筵一别于今四五年太守政成梅
嶺北老夫吟徹野雲邊愁來每看新題字夢裏猶
懷舊奏篇頗欲仙茅扶病骨想能函致到臨川

遊仙遊山賦詩

仙遊亭子北門東雲樹烟霞野逕通秋淨華峯千
仞表春濃仙縣百花中昔人黃鶴何年去九日清
尊此意同醉插菊花歸路晚莫令狂客惱衰翁

方壺作仙遊山圖

身在山中底用圖偶然點染出方壺數株古樹雲
連屋一箇橫橋水滿湖門外從教車馬過鑄中不
計稻梁儲等閒真遇尋師者指與雲間一翠渠

禽錢翼之

吳郡名書盛有唐流傳風致到錢郎閉門三月梨
花雨徧寫千林柿葉霜客看舊題驚歲月僧將新
句度江鄉莫愁茅舍淹畱久秋菊春蘭各自芳

次韻聶空山送杏

看徧生紅雨滿林筠籠遠致百丸金遙知過熱心
先喜猶恐微酸齒不禁洗琰便應催泛蟻封囊何
必共來禽唯當種核成嘉樹花遶春壇坐鼓琴

和陳溪山春雪見貽

彌天春雪積塵空花信今爲第幾風一色瓊瑤無
別間九年金粟有餘豐愁吟野徑雲俱黑睡起東
牕日已紅幸自與公同此樂莫辭微醉注黃中

予少年過薊門酒樓賦此題曰連十八書郡
人疑其爲呂洞賓詩也謾記於此

耳目聰明一丈夫飛行八極隘寰區劔吹白雪妖
邪滅袖拂春風槁朽蘇氣似酒酣雙國士情如花
擁萬天姝如今一去無消息只有中天月影孤

卽事

四月十六日

臥病丘園忽五年干官此日正朝天縣公稱壽邀
相共野老扶藜拜不前帶拭文犀看舊賜髮垂明
鶴愧初筵莫言小邑天光遠朝蓋靈芝五色鮮

目疾偶成

二首

一任榴花五月開看如烟霧亦悠哉靜聽靈響空

中發坐受天香世外來樂府好邀張籍賦策書宜
共左丘裁太清絕點誰能畫一瞬青蓮月滿臺

又

木綿鶴袖小烏巾百事無聞自在身舊是玉皇香
案吏今爲華蓋洞天賓看花謾笑如烟霧落筆那
能泣鬼神聞有紫芝新可食園公有約願爲隣

柯敬仲畫古木疎篁

不見丹丘四五年幽篁古木更蒼然蒹葭霜露風
連海翡翠蘭苕月在川憶昔畫圖天上作每題詩

句世間傳前村深雪誰高臥亦有晴虹貫夜船

答盱江石門江秀才

石門山在盱江上聞似金山及落星浮石不隨春
漲沒道林常見晚雲停鳥飛空界誰能賦龍負經
函我所銘此地卜隣多逸興重來爲寫向幽亭

夢吳成季真人見訪夢中作

竹外旌旗駐馬鞍兒童驚喜識衣冠青山春日何
須買高閣浮雲只共看野簌不堪供七筯新詩聊
可助盤桓當年赤壁扁舟夢幾度人間玉宇寒

嘉平歲望陳谿山自山齋還邑月下獨步有

賦

野迥霜明月轉高寒花疎影立亭臯池水下見蒼
鱗鬣雲海東迴雪羽毛客去夜深猶倚杖詩成春
近更揮毫茅簷數尺當晴昊無限清歡一縵袍

又

莫愁寒日經簷短甕牖西南煖有餘頗有襟期俱
老大略無塵滓涉清虛飢來進火烹仙朮定起和
丹較道書憑仗白雲封谷口免教人跡近幽居

題馬竹所照磨捕魚圖

霜寒水淨已無魚漁者縱橫罔不疎羹食盡供晨
市遠炊烟猶待晚歸餘已知漠漠濠梁異豈盡洋
洋鄭沼如萬里江湖春雨濶海鷗不去小舟虛

李伯宗錄詩

老去逢春祇謾吟敢煩綵筆爲追尋玉堂天上成
塵夢茅舍山中稱野心萬里雲霄歸鳥盡孤村風
雨落花深文章傳世知何用空使高情慨古今

壽陳溪山生日

風動蕭蕭白髮疎高齋長日共清虛輕雷過雨神
功外瑞露垂雲壽瀝餘藜杖每期天外友松肪更
試枕中書九秋華蓋通天極千載相隨兩鹿車

鶴

予家有薛少保鶴一軸先尚書自蜀攜至
此邑以爲珍玩先參政晚歲失之不知何
在當時極惋嘆今二十餘年集妻姪浚儀
趙德莊從好事者重購得之欲集識其故
而藏諸篋笥爲賦此

吾家舊物薛公鶴老氣崢嶸壓九臯鐵石閣身修
足脰雪霜依骨淺翎毛通泉久失千年壁杜甫空
吟一世毫老去思鄉歸未得時時借看倚秋高

二月雪與陳齊賢

江南二月常聽雨誰見翩翩雪滿舟病眼直驚翻
玉樹吟身渾欲覓貂裘衝寒載酒憐佳客把筆題
詩想舊遊得意長安各騎馬山堂還憶醉翁不

閩憲克莊以故舊託文公五世孫明仲遠徵
鄙文老退遺棄散逸荷伯宗用昭止善浩淵

子勗至善及余表姪孫陳誼予兄子豐仲弟
之婿賈熙用昭之從子大年等十餘人寒冬
連旬日夜錄之得五十卷亦已勞矣賦此爲

謝

老去斯文付寂寥寒枝枯甲一遺蜩虛言自歎真
何補好友相求不憚遙敗篋塵埃煩數子破窻燈
火每連宵書成明日尋梅去共看春風轉斗杓

送朱明仲歸建安并簡貳憲幹克莊

道南遺緒實天存徑寸神膠萬里渾路遠祗憑霜

履穩風寒更覺緼袍溫山川文物今誰在師友淵
源尚論弱翰不堪酬使者遠來深愧考亭孫

送王公輔遠遊

君子之所居雖歲月易遠而餘風流韻不
自知其及人之不窮也空山雷先生隱於
種湖之上豪傑名勝多從之遊其光顯盛
大者固已著見于代其高尚深遜者則有
不可得而知者矣然種湖猶有先生遺書
數百卷與平生著述皆無恙也湖觀之師

弟子相傳而守之其寥廓之趣粵古之思
必有彷彿其精微者乎至元二年丙子正
月六日大雪道無行人有羽士王公輔自
種湖來袖詩一篇爲贄觀此風致諒非俗
塵所能固有得於君子者乎問其年纔三
十喜其盛年好讀書苦吟聞其將從吳越
淮泗而遂至于京師也故作詩以送之

春雪門前二尺深子喬雙鳥度幽岑欲吹藜杖同
清夜靜看梅花對苦吟江國鶯花時冉冉京城烟
雨晚駸駸老來每憶登臨處仗子芳年一一尋

題趙師舜謝安遊東山圖

太傅東山杖屨行總將憂患托高情獨尋窈窕開
瑤席雙引娉婷韻玉笙春雨松間殘爽冷秋風江
上莫塵生三分籌策頻煩甚惆悵雲霄一羽輕

活水源爲王欽道賦

川上嘗聞感聖衷尋源曾見出泉蒙風霆流動千
門闢山澤高深一氣通潤物已隨時雨化濟川猶
歎昔人功野塘舊隱誰能住一勺清泠謝太空

夜宿周氏簡饒復心李伯宗

復心與伯宗留宿周氏東齋談易論語集
註至於達旦某以微疾不得奉陪然心甚
喜雞鳴賦此章呈二君子

霜月高齋宿兩賢夜深清話極幽玄退藏莫測神
明化通變猶聞典禮傳五十華年思絕學二三良
友信遺編選鋒若欲驅殘臘晴昊梅英孰與先

贈朱萬初之官建寧

并序

仲春之望建寧幕長朱君萬初之官迂道

百里惠訪山中存撫老病深感古誼得見
禁林貴臣名公書報萬初延閣機暇得進
所製新墨甚稱旨意中書傳問所居官將
有朝擢之喜良爲助慶因賦此爲別云
墨卿玄壁進明光玉硯雲興御榻香內相貽書傳
異賞中朝垂問仕何方宗家應訪金絲舊古道相
求草木荒把筆欲題新感遇牛衣春夢鬢蒼浪

題汪華玉子昂蘭石

四首

海內出珊瑚枝撐碧月孤鮫人拾翠羽泣露得明

珠

又

參差不可吹
紉佩寄遠道
遂令如石心
歲晚永相好

又

抱玉下天河
繞叢秋露多
天寒翠袖薄
日莫欲如何

又

翠袂倚嵒巖
來尋碧玉簫
拂衣成歷劫
遺跡映寒

潮

題黃與可所藏錢舜舉瓜圖

秋蔓有遺實
不食庸何傷
東陵爲圃地
何曾憂雪霜

題趙師舜光風轉蕙汎崇蘭圖

衆芳非不多
金石好兄弟
雜佩以問之
春風接襟袂

春妍帶雪圖

玉茗深宮裏
春妍帶雪殘
可憐五色羽
相竝不知

寒

江村秋晚圖

依約米家船疎林泊暮烟新詩吟未了槎上釣江
鱖

題饒世英所藏錢舜舉四季花木

海棠

睡起多情思依稀見太真一枝紅淚溼似憶故宮
春

黃蜀葵

花萼立清晨鵝黃向日新金杯承玉露偏醉蜀鄉
人

芙蓉

丹霞覆苑洲公子夜來遊終宴風露冷折花登彩
舟

家茶

萬木老空山花開綠萼間素粧風雪裏不作少年
顏

題趙師舜所藏雪竹圖

鳳皇臺畔竹猗猗別出參差玉一枝閱盡雪霜心
似鐵高風惟許歲寒知

題饒世英所藏孤鶴圖

海風吹月憶危巢清夜梳翎雪墮坳仙客不知猶
是畫每聽長唳向松梢

贈朱萬初

四首

霜雪摧殘澗壑非深根千歲斧斤違寸心不逐飛
烟化還作玄雲繞紫微

近世墨以油烟易松滋媚而不深重萬初

既以墨顯得真定劉法石刻墨法以爲劉
之精藝深心盡在於此必無誤後世因覃
思而得之蓋取千百年摧朽之餘精英之
不可泯者乃用之非常松也烏乎孰肯舍
易而求難必求古人之成法而後盡其心
者乎

又

珥貂鳴珮入明光新墨初成進御床草野小臣春
夢短猶懷染翰侍君王

天曆己巳天下大定中外又安天子始作
奎章之閣於宮廷之西日親御翰墨時榮
公存初康里公子山皆近侍閣下以朱萬
初所製墨進大稱旨得祿食藝文之館其
名藉甚邈在草野豈勝千古之思乎

又

延閣晨趨接佩聲又紆朱紱向江城丹心要似東
陽水釀作官壺徹底清

朱萬初以藝文直長以年勞恩賞出佐帥
幕南海轉丞東陽東陽文物之邑俗第以
名酒歸之豈其山川之望哉韓文公譏丞
不負余余負丞今丞凡邑之風俗教命刑
獄科賦無不得言言之當無不可行存乎
其人而已萬初勉之

又

頗愛燒香是鼻塵不應緣麝又勞人方牀石鼎過
清晝一縷山雲伴老身

深山高居爐香不可闕退休之久佳品乏

絕野人爲取老松柏之根枝葉實擣治斫
楓肪和之每焚一丸亦足以稍助清苦久
亦不復爲今年大雨時行土潤溽暑特甚
萬初袖致土速數片空齋蕭寒遂得爲一
日之供亦可喜也

於仁宗英宗一歎未能顯擢一斥同列不能
相宥皆呼字而不呼名可謂息寵極矣及門
弟子訂其在朝應制及歸田方外諸稿爲道
園學古錄予妄摘其詩不敢紊其卷次与楊
范揭詩集並傳庶幾四美具云海隅毛音識

伯生詩

卷七

汲古閣

十一

虞伯生詩卷七終

國家圖書館, NATIONAL CENTRAL LIBRARY, TAIWAN, R.O.C.

虞伯生詩卷八

雪後偶成

千山積雪日華明
甕牖前頭畫不成
未有樓臺供
遠眺負暄過午聽簷聲

又

曉來殘雪在陂陀
遠似羊群或似鷺
憶踏春泥看
柳色駝裘貂帽度冰河

自贊題白雲求陳可復所寫像

歸來江上一身輕
野服初成拄杖行
祇好白雲相

伴住天台廬阜聽松聲

築室

溪頭築室苦不多無奈今年春雨何水暖白鷗渾
不去泥深田父少相過

客有好仙者持唐人小遊仙詩求予書之惡
其淫鄙別爲賦五首

東海轉上白玉盤滿天風露桂花寒方平欲來共
今夕微聞洞簫過石壇

又

偶過松間看奕棋松枯鶴老忘歸時山前酒熟不
中喫自有金盤行五芝

又

關關雎鳩在河洲錦幄春溫吁可愁六合清凝海
天碧木公金母坐優游

又

衣垂烟霧冠晨暉雪色鬢毛風外稀何事酒壚眠
不去塵中醉裏或忘機

又

自注詩

卷八

汲古閣

老婦扶兒休笑儂不肯學仙早已翁東家木公合
辟谷但汝護田祈歲豐

子昂竹

憶昔吳興寫竹枝滿堂賓客動秋思諸公老去風
流盡相對茶烟颺鬢絲

子昂蘭石

汀艸離離石老蒼行吟何處樂清狂江中遺佩相
思久莫待明年春蕨長

夢蟾圖

炯炯孤蟾兩目寒莎羅臺上濯神丹冰容映日初
無質故許空巖夢覺看

唐五王出遊圖

華萼樓前御柳長春風馳道曉塵香龍姿鳳質多
相似黃髮爲期樂未央

八駿圖

瑤池積雪與天平西極空聞八駿名玉殿重來人
世換蕭蕭苜蓿漢宮城

射獵圖

羽獵長年從翠華合圍八月度龍沙蕭蕭徒御圖
中見猶想君庖賜滿車

又

日莫推車力已疲道逢猛虎快饞饑負嶠何待要
馮婦弱婦嬰兒未可欺

題白玉蟾像

日出溱桑積雪高海空天淨絕纖毫每看劒氣衝
銀漢知是吹笙詠碧桃

題大別山柏圖

憑陵霜雪鼓風雷此樹相傳手所栽想見樓頭黃
鶴客千年一度此山來

答趙秉彝送地黃膏

身如老馬視茫茫多謝銀罌致地黃昨日飲餘肌
骨煖解持書卷近晨光

酬張用鼎

老馬尚書賓客盛淮南淮北誦君詩玉堂自是歸
來晚不及觀君落筆時

題關尹問道圖

身隱何爲更註書區區關尹強留車周公制作成
殘缺嘆息何人問緒餘

中秋前偶賦

一室蕭然絕蔽虧桂香初發自先知已無熱惱仍
無夢坐到空林月落時

又

空林月落大如盤雞犬無聲曉氣寒童子凝謀朝
一食玉盃盛得露溥溥

又

一杯濃露滑如飴灌溉清涼可療飢畢力石田嗟
已晚空山何處采靈芝

又

采芝不覺過前山偶答樵歌莫却還人影自行殘
照外雨雲先入翠微間

次韻答魯子暈叅政四首

山水娛人若妙顏幾年搖落鏡中鬟高情誰與爲
膏沐舒卷春雲指掌間

又

海風吹雨散晨曦
紈扇高堂兩鬢絲
想見東南賓客盛
臨江醜酒看潮時

又

病鶴前年下玉京
空巢聊寄一毛輕
白雲千載悠悠外
自照寒溪野水清

又

方嶽羅賢祝罔開
選掄更欲籍非才
故人情厚慚衰朽
千里空煩重使來

題赤城站壁

莫怪扁舟不早歸
斜風細雨溼蓑衣
天心月滿江心定
贏得閒身坐釣磯

又和赤城壁韻

飛鴻力盡始能歸
敢向漁樵詫芰衣
多謝相如遠相問
華星明月照寒磯

秋夜有作

月明清露浸山河
八極無塵水絕波
形質不應猶有礙
鼻端惟恨桂香多

玉龍圖

貝闕澄澄海月生
水晶簾影接空明
鮫綃剪得霓裳就
却擁冰髯上太清

郭熙畫木

江南喬木已無多
誰畫參天鐵石柯
記得玉堂春晝永
寒林坐對老東坡

浙西提舉陳衆仲以其省之命請考秋試其
還也賦此贈之

道誼交情志竟完
千山觸熱訪衰殘
唯慙薄德成虛辱
故詠高風小子看

又

百病消沉老病身
石田茅屋度餘春
故人遠訪閒相對
共看流泉日日新

又

合禮文章體道心
事天成物致精深
老來更覺交游少
珍重高賢副所欽

又

游揚羅李生聞土
千古斯文一綫微
最憶相逢共紉繹
開牕東海眇烟霏

又

子去聲光日已高荒村那復重相遭畫屏甕牖閒
欹枕春雨秋雲見羽毛

贈閒白雲

白雲東去又經春每想飛鴻到水濱幾箇遮山松
樹子憑君洒雨洗埃塵

無題

貝闕珠宮夜不眠露華浩浩月娟娟不應又作人
間夢窈窕吹簫度碧烟

題亡弟嘉魚大夫與師眉山奴詩後

瞻望眉山艸木春西還無計每傷神數家共客巴
陵下只託詩書論古親

又

吾弟文章絕幻厖只餘詩句似西江十年夢斷遺
書在風雨梧桐自一窻

書蘭亭後

墨池春雨水泠泠消得鸞群舞雪翎千載臨文嗟
悼盡摩挲病目看蘭亭

題黃敬申所藏虎圖

當時玉帳蜀雲西坐嘯風生艸木低傳寫餘威千載外空山藜藿尚萋萋

聞機杼

咿啞機杼隔林幽夢覺江湖憶舊遊滿地月明涼似水數聲柔櫓過揚州

賦玉簪花

玉簪花發憶京城徧閱詩篇未識名解道折花猶帶露却愁香色起凡情

又

面植芝蘭背植蕙高花冠玉擅中園小冠不厭雙蓬鬢賴有朋簪玉露繁

又

翠葉長莖出露叢素華高潔倚微風方田種得新秋玉萬斛濃香屬老翁

又

天官會弁若星流簪筆同朝八月秋一色尚方新切玉含香無語度中洲

溪橋踏雪

萬竹孤亭積雪明
衝寒先到寄高情
過橋不是尋常客
共聽空山裂帛聲

奉答吳仲谷見寄兼簡許愿夫

城南謾作草堂新
過客全稀甌有塵
城闕鶯花二三月
無因藜杖伴詩人

又

華蓋山前已結菴
荒陂獨往策羸驂
何如城北蕭閒叟
吟詠高齋從適參

又

翠竹如雲百尺樓
川原錦繡出城頭
遙知吟詠群賢老
清酒千壺薦膳羞

賦范德機詩後

玉堂妙筆交游盡
投老江南隔死生
最憶崖州相憶處
華星孤月海波清

題文丞相詩後

大廈明非一木支
區區未忍聽傾危
故人邂逅聊相問
矢死終天更不疑

次韻陳溪山春日卽事

日出蒼龍霧露零郊原花柳搃蘇醒七言內外黃
庭景歷歷東風舊所經

又

河漢光微海出暎蓬萊宮闕啓千門晴虛無外來
相覓塵影俱消湛若存

又

蕉竹窻中舊席虛白雲不住意何如欲占正叔來
消息正值包羲未畫初

題呂洞賓見滕子京像

一杯湖水碧于天飛劍來時月正圓天下儘多憂
樂事翛然來往又千年

題魏受禪碑

華歆勤進鍾繇筆妙畫千年不可磨舊有始皇金
石刻李斯文字更嵯峨

崇仁邑士吳景永客授齊安寓定惠院書來
報寺之海棠東坡所爲賦詩者今二百五十
餘年枝萼復盛住山明月溪增葺坡翁舊寓

并錄所賦爲寄偶成三章答之并呈幹公克
莊部使者云

滿山桃李擅春風
麤俗何妨總化工
賴得土人渾不愛
故容山寺對衰翁

又

江城紅萼是鄉人人去
花飛海復塵二百餘年還
一見雨中月下爲誰春

又

昔登棧閣俯春濤
紅萼青松翠壁高
應有故人知

我在鷓鴣春雨老江臯

次韻東山鳳栖別墅四時詞

湖邊綠樹多年柳
島上紅雲二月花
惟有舊時雙燕子
經春仍在故人家

又

雨餘飛蝶傷秋潤
江外蹲鴟喜早涼
高屐圍碁歸別墅
東山莫是謝家莊

又

秋聲柿葉書連屋
日暮黃花醉短籬
每歎觀文修

舊史不違初志見新詩

又

寒陰潔白分嘉玉園果青黃貢上金受命素心如
鐵石不知冰雪歲年深

臨川艾蜚英茂才求書北游京師荒山久病
筆墨盡廢偶有近詩二首寫寄 國史侍講
祭酒先生數千里外一笑契舊有同在者共
一看之亦知衰朽託庇無恙也

鳥鳴不鳴山更幽少學多聞今始休當年空喫人

間飯聊爲田家事牧牛

又

牛角掛書田裏歸昔人行處不相違白蘋如雪鷺
飛起耿耿銀河星宿稀

和陳溪山韻

林園寥廓靜簾櫳來往風雲盡日中萬卷相娛嗟
歲晚一簞猶恐負時豐

又

幽幽直入南山路行到水窮猶有雲回首獨歸無

一事道傍還見丈人耘

題樓攻媿織圖

我國家既定中原以民久失業置十道勸農使摠於大司農慎擇老成重厚之君子而命之皆親歷原野安輯而教訓之今桑麻之效徧天下齊魯尤甚其後功成省專使之任以歸憲司憲司置四僉事其二則勸農之所分也至今耕桑之事憲猶上之大農天下守令皆以農事繫銜矣前代郡

縣所治大門東西壁皆畫耕織圖使民得而觀之而今罕爲之者撫圖頌詩爲賦三章章四句

鄉里蠶桑勿失時畫圖勸相又題詩當時補袞應無缺金玉餘音到蠶絲

又

吳越蠶桑用日多始終吟咏極婆娑玉成繭館閒琴瑟宜薦房中備樂歌

又

昔者東南杼柚空詠歌蠶織到圖窮勸農十道先
齊魯百世興王衣被功

送程以文兼東揭曼碩

樸學清忠荷主知每驚異論苦相危只緣自信非
鄉愿俟命從容絕妄思

又

玉堂北局是秋官健筆相遭白晝寒莫怪討論成
諍論御床夜索艸篇看

又

故人不肯宿山家半夜驅車踏月華寄語傍人休
大笑詩成端的向誰誇

西郊艸堂圖爲從子豈作

故家東郭百花洲梅柳西郊總舊游賢子獨知懷
土念結廬爲擬草堂幽

又

早晚東吳買客船直歸萬里畫橋邊寄貲儘有詩
人在忍向園中看數椽

又

草堂在處卽西郊巴嶺還如雪嶺高
但有奸孫能力學不愁老杜不春遨

又

野梅官柳頗依依酒債尋常七十稀
莫遣錦溪賢姪覺恐愁安樂不思歸

至正改元辛巳寒食日示弟及諸子姪

疾風吹雨作春深抱膝西牕獨自吟
百世詩書千古事只憑孫子不虛心

又

江山信美非吾土飄泊棲遲近百年
山舍墓田同水曲不堪夢覺聽啼鶻

寄成都孝成姪

寒食風花高下飛錦官城外是耶非
百年墳墓惟孤姪因酌寒泉薦薜薇

寄吳門弟姪

尚書大墳在吳門老病西江更斷魂
春雨滿山湖海去扁舟強飲引諸孫

寄子安民從子宣

兩兒逐祿廣東西解憶荒村叫竹雞北返衣冠先
志在扁舟有日發端溪

癸酉歲晚留上方觀

投老歸來山縣小無端人事尚關情雲房借宿最
岑寂亦有鄰春月下聲

又

燈前自了讀殘經風入疎簾月入櫺坐到夜深誰
是伴數枝梅萼一銅瓶

又

偶行幽徑豈尋春忽見叢蘭紫茁新幸自林深可
終日莫將香引路行人

又

山中積雪到簷端獨對篝燈坐夜闌不是梅花心
似鐵如何禁得許多寒

葵榴雙鳧

江南春事已蕭條只有葵榴絢日嬌水國不知炎
暑近雙將文羽戲清潮

題明皇按舞圖

寢安食飽對青雲按舞調笙不厭頻西內歸來還
獨看梨園弟子白頭新

題昭君出塞圖

天下爲家百不憂玉顏錦帳度春秋如何一段琵琶
月青艸離離詠未休

題陳氏遠塵樓

春風滿縣花開日夜月千山雪積時定有扁舟來
好客倚闌溪水度雲遲

偶成

野田閑水浸秋天隨意行吟到水邊樵牧各歸魚
鳥散微風吹面鬢蕭然

又

半畝秋陰近石床倚床自炷水沉香新涼透骨清
如水幾箇簪篸共夜長

又

鶴骨新來怯曉寒東牕睡覺日三竿蒲團深坐香
如縷塵几殘經亦倦看

桂亭

夜色澄澄海氣深水光蕩漾入簾旌冰肌玉骨便
清夢不爲吹簫送月明

又

壁月珠星繞四周團團翠樹屋東頭黃金布地香
爲國此是山中富貴秋

田舍

晨昏車馬亂雲烟花下追遊亦偶然百舌無聲春
亦去蕭蕭田舍日高眠

題漢孝宣受貢圖

悠悠旌旆馬蕭蕭萬里歸來氣不驕黃屋東邊渭
水上從官誰是霍嫖姚

答饒心道四首

碧玉淒涼思入雲數峰江上見湘君夜深霜冷絃
中折儘有遺音世未聞

又

日下紫微還獨歸陰陰夏木掩柴扉空傳秀句寰
區滿世外高情更絕稀

又

巴水東流日夜深先生茅屋背城陰東風盡日吹
香艸金石臺荒想獨尋

又

塞坐詩書日旻歌陶公於此每婆娑匡廬雨過青
如舊只爲長松不易柯

題約牖爲譚無咎賦

約牖前頭一沼開天光倒影入蒼苔臨泉洗墨春
雲溼恐有神魚起蟄雷

又

檢束精神不外馳天光融徹入初曦飛塵不礙晴
虛景意識空從一管窺

又

意識休將一管窺斂藏深密靜無私始終慎獨成
天德深信開天自宓義

又

酬酢紛拏窘室廬老來漸覺就明虛羨君盛歲先
知約絕利尋源事廣居

別變玄圃後重寄

郭西山路有寒梅想見臨行首重回夜聽雨聲知
水長滿船明月幾時開

聞燮玄圃除御史

好風天上送春來紫陌紅塵萬里開春雨春波舟
一葉題詩先到鳳凰臺

燮玄圃除御史後寄蕭往淵巡檢

望仙亭長最清閒日日吟詩竹樹間長官新幾豸
冠去誰與空山相往還

題趙子固梅

楚王宮室賦離騷不及梅花莫解嘲留與周南舊
公子歲寒聊寫兩三梢

古檜

根到深泉石作身疎疎香葉不知春海波不動天
風遠千歲寒蛟作老人

題夢良梅

詩翁白髮對青春看遍江邊玉雪新我是錦城城
裏客開圖更憶錦屏人

留易小雅樓促陳溪山同飲

花滿橫樓酒滿盃晴光偏送好春回東家縱有溪
山興聽得歌聲也合來

和陳溪山櫻桃

紫玉盤中絳雪繁相如多渴喜清寒明光分賜難
重得却作金丹火齊看

留題龍門寺

自入重山知者稀默然終日坐垂衣山猿還笑癡
頑甚無見無聞忘却歸

又

一榻東軒絕百非浴波紅日上當扉輕雷谷口作
飛雨知是老龍回翠微

又

舊得鵬雛短羽毛筠籠三月未能高攜來聽法生
公石風竹雲松任所遨

又

投閑雖久尚勞生數日山居實稱情香象渡河姑
且置端然聽得落花聲

伯生將生之時外祖楊文仲夢南岳真人來

降心甚異之三尋即知讀書繼占弟槃同闕
書舍為二室左室書陶淵明詩曰陶菴右室
書邵堯夫詩曰邵庵故世稱邵菴先生被知
于仁宗英宗一類未能顯擢一斥同列不能
相宥皆呼字而不呼名可謂息鑿極矣及門
弟子訂其在朝必制及歸田方外謄稿為道
園學古錄予妄摭其訪不取齋其卷次与楊
苕揭詩集並傳庶尋四美具云海隅毛晉識

虞伯生詩卷八

虞伯生詩補遺

虞山 毛晉子晉 訂

題周怡臨韓幹明皇出游圖

開元盛事何人畫
玉冠夫容御天馬
從官騎步各有持
移仗華清意閒暇
宮花如錦照青春
詔許傳看思古人
不知身在瀛洲上
親奉圖書侍紫宸

明皇出游圖

輦路風微曉霧開
華清宮裏看花來
五王走馬誰先醉
倒著宮袍去不回

端午賜大長公主

細葛迎颺喜宮衣之初試瑞蓮承霧慶壽
學之方持輒陳節物之多儀用祝年齡之
有永併將唐律式衍魯風

殿閣薰風五月涼綠荷池上度天香扇裁團鑑飄
羅雪盃注輕冰酌玉漿塵尾可消時晝永絲絲宜
祝壽年長清朝共慶宮闈貴萬歲菖蒲汎紫觴

董元夏景山日待渡圖

董元夏山何可得嘉木千章鐵作畫曾巒總含雨

氣潤百谷正受川光溢犬牙洲渚善泐洄滄江散
落碣石開山田何處無耕鑿尋源不得還徘徊柳
下行人將有適臨流不度心爲惻我楫孔堅舟孔
安奉子以濟諒非難

徽宗畫梨花青禽圖

宿雨初收禁林寂玉斧臨牕看春色蒺藜沙上暖
塵飛何處人間作寒食

趙千里小景

前代王孫不好武拈筆幽牕寫汀渚殘雲野水三

百年依舊松筠溼春雨

燕文貴小景

行盡長松逕溪頭有小舟
鑑湖如賜與終日弄清流

趙千里出峽圖

巨舟臨峽口衆工志如一
各以所操濟雖危萬無失
所憂至平曠玩肆生縱逸
毋俾持釣翁倚杖三太息

蘊能羅漢圖

有寶其寶破慳來獻我
乃回施非見所見月輪當
空天清海平神光赫然萬國永寧

白樂天重屏圖

錦屏圍煖坐衰翁妻子相看語
笑同翡翠鴛鴦元是畫
櫻桃楊柳詎非空清朝優老容
歸早野寺宜閑見歲豐兜率有
天何異此葛巾吟偈白蓮風

陳閱畫中宗射鹿圖

昭陵石馬立殘陽曾見騰驤逐
鹿場馳射衝波夸獲雋故知英
氣似前王

羅漢圖

神光炯炯視容直坐展兩足手按膝雨龍還入軍
持水風衣拂著磐陀石深山海島非人間碧桃花
開啼鳥閒法雲還爲等慈起矍然飛錫無留難

韓幹馬

開元沙苑蒺藜秋韓幹新圖總不收天廡真龍奇
骨在故知臣甫負驊騮

曹霸下槽馬

漚下長年飽豆芻誰通馬語識踟躕主恩深重知

何報或者東封駕鼓車

韓晉公混土星像

猗黃靈填土中馴伏牛類相從朱旂揚招八風乘
天田入紫宮命司嗇錫九農鳴塊桴年屢豐

柯博士畫扇

旭日鳴幽鳥露華在芳藜外廷無奏事殿閣自微
風

胡虔取水蕃部圖

駝車度磧輒三日老馬砲沙泉水溢橐囊盛滿不

辭勞徼外天山雪千尺君不見聖明天子恩澤多
旁及四海猶翕河昆蟲草木感餘潤日獻醴泉甘
露歌

滕昌祐懷香睡鵝圖

蒼鵝惜毛羽宛宛臥春雨雨餘日照沙上有懷香
花懷香不自獻夢到金鑾殿殿池多躍魚君王方
草書

虞伯生詩補遺

終